

# AESOP I

PHRYGIS, ET

ALIORVM FA-

BVLAE.



*Quorum nomina sequenti pagella uidere licet.*



APVD SEB. GRYPHIVM

ALVGDVNI,

1554.

*J. And. P. C.*

**FABVLARVM QVAE HOC  
IN LIBRO CONTINENTVR  
interpretēs, atq; autores.**

<b>Laurentius Valla.</b>	<b>pagina</b>	<b>49</b>
<b>Gulielmus Gudianus</b>		<b>93</b>
<b>Hadrianus Barlandus.</b>		<b>117</b>
<b>Gulielmus Hermannus.</b>		<b>133</b>
<b>Rimicius.</b>		<b>147</b>
<b>Erasmus.</b>		<b>189</b>
<b>Angelus Politianus.</b>		<b>193</b>
<b>Petrus Crinitus.</b>		<b>194</b>
<b>Ioannes Antonius Campanus.</b>		<b>195</b>
<b>Plinius Secundus Nouocomensis.</b>		<b>196</b>
<b>Aulus Gellius.</b>		<b>196</b>
<b>Nicolaus Gerbelius Phorcensis.</b>		<b>200</b>
<b>Laurentius Abstemius.</b>		<b>203</b>
<b>Huius nunc alterum accessit hecatomythium : hoc est, cen- tum fabularum libellus.</b>		<b>249</b>

# AESOPIFA

## BVLATORIS

### VITA,

E Græca Maximi Planudis Latina facta.



**R**ERVUM humanarum naturam persecuti sunt & alij, & posteris tradiderunt: Aesopus uerò uidetur non absq; diuino afflatu cum moralem disciplinā attingisset, magno intervallo multos eorum superasse, etenim neq; definiendo, neque ratiocinando, neq; ex historia, quam ante ipsius ætatem tulit tempus, admonendo, sed fabulis penitus erudiendo sic audientium uenatur animos, ut pudeat ratione præditos facere, aut sentire, quæ neque aues, neque uulpes: & rursus non uacare illis, quibus pleraq; bruta tempore prudenter uacasse finguntur: ex quibus aliqua pericula imminētia effugerunt, aliqua maximam utilitatem in opportunitatibus cōsecuta sunt. Hic igitur, qui uitam suam philosophicæ Reipubli. imaginem proposuerat, & operibus magis quàm uerbis philosophatus, genus quidē traxit ex Ammorio oppido Phrygiæ, cognomento Magnæ, sed fortuna fuit seruus. Quare & magnopere mihi uidetur Platonis illud in Gorgia pulchrè simul & uerè dictum: Plerumque enim hæc, inquit, contraria inter se sunt, natura simul, ac lex. Nam Aesopi animum natura liberum reddidit: sed hominū lex corpus in seruitutem tradidit. Potuit tamen ne sic quidem animi libertatem corrumpere. Sed quamuis ad res uarias, & in

4 2

diuer

diuerſa loca transferret corpus, à propria tamen ſede illū traducere non potuit. Fuit autem non ſolum ſeruus, ſed & deformiſſimus omnium ſuæ ætatis hominum. nā acuto capite fuit, preſſis naribus, depreſſo collo, prominentibus labris, niger (unde & nomen adeptus eſt : idem enim Aefopus, quod Aethiops) uētroſus, ualguſ, & incuruus, fortasſe & Homericum Therſiten turpitudine formæ ſuperans. Hoc uerò omnium in eo peſimum erat, tardiloquentia, & uox obſcura ſimul, & inarticulata. Quæ omnia etiam uidentur ſeruitutem Aefopo paraſſe. Etenim mirum fuiſſet, ſi ſic indecenti corpore potuiſſet ſeruientium retia effugere. Sed corpore ſanè tali, animo uerò ſolertiſſimo natura extitit, & ad omne commētum feliciſſimus. Poſſeſſor igitur ipſius tanquam ad nullum domeſticum opus commodum, ad fodiendum agrum emiſit. Ille uerò digreſſus alacriter operi incumbēbat, Proſecto uerò aliquādo & hero ad agros, ut inſpectionem operarū faceret, agricola quidā ficos egregias decerptas dono tulit. Ille uerò fructus delectatus pulchritudine, Agathopodi miniſtro (hoc enim erat nomen puero) ſeruare iuſſit, ut ſibi poſt balneum apponeret. Cum uerò ita eueniſſet, atq; Aefopus ob quandam neceſſitatem ingreſſus eſſet in domum, occasione capta Agathopus conſilium huiuſmodi conſeruo cuidam offert, Impleamur, ſi placet, ficibus beuſtu : & ſi herus noſter has requiſierit, nos cōtra Aefopum teſtificabimur ambo, quòd in domum ingreſſus ſit, ficuſq; clām comederit : & ſuper uero fundamēto, uidelicet quòd domum ingreſſus ſit, multa mendacia ſtruemus. neque enim quicquam poterit unus contra duos, præſertim cum ſine probationibus ne mutire quidem audeat. Viſo uerò hoc, ad opus acceſſerunt, & ficus deuorantes, dicebant in ſingulis cum riſu, Væ tibi infelix

lix Aesope. Cùm igitur herus rediisset à lauacro, & ficus petiisset, audiuiisset autem quòd Aesopus eas comediisset, Aesopum cum ira iubet uocari, & uocato ait, Dic mihi, ò execrande, ita me contempsisti, ut in penarium ingredi-  
 ris, & paratas mihi ficus comederes? Ille audiebat quidè,  
 & intelligebat, loqui autè nullo modo poterat ob lingue  
 tarditatem. Cùm iam uerberandus esset, & delatores ue-  
 hementiores instarent, procumbès ad heri pedes, ut susli-  
 neret se parum, orabat. Cùm autè cucurriisset, & tepidam  
 aquam attulisset, eam bibit: & digitis in os demissis, humo-  
 rem solum reiecit: nondum enim cibum attigerat. Orabat  
 igitur ut idem & accusantes facerent, quo manifestum fie-  
 ret, quisnam ficus dissipasset. Herus autem ingenium homi-  
 nis admiratus, sic facere & alios iussit. Illi autem delibe-  
 rauerant bibere quidem aquam, non tamen demittere in  
 guttur digitos, sed per obliqua maxillarum eos circūferre.  
 Vix dum autem biberant, cùm tepida illa aqua, nausea po-  
 tis inducta, effecit ut sponte fructus redderetur. Tunc igi-  
 tur ante oculos posito maleficio ministrorū, & calumnia,  
 herus iussit eos nudos flagris cædi. Illi uerò cognouerunt  
 manifestè dictum illud: Qui in alterū dolos struit sibi in-  
 scijs malum fabricat. Sequenti uerò die hero in urbem re-  
 uecto, Aesopo uerò fodiente, quemadmodum iussus fuerat,  
 sacerdotes Dianæ, siue alij quipiā homines cū à uia ab-  
 errassent, Aesopum nacti, per Iouem hospitem obsecra-  
 bant hominem, ut quæ in urbem duceret, uiam ostenderet.  
 Ille cū sub umbrā arboris uiros adduxisset prius, & fru-  
 galem apposuiisset coenā, inde & dux factus ipsis, in quam  
 querebant uiam induxit. Illi autem tum ob hospitalitatem,  
 tum quòd dux eorum fuisset, mirum in modum uiro deuin-  
 ti, manus in cælum eleuarunt, & precibus benefactorem

remunerati sunt. Aesopus uerò reuersus, inq; somnum lapsus ob assiduum Laborem & aestum, uisus est uidere Fortunam astantem sibi, & solutionem linguae sermonisq; cursum, & eam, quae fabularum est, doctrinam largiri. Statim igitur excitatus ait, Papae ut suauiter dormiui: sed & pulchrum somniū uidere uisus sum ecce, expedit loquor, bos, asinus, rastrū. Per deos intelligo unde mihi bonū accesserit hoc: quoniā enim pius fui in hospites, propitium numen consecutus sum. Ergo benefacere, bona plenum est spe. Sic igitur Aesopus letatus factō rursum coepit fodere. praefecto agri (Zenas erat ipsi nomen) ad operarios profecto, & horum unum, quoniam leuiter errauerat in opere, uirga uerberāte, Aesopus statim exclamauit, Homo cuius gratia eum, qui nullam iniuriā fecit, sic uerberas? & omnibus temere plagas ingeris quotidie: omnino renūtiabo hēc herō. Zenas autē hēc ab Aesopo audiens, obstupuit non mediocriter, secumq; ait, Quod Aesopus loqui coeperit, nulla mihi utilitas erit: praeuertam igitur ipse, & accusabo eum coram domino, antē quā hoc ipsum faciat, & me herus procuratione priuet. His dictis, in urbem uectus est ad dominum. Ceterū turbatus cū accessisset: Salue, inquit, herē. Ille uerò: Quid perturbatus ades? inquit. Et Zenas, Res quēdā monstrosa in agro contigit. At herus, Nunquid arbor praeter tēpus fructum tulit? aut iumentū aliquod praeter naturam genuit? Et ille, Non ita, sed Aesopus qui antea erat mutus, nunc loqui coepit. Ad hēc herus, Sic tibi nihil boni fiat hoc existimanti monstrum esse. Ille autem: Sanē, inquit: nam quae in me contumeliose dixit, sponte praetereo hēc: in te autem & Deos intolerabiliter conuittitur. His ira parcius herus, Zenae ait, Ecce tibi traditus est Aesopus, uende, dona, quod uis de eo, fac. Cum Zenas autem in potest

potestate sua accepisset Aesopum, quodq; in eum haberet imperium, ei renūciasset: ille, Quodcūq; usum tibi fuerit, inquit, effice. Accidit autē, cū uir quidam iumenta uellet emere, & propterea per agrū illum iter faceret, Zenam rogauit. Ille, lumentum, inquit, mihi uendere non licet, sed mancipium masculum: quod si uis emere, adest. Cū uerò mercator iussisset ostendi sibi seruulū, & Zenas Aesopum accersisset, mercator uidens ipsum, & cachinnatus: Vnde tibi, inquit, ad Zenam, hæc olla? utrum truncus est arboris, an homo? hic nisi uocem haberet, fermē uideretur iter inflatus. Quare mihi iter interruptū huiusce piaculi gratia? His dictis, iter suū prosequēbatur. Aesopus uerò insecutus ipsum: Mane, inquit. Ille autem conuersus: Abi, inquit, à me sordidissime canis. Aesopus autem, Dic mihi, cuius rei causa huc uenisti? Et mercator, Scelestē, ut aliquid boni emerem: te quòd inutilis & marcidus sis, non egeo. Aesopus contrā, Eme me, & si qua est fides, muliū te iuuare potissum. Ille, Qua in re à te iuuari possem, cū sis odium penitus? Et Aesopus, Non ne adsunt tibi pueruli domi turbulentī, & stertēs: his præfice me pædagogū: omnino eis proleuā ero. Ridens igitur de hoc mercator, inquit Zenæ, Quanti malū hoc uendis uas? Ille uerò, Tribus, inquit, obolis. Mercator autem statim tres obolos soluit, dicens, Nihil expendi, & nihil emi. Quū igitur iter fecissent, ac peruenissent in suā domum, pueruli duo, qui adhuc sub matre erant, Aesopo uiso perturbati exclamauerūt. Aesopus autem statim mercatori inquit, Habes meæ pollicitationis probationem. Ille uerò ridens ingressus, inquit, Saluta conseruos tuos. Introgressum autē, ac salutantem uidentes illi, Quodnā malū nostro hero, inquiunt, cōtigīt, ut seruulū adeo deformē emerit? Sed ut uidetur, pro fascino domus hūc

emitt. Non multo uerò post & mercator ingressus, apparari res ad iter seruis iussit, quod postmodum in Asiam profecturus esset. Illi igitur statim uasa distribuebant. At Aesopus rogabat leuissimum onus sibi concedi tanquam nuper empto, & nondum ad haec ministeria exercitato. His autem & si nihil tollere uelit, ueniam praebentibus, ille non oportere dixit omnibus laborantibus, se solum inutilem esse. His quod attollere uellet permittentibus, huc & illuc cum circumspexisset, & uasa congregasset diuersa, saccos, & stramenta, & canistros, unum canistrum panis plenum, quem duo baiulare debebant, sibi imponi iubet. Illi autem ridentes, & nihil esse stultius uili hoc scelesto inquentes, qui cum paulo ante leuissimum postularat tollere onus, nunc omnium grauissimum elegisset: oportere tamen desiderium eius explere: sublatum canistrum imposuerunt Aesopo. Ille uero humeris onere grauatis huc & illuc dimouebatur. Hunc uidens mercator, admiratus est, & inquit, Aesopus cum ad laborandum promptus sit, iam suum pretium persoluit, iumentum enim onus sustulit. Cum uero hora prandij diuertissent, Aesopus iussus panes dispensare, seminuacuum canistrum multis comedentibus fecit. Unde etiam post prandium leuiore onere facto alacrius incedebat. Verum uespere quoque illic, quo diuerterant, pane distributo, postera die uacuo omnino in humeros sublato canistro, primus omnium ibat, & conseruis, qui hanc animaduertent praecurrentem, dubium faceret, utrum putridus esset Aesopus, an quis alius: & illi cum cognouissent eum esse, admirarentur, quod denigratus hominibus solertius omnibus fecisset, quoniam qui facile absumerentur panes, sustulisset, cum illi stramenta, & reliqua suppellectilem baiularent, quae ea non sit natura, ut sic absumatur. Mercator itaque cum esset Epheci, alia quidem  
manet



mancipia cum lucro uendidit : remanserunt autem ei tria, Grammaticus, Cantor, & Aesopus. Cum uero quidam ex familiaribus ei suassisset, in Samum ut nauigaret, tanquā ibi cum maiore lucro diuenditurus seruulos, persuadet. Cum autem mercator peruenisset in Samum, Grammaticū quidem & Cantorē, utruq; noua ueste indutū statuit in foro: sed Aesopum quoniā nulla ex parte poterat ornare (totus enim erat mendosus) ueste ex sacco ei circūposita, medium inter utrunq; constituit, ut & uidentes stuperent, dicētes, Vnde haec abominatio, quae & alios obscurat? Aesopus autem quamuis à multis morderetur, stabat tamen audacter in ipsos intuens. Xanthus uero philosophus habitans tunc Sami profectus in forum, & uidens duos quidem pueros cum ornatu astantes, medium uero horum Aesopum, admiratus est mercatoris commentum : nanq; turpem in medio collocauerat, ut appositione deformis, pulchriores seipsis adolescentuli apparerent. Propius autem astant, percontatus est Cantorē cuius esset. Et is, Cappadox. Tum Xanthus, Quid igitur scis facere? Hic, Omnia. Atq; ad haec Aesopus risit. Discipuli uero, qui cum Xantho unā erant, ut uiderunt ipsum risisse, & ostendisse dentes, statim aliquod monstrum uidere arbitrati sunt. Vno autem dicente, Certē hernia est, dentes habens : Alio uero, Quid nam uidens risit? Alio, non risisse, sed riguisse: omnibus autē uolentibus cognoscere cur risisset, unus ipsorum accedēs, Aesopo inquit, Cuius rei gratia risisti? Et is, Abscede marina ouis. Illo uero confuso funditus eo sermone, repenteq; secedēte, Xanthus inquit mercatori, Quāto pretio Cantor? Illo autem nulle obolis respondente, ad alterum iuit, immenso audito pretio. Atqui & hunc rogante philosopho, cuius nam foret, & audito Lydum esse, rursumq; rogante, Quid ergo

scis facere? & illo dicente, Omnia, iterum risit Æsopus. Ex scholasticis autem quodā dubitante, quidnam hic ad omnes ridet? Alius ei dixit, Si uis & tu marinus hircus uocari, roga. Xanthus autem rursus rogauit mercatorem, Quanto pretio Grammaticus? Et ille, Tribus milibus obolorum, respondit. Aegre tulit Philosophus immensum pretium, & auersus discedebat. Scholasticis autē petentibus, an non pla cuerint ei serui: Nā, inquit, sed decretum est, non emere mancipium pretiosum. Vnus autem ipsorum dixit, Si hæc ita se habent, igitur turpem hūc quin emas, nulla lex uetat: idem enim & hic ministerium afferet, & nos pretiū huius impendemus, ad hæc Xanthus, ait, Ridiculum esset, uos soluissse pretium, me autem seruū emisse: alioqui & uxorcula mea mundiciæ studiosa, non ferret à deformi serualo serui sibi. At scholastici rursus dixerunt, in promptu est sententiā, ne pareatur foemina. tunc Philosophus, Faciamus prius periculum, an sciat aliquid, ne & pretium incassum percat. Adiens igitur Æsopum: Gaude, inquit. Et ille, Num'nam tristabar? Et Xanthus, Saluto te. Ille autem, Et ego te. Xanthus unā cum alijs inexpectato, & prompto respo sso stupefactus rogauit, Cuias es? Ille, Niger. Et Xanthus, Non hoc inquam, sed unde natus sis. Et is, Ex uentre matris meæ. Non hoc dico, sed in quo loco natus sis. Et ille, Non renuntiauit mihi mater mea, utrum in sublimi loco, an in humili. Et philosophus, Quid uerò facere nosti? Ille, Nihil. Et Xanthus, Quomodo? Quoniam hi omnia nosse professi sunt, mihi autem reliquerunt nihil. Atq; his scholastici uehementer delectati, Per diuinam prouidentiam, dixerunt, ualde bene respondit: nullus enim est homo, qui omnia norit: & propterea scilicet risit. Rursus igitur Xanthus inquit, Vis emam te? Et Æsopus, Me hac in re consult

consultore eges? Vtrum tibi uidetur melius, aut emere, aut non, fac: nullus enim quidquam ui facit hoc in tua positum est uoluntate: & si uolueris, crumena ianuam aperies, argentum numera: sin uerò minimè, ne cauillare. Rursus igitur scholastici inter se dixerunt, Per deos superauit præceptorem. Xanthus uerò cum dixisset, Si emero te, fugere uoles? Ridens Aesopus ait, Hoc si uolero facere, nullo modo utar te consultore, ut & tu paulò antè, me. Et Xanthus, Bene dicis, sed deformis es. Et ille, Mentem inspicere oportet ò philosophe, & non faciem. Tunc mercatorem adiens Xanthus, inquit, Quanti hunc uendis? Et ille, Ut uituperes meas merces, ades, quoniam te dignis omiſſis pueris, deformem hunc eligis: alterum horum eme, hunc autem auctarium accipe. Et Xanthus, Nō certè, sed hunc. Et mercator, Sexaginta obolis eme. At scholastici confestim collatos exposuerunt: Xanthus autem possedit. Itaque publicani uenditione cognita, aderant indignantes, quis uendiderit, quis emerit: at cum pueret utrumque se pronuntiare propter uilitatem pretij, Aesopus stans in medio exclamauit, Qui uenditus est, ego sum: qui emit, hic: qui uendidit, ille. si uerò ipsi tacuerint, ego igitur liber sum. publicani uerò diffusi gaudio, donato Xantho uestigali, abierunt. Aesopus igitur sequebatur in domum euntem Xanthum. Cum meridianus autem aestus esset, Xanthus inter deambulandum pallium trahendo mingeat. Quod uidens Aesopus, uestibus illius apprehensis retro, ad se ipsum traxit, atque inquit, Quam celerrimè me uende, quoniam fugiam. Et Xanthus, Quamobrem? Quoniam, inquit, non possem tali seruire hero. si enim tu, qui herus es, & neminem times, tamen relaxationem non præbes naturæ, sed eundo mingis: si obtigerit seruum me ad ali-

quod

quod mītti ministerium, & inter eundum tale quid exigat natura, neceſſe omnino fuerit uolādo cacare. Et Xanthus, Hoc te turbat? tria mala uolens euitare, eundo mingo. Et ille, Quæ? Et hic, Stanti mihi, caput peruſiſſet ſol: pedes uerò terræ ſolum torridū: lotij autem acrimonia, olfactum offendiſſet. Tunc Aefopus, Vade, perſuaſiſti mihi. Poſtquā autem domi fuerunt, Xanthus iubēs Aefopo manere ante ueſtibulum, quoniam elegantiuſculā eſſe ſibi mulierculam ſciebat, neq; oportere illico talem turpitudinem ei oſtēdi, antequā aliquis ipſi urbana diceret: ipſe ingreſſus dicit, Domina, non etiā poſthac obijcies miniſterium, quod mihi tuæ pediſſequæ præſtant: iam enim & ego puerū tibi enī, in quo uidebis pulchritudinem, qualem nūquam uidiſti, qui & iam ante ueſtibulum ſtat. & ille quidē hæc. Pediſſequæ autem uera exiſtimantes, quæ dicta fuerant, inter ſe non mediocriter contendebant, cuiam ipſarum ſponſus nuper emptus futurus ſit. Xanthi uerò uxore intro uocari nouitium iubente mancipium, una ex alijs magis accelerās, & ut arrabonem uocationē arripiens, nouitium ſeruū egreſſa accerſebat. Et illo dicente, Ecce ego adſum: ſtupefacta, Tu, inquit, es? Et hic, Næ. Et illa, Sine inuidia ne ingrediaris intro, omnes alioqui fugient. Alia tamen egreſſa, eumq; intuita, Cædatur tua, inquit, ſacies, & huc ingredere, ſed ne appropinques mihi. Ingreſſus ſtetit corā domina: quæ cū eum uidiſſet, oculos auertit ad uirum, inquiens, Vnde mihi hoc monſtrum attuliſti? abijce ipſum à facie mea. Et ille, Satis tibi domina: ne meum ſubmorde nouitiū ſeruū. Hæc autem, Videris Xanthe me perofus, aliam inducere uelle: & fortè dum pudet dicere mihi ut tua domo abſcedam, canicipitem mihi hunc apportāſti, ut eius ægre latura miniſterium fugiam. Da igitur mihi dotem meam, atq; ibo. Ad hæc

hæc Xantho increpante Aesopum tanquam in itinere urbana quædam locutum de mictu inter eundum, nunc uerò mulieri nihil dicentem, Aesopus ait, Projice ipsam in barathrum. Et Xanthus, Tace scelus, an nescis me hanc, ut meipsum, amare? Et Aesopus, Amas mulierculam? Et ille, Admodum quidem fugitiue. Ad hæc Aesopus, pulsato medio pede, ualde exclamauit, Xanthus philosophus uxorius est. Et uersus ad suam dominā ait, Tu ò domina uelles philosophum emisse tibi seruum iuuenem, bono habitu, uigentem, qui te nudam in balneo spectaret, & tecum luderet in dedecus philosophi? O' Euripedes, aureum ego tuum inquam os, talia dicēs, Multi impetus fluctuum marinorum, multi fluminum, & ignis calidi flatus: dura res paupertas, dura & alia infinita: tamen nihil æquè durum, ut mulier mala. Tu uerò ò domina philosophi uxor à pulchris adolescentulis tibi ut ministretur noli, ne quo pacto contumeliam uiro tuo inflixeris. Illa hæc audiēs, cum nihil contradicere posset, Vnde uir, inquit, pulchritudinem hæc uenatus es? sed & loquax putridus hic uidetur, & facetus, reconciliabor igitur ei. Tum Xanthus, Aesope, reconciliata est tibi tua hera. Et Aesopus ironicè loquens, Magna res, inquit, placare mulierem. Et Xanthus, Tace posthac, emi enim te ad seruiendum, non ad contradicendum. Postera die Xanthus Aesopo sequi iusso, ad hortum quædam iuit empturus olera. Cum uerò olitor fasciculum olerum messuisset, accepit Aesopus. Xantho autem soluturo iam hortulano pecuniam, hortulanus, Sine, inquit, here, unum problema à te desidero. Et Xanthus, Quidnam? Tum ille, Quid ita, ut quæ à me plantantur olera, quamuis diligenter & fodiantur, & irrigentur, tardum tamen suscipiunt incrementum: quibus uerò spontanea è terra pullulatio,

cisi

et si nulla cura adhibetur, ijs tamen celerior germinatio? Xanthus igitur (licet philosophi quæstio foret) cum nihil aliud sciret dicere, A diuina prudentia & hoc inter cetera gubernari inquit. Aesopus uerò (aderat enim) risit. Ad quem philosophus, Rides ne, an derides? Et Aesopus, Derideo, inquit, sed non te, uerum qui te docuit. Quæ enim à diuina prouidentia fiunt, hæc à sapientibus uiris solutionem sortiuntur: oppono itaque me, & ego soluiam problemata. Interim itaq; Xanthus conuersus inquit olitori, Minime omnium decens est ò amice, me, qui in tantis auditorijs disceptauerim, nunc in horto soluere sophismata: puero autem huic meo, qui consequentia multorum callet, si proposueris, solutionem consequeris quæsi. Et olitor, Hic turpis literas nouit! ò infelicitatem. sed narra ò optime, si quæsi declarationem nosti. Et Aesopus: Mulier, inquit, cum ad secundas nuptias iuerit, liberis ex priore uiro susceptis, si uirum quoque inuenerit filios ex priore uxore genuisse, quos ipsa filios adduxit, horum mater est: quos inuenit penes uirum, horum est nouerca. multum igitur in utrisque ostendit differentiam: nam quos ex se genuit amater & accuratè nutrire perseverat, alienos uerò partus odit, & inuidia utens, illorum cibos diminuens, suis addit filijs. Illos enim natura quasi proprios amat: odio autem habet, qui uiri sunt, quasi alienos. Eodem modo & terra, eorum quæ ipsa ex se genuit, mater est: quæ autem tu plantas, horum est nouerca: huius rei gratia, quæ sua sunt, ut legitima magis nutrit, ac fouet: à te autem plantatis ut spurjijs non tantum alimenti tribuit. His delectatus olitor, Credideris mihi, inquit, quòd me graui sollicitudine hæc garrulitate leuaris. Abi gratis ferens olera, & quoties tibi his opus est, tanquam in proprium hortum uadens accipe.

Post

Post dies aliquot rursus in balneum proficiscitur Xanthus. Quibusdam autem amicis ibi inuentis, ad Aesopum loquitur, ut in domum currat, & lentem in ollam iniectam coquit. Ille abiens, granum unum lentis in ollam iactum coquit. Xanthus ergo unâ cum amicis lotus uocauit hos compransuros, præfatus tamen & quòd tenuis esset futura coena, utpote ex lente, quodq; non oporteret uarietate ferculorum amicos iudicare, sed probare uoluntatem. His uerò profectis, & in domum ingressis, Xanthus inquit, Da nobis à balneo bibere Aesope. illo uerò ex flexu balnei accipiente & tradente, Xanthus fœtore repletus: Hem quid hoc, inquit, Aesope? Et ille, A balneo, ut iussisti. Xanthus autem præsentia amicorum iram compescēte, & peluim sibi apponi iubente, Aesopus pelui apposita stabat. Tunc & Xanthus, Non lauas: Tum ille: Iussum est mihi ea facere, quæ iusseris: tu nunc non dixisti, Inijce aquam in peluim & laua pedes meos, & pone soleas, & quaecunque deinceps. Ad hæc igitur amicis Xanthus ait, Num enim seruum emi? nullo modo, sed magistrum. Discumbentibus itaque ipsis, & Xantho Aesopum rogante, an cocta sit lens, cochleari acceptum ille lentis granum tradidit. Xanthus accipiens, ac ratus gratia facienda periculum coctionis lentem accepisse, digitis conterens ait, Bene cocta est, asser. Illo solùm aquam uacuante in scutellæ, & apponente, Xanthus, Vbi est lens? inquit. Et is, Accepisti ipsam. Et Xanthus, Vnum granum coxisti? Tum Aesopus, Maxime: lentem enim singulariter dixisti, non lentes, quod pleratinè dicitur. Xanthus ergo prorsus consilij inops, Viri socij, ait, hic ad insaniam me rediget. Deinde conuersus ad Aesopum ait. Sed ne uidear improbe serue amicis iniurius, abiens eme pedes porcinos quatuor,

quatuor, & perceleriter coctos appone. Festinus hoc peragit: ac dum pedes coquerentur, Xanthus iure uolens uerberare Aesopum, cum esset in re aliqua ad usum occupatus, unum ex pedibus ex olla clanculum aufrens, occulit. Paulò post autem & Aesopus ueniens, & ollam perscrutatus, ut tres solos pedes uidit, cognouit insidias sibi aliquas factas: & accurrens in stabulum, saginati porci unum ex quatuor cultro amputans, & pillis nudans in ollam iecit, ac coxit cum cæteris. Xanthus uerò ueritus ne Aesopus subreptum pedem non inueniens, fugeret: rursus in ollam ipsum iniecit. Aesopo autem in patinam pedes euacuante, ac quinq; his apparentibus, Xanthus, Quid hoc, inquit Aesope: quomodo quinque? Et ille, Duo porci quot habent pedes? Et Xanthus, Octo. Tum Aesopus, Sunt ergo hic quinque, & saginatus porcus inferius tripes pascitur. Xanthus admodum molestè ferens, amicis inquit, Non ne paulò antè dixi, quòd celerrimè hic me ad insaniam rediget? Et Aesopus, Here, nosti id quod ex additione & subductione in quantitatem secundum rationalem summam colligitur non esse errorem. Xanthus igitur nullam causam honestam inueniens uerberandi Aesopum, quieuit. Postridie autem ex scholasticis quidā sumptuosam apparans coenam, cum alijs discipulis & Xanthum inuitauit. Coenatibus igitur, Xanthus partes ex appositis accepit electas, & Aesopo ponè stanti dedit. Abi, inquit ei, beneuolèq; me & hæc trade. Ille uerò decedès secum cogitabat, Nūc occasio est ulcisci meam dominā, propterea quòd me, cū nouitius ueni, cauillata est: uidebit igitur an hero meo bene uelit. Profectus itaq; in domū, sedit in uestibulo: & hera accita sportulam partiū corā ipsa posuit, ac inquit, Hera, hæc omnia herus misit, nō tibi, sed beneuol



neuolet. Cumq; canē uocasset, atq; dixisset, Veni Lycæna, comede, tibi enim herus hæc iussit dari: particulatim cani omnia proiecit. At post hoc ad herum regressus, & rogatus an beneuolet dederit omnia, Omnia, inquit, & coram me omnia comedit. Illo uerò iterum rogante, Et quidnam edens ait? Et is, Mihi quidem nihil quidquā dixit, sed secum tibi gratias habebat. Vxor tamen Xanthi eam rem calamitosam esse arbitrata, nempe accusata, quod uel canicule beneuolentia in uirum cederet, ac subdens sese non amplius in posterum cohabitaturam cum eo, ingressa cubiculū plorabat. Potu autem procedente, & questionibus alternis propositis, ac uno ex ipsis ambigente, quando futura esset ingens inter homines turbatio, Aesopus ponē stās, ait, Cum resurrexerint mortui, repetētes quæ possederint. Et scholastici ridentes dixerunt, Ingeniosus est nouitius hic. Alio uerò rursus proponente, quamobrem ouis ad eadem tracta, non exclamet, sus autem quā maxime uociferetur, Aesopus rursus ait, Quoniam ouis assucta mulgeri, aut etiam uelleris onus deponere, tacite sequitur, ideo etiam pedibus arrepta, & ferrum uidens, nihil graue suspicatur, sed illa usitata & solita uidetur passura: sed sus, ut quæ neque mulgetur, neq; tondetur, neq; nouit ad horum aliquid trahi, sed carnes suas tantum usui esse, meritò uociferatur. His sic dictis, discipuli rursus laudauerunt ipsum uersi in risum. Finito conuiuio, & Xantho in domum reuerso, & uxorem pro more aggresso alloqui, illa ipsum auersata, inquit, Ne mihi propinquus fias, da mihi dotem meam, & abibo, non enim manserim tecum posthac: tu autem abiens cani adulare, cui misisti partes. Et Xanthus stupefactus ait, Omnino mali mihi aliquid rursus attulit Aesopus. Et uxori inquit, Domina, num me pote, tu ebria es? cui par-

tes misit nonne tibi? Non per Iouem, mihi quidē minime; inquit illa, sed cani. Xanthus Aesopo accito inquit, Cui dedisti partes? Et ille, Bencuolae tuae. Et uxori Xanthus, Nihil accepisti? Et illa, Nihil. Et Aesopus, Cui enim infasti, here, partes dari? Et ille, Bencuolae meae. Et Aesopus cane uocata, Hae tibi, inquit, bene uult: nam mulier etsi bene uelle dicatur, tamen minima quaq; recula offensa contradicit, conuiuiatur, abit: canem tamen uerberato, expellito, non tamē discedet, sed oblita omnium, statim benigne blanditur & cum gratia hero. Oportebat igitur dicere, here, Vxori has partes ferto, & non, bencuolae. Et Xanthus, Vides domina nō meam esse culpam, sed eius qui tulit? tolera itaq; nec deerit mihi occasio, qua cum uerberem. Illa uerō non credente, uerū clam ad suos parētes regressa, Aesopus inquit, Non recte dixi o here, canem tibi magis bene uelle, quā meam heram? Diebus autē aliquot praeteritis, & uxore irreconciliata manente, & Xantho affines quosdam ad ipsam, ut reuerteretur domū mittente: illa, cum cedere nollet, ac proinde Xanthus in moerore esset, Aesopus adiens eum, inquit, Ne te afflictes here: ego enim eam cras uenire sponte & citissime faciam ad te. Accepta pecunia Aesopus in forum proficiscitur: ac emptis anseribus, & gallinis, & alijs quibusdam ad conuiuium idoneis, ambulans, domos circuibat: transibat igitur & ante domū parentum herae suae, ignorare simulans illorum esse, & in ea heram manere. Cumq; in quēdam ex domo illa incidisset, rogabat, an aliquid ad nuptias utile domestici possent sibi uendere. Ille autem rogat, Cui est opus his? Xantho, inquit, philosopho: cras enim uxori copulandus est. Eo uerō ascendente, & uxori Xanthi haec, ut audiuit, renūtiante, illa cursim, & properē ad Xanthum illico pergit, contra

tra ipsum clamat, dicens inter alia & hæc, Non me uiuente, ô Xanthe, alteri uxori coniungi poteris. Sicq; mansit in domo per Aesopum, quemadmodum propter illum discesserat. Rursus post dies aliquot inuitans Xanthus discipulos ad prandium, Aesopo inquit: I, eme optimum quodq; & præstantissimum. Ille inter eundem secum dicebat, Ego docebo herum non stulta mādare. Cum linguas igitur solum fuillas emisset, & apparasset discumbētib; linguam assatam singulis cum salsamento apposuit. Discipulis laudantibus ut philosophicum primum ferculum, propter linguæ ad locutionē ministerium, rursus elixas Aesopus linguas apposuit: atq; iterum etiam ferculo alio, atque alio petito, ille nihil aliud quàm linguas proponebat. Discipuli autem eodem subinde cibo repetito indignati, Quousq; linguas? inquit: Quippe nos per diem linguas edendo, nostras doluimus. Xanthus inquit iratus, Nihil aliud tibi est Aesope? Et is, Non certè. Tum ille, Non'ne mandati tibi sordidissime homule, optimum quodq; & præstantissimum obsonari? Et Aesopus, Multas habeo tibi gratias, quòd me philosophis presentibus increpaueris. Quid igitur fuerit lingua melius & præstātius in uita? omnis enim doctrina, & philosophia per ipsam monstratur ac traditur: per ipsam dationes, acceptiones, fora, salutationes, benedictiæ, mæsa omnis: per ipsam celebrantur nuptiæ, ciuitates eriguntur, homines seruantur. Et, ut breuiter dicam, per ipsam tota uita nostra cōsistit: nihil ergo lingua melius. Ob hæc discipuli Aesopum rectè loqui dicentes, aberrasse uerò magistrum, abiire singuli in domum. Postridie rursus accusantibus ipsis Xanthum, ille respondebat, non secundū uoluntatem suam hæc facta fuisse, sed inutilis serui nequitia: hodie autem permutabit cœnam, & ipse presentibus uo-

Lingua nihil  
melius.

b 2 bis

Nihil peius  
lingua.

bis cum eo colloquar. Ac uocato eo, uilissimum quodque  
& pessimum obsonari iubet, quod discipuli secum forent  
coenaturi. Ille autem nihil mutatus, rursus linguas emit &  
apparatas discumbentibus apposuit. Hi inter se submurmurabant, Porcinæ rursus linguæ. Et mox iterum linguas apposuit. Et ualde iterum, atq; iterum. Xanthus autem iniquo animo ferens, Quid hoc, inquit, Aesope? num rursus mandui tibi optimum quodq; & prestantissimum obsonari, ac non potius uilissimum quodq; & pessimum? Ille autem, Et quid unquâ peius lingua ô here? non ne urbes per ipsam corrunt? non homines per ipsam interficiuntur? non mendacia omnia, & maledicta, & periuria per ipsam perficiuntur? non nuptiæ, & principatus, & regna per ipsam euertuntur? non, ut summam dicam, uita omnis per ipsam infinitorum errorum referta est? Hæc Aesopo dicente quidam ex unâ discumbentibus Xantho inquit, Hic, nisi ualde te ipsum munieris, non dubia erit insanix causa tibi: qualis enim forma, talis & anima. Et Aesopus ad eum, Tu mihi uideris, ô homo, prauus quidam, & curiosus esse, herum irritans cōtra seruum. Xanthus autem ad hæc, causam cupiens uerberandi hominem, Fugitiue, inquit, quoniam curiosum dixisti amicum, ostende mihi incuriosum hominem adductum. Egressus igitur postridie in plateam Aesopus, & eos, qui præteribant, circumspectans, uidet quendam in loco quodam diu sedentem, quem iudicans secum otiosum & simplicem esse, accedens inquit, Herus te inuitat secum pransurum. Rusticus ille nihil sciscitatus, neq; quis esset à quo inuitaretur, ingressus est in domum: & cum ipsis calceis, ut erant uiles, discubuit. Rogate autem Xantho, Quis hic? Aesopus ait, Incuriosus homo. Et Xanthus uxori in aurem dicit ut sibi obsequeretur, & quod ipse iusserit faceret,

ret, ut plagas Aesopo honesta ratione inferret. Deinde coram omnibus inquit, Domina aquam in peluim inijce, & pedes hospitis lava. Cogitabat enim secum omnino hospititem recusaturum. Aesopum uero quod ille curiosus esset, uerbis casum iri. Illa igitur iacta aqua in peluim, ibat pedes hospitis lotura. At ille cognoscens hanc esse domus dominam, secum loquebatur, Honorare me omnino uult, atq; huius rei gratia suis manibus pedes meos uult lauare, cum ancillis queat hoc mandare. Extensis igitur pedibus, Laus, inquit, hera: ac lotus discubuit. Xantho autem iubente uinum hospiti dari quod biberet, rursus ille considerabat secum ipsos ante oportere bibere: sed quia sic ipsis uisum est, non opus mihi haec inquirere. Accipiens igitur bibit. Prudentibus uero, & ferculo quodam hosti appposito, atq; illo suauiter comedente, Xanthus cocium, quod male hoc condidisset, criminabatur, atq; etiam nudum uerbis afficiebat. Rusticus autem secum dicebat, Ferculum quidem optime coctum est, & nihil ei deest, quo minus recte paratum sit: si autem absq; causa uult suum seruum flagellare paterfamilias, quid ad me? Xantho autem egregerente, neque iucunde affecto, quoniam nihil hospes curiose inquirebat, tandem placentae allatae sunt. Hospes uero tanquam nunquam placentam gustasset conuoluens, & accipiens, ipsas ut panes comedeat. Xanthus autem pistorem accusauit, dixitq; ei, Cur nam o execrande, absq; melle, ac pipere placentas praeparasti? Ille inquit, Si cruda est, o here, placentae, me uerba: si uero non, ut oportebat, praeparata est, non me, sed heram accusa. Et Xanthus, Si a mea hoc factum est uxore, uiuam ipsam nunc comburam. Atque iterum uxori innuit, ut sibi obsequeretur propter Aesopum. Cum igitur iussisset sarmenta in medium affer-

ri, pyram succendit, & arreptam uxorem prope pyram egū, ita ut crederetur ipsam in ignem esse immissurus: differebat autem aliquo modo, & circumspiciebat rusticum, si quo modo assurgens, à tali audacia prohibere ipsum aggrederetur. Sed is secum rursus considerabat, Cum nulla adsit causa, quidnam sic irascitur? Deinde inquit, O paterfamiliās, si hoc iudicas oportere fieri, expecta me parumper, dum digressus abducam & ipse meam ex agro uxorem, ut ambas simul comburas. Hæc à viro Xanthus audiens, & huius sinceritatem, ac generositatem admiratus, Aesopo inquit, Ecce uerè homo incuriosus, habes accepta præmia uictoriæ: ô Aesope: satis est tibi de cætero, dein uerò libertatem tuam assequeris. Postridie autē Xanthus iussit Aesopo in balneas ire, & scrutari, an multa adesset turba, uelle enim lauari. Abeunti autem prætor occurrens, & Xanthi ipsum esse cognoscens, interrogauit quoniam iret. Quod cum se is negasset scire: existimans Prætor interrogationem suam flocci pendi, in carcerē ipsum abduci iubet. Cum igitur abduceretur Aesopus, clamauit, Vides ô Prætor quemadmodum rectè responderim? quæ enim non expectaui, & occurri tibi, & in carcerē iam trahor. Tum Prætor stupefactus responsi promptitudine, sinit abire. Aesopus autem profectus in balneas, multam turbam in ipsis intuitus est: sed & lapidem uidet in medio ingressu positum, in quē singuli ingredientiæ, & egredientes offendeant: hunc autem unus quispiam ingrediens ut lauaretur, sublitum transposuit. Reuersus igitur ad herum, Si uis, inquit, herc, lauari, unum hominem in balneis uidi. Xanthus profectus, ac multitudinem lauantium uidens dixit, Quid hoc, ô Aesope? nonne unum hominem dixisti te uidisse? Aesopus: Certè, inquit: nam lapidem illū (manu ostendens)

dens) ante ingressum possum reperi, in quem ingrediētes omnes & exeuntes offendebant: unus uerò quidā antequā illideret, eleuatū transposuit. Illum igitur unū hominem dixi uidisse: pluris faciens quā alios. Tum Xāthus, Nihil apud Aesopum tardum est ad responsionē. Cum aliquando Xanthus ex latrina rediret, interrogauit Aesopū, Quid ita homines post cacationem, uentris excremēta aspiciunt? Ille ait, Antiquis temporibus nūc quidā delicatius uiuens multo tēpore prae delicijs in latrina sedebat, ut & sua illic immorās cacauerit praeordia. Ex illo tēpore igitur timen- tes ceteri homines, uentris inspiciunt sordes, ne quo modo & ipsi hoc patiātur. Sed tu here, ne time: nō enim sunt tibi praeordia. Die autem quodā celebrato conuiuio, Xanthus cum alijs philosophis discūbebat, & potu iam inualescēte, crebrae quaestiones inter hos uersabantur: atq; Xantho incipiente turbari, Aesopus adstans ait, Here, Bacchus tria possidet temperamenta, primū uoluptatis, secundū ebrietatis, tertium contumeliae. Vos igitur poti iam, & letati, quae reliqua sunt, omittite. Tum Xāthus iam ebrius, ait, Tace, inferis cōsule. Et Aesopus, igitur & in infernū distrahēre. Ex discipulis autē quidā subebriū iam Xanthū uidens, & ut uniuersum dicam, temulentū. O praeceptor, inquit, potest ne homo aliquis ebibere mare? Et ille, Admodū quidē: ego enim ipse hoc ebibā. Discipulus, At si non poteris, quā nam tibi multā irrogabo? Tum Xanthus, Domum meam depono totā. Atq; interim depositis anulis pacta firmauerunt, tum discesserūt. Postridie diluculo, excitato Xantho, ac facie lauante, anulum inter lauandū non uidit. Aesopum de eo interrogat. Ille nescio, inquit, quidnā factū fuerit: sed unum scio tantū, quod à domo decideris tua. Tum Xāthus, Quamobrē? Aesopus, Quoniā heri ebrius pepigisti mare

ebibere, atq; in pactis deposuisti & anulū. Et is, Tum quo-  
 modo maius fide opus potero? uerū te nūc rogo, si qua co-  
 gnitio, si qua prudentia, si qua experiētia, prestō sis, ac opē  
 porrige, ut uincam, aut pacta dissoluam. Aesopus autē, Vin-  
 cere quidē haud licet, sed ut soluas pacta, efficiā. Cum hodie  
 rursus in unum conueneritis, nullo modo uidearis timere,  
 uerū quæ pactus es ebrius, eadem sobrius quoq; dic. Iube  
 itaq; stramenta, & mensam in litore poni, & pueros para-  
 tos cum poculis porrigere tibi marinam aquam. Cum au-  
 tem omnē uideris turbam concurrisse ad spectaculum, ipse  
 discumbens iube ex mari impleri poculum: atq; hoc acce-  
 pto omnibus audientibus, dic pactis præfetto, Quenam  
 apud nos foedera intuius? Atq; is respondebit tibi, quod  
 pepigeris mare ebibere. Conuersus igitur tu ad omnes, sic  
 dicito, Viri Samij, scitis & uos penitus quamplurimos flu-  
 uios prorumpere in mare, ego autem pepigi mare solum  
 ebibere, nō etiam exeuntia in ipsum flumina. hic itaq; scho-  
 lasticus prius coërceat flumina omnia, deinde statim mare  
 solum ebibam. Xanthus autem futuram ex hoc pacti solu-  
 tionem cognoscens, uehementer letatus est. Populus igitur  
 ad litus confluit ad spectaculum eius, quod faciendum erat:  
 cumq; Xanthus quæ edoctus fuerat ab Aesopo, fecisset, ac  
 dixisset, Samij admirati, acclamauerunt, ac ipsum lauda-  
 runt: Scholasticus autem, Xanthi pedibus obuolutus, & ui-  
 tum se confitebatur, & pacta rogabat dissolui: quod &  
 fecit Xanthus exorante populo. Profectis autem ipsis in  
 domum, Aesopus adiens Xanthum, inquit, Per omnem ui-  
 tam tibi gratificatus sum, nonne dignus sum o hēre conse-  
 qui libertatem? At Xanthus obiurgando ipsum, repulit,  
 dicens, An nolo ipse hoc facere? sed exi ante uestibulum,  
 & speculari: & si uideris duas cornices, renuntia mihi:  
 bonum



bonum enim augurium hoc. quòd si unam uideas, hoc malum. Accedens igitur Aesopus, cum duas fortè ita cornices super quadam uidisset arbore sedentes, accedens Xantho renuntiavit. Exeunte autem Xantho, altera harum auolauit: & Xanthus alteram solam uidens ait, Non ne dixisti mihi execranda duas uidisse te? Et is, Ita, sed altera auolauit. Tum Xanthus, Deerat tibi fugitiue me ut deluderet? Iubet igitur cum denudatum uerberari. At dum Aesopus uerberabatur, praefectus quidam inuitauit ad coenā Xanthum, Aesopo inter uerba exclamante, Hei mihi misero: ego enim qui duas uidi cornices, uerbcor: tu uerò, qui unam tantum, in conuiuium abis. uanum itaque fuit augurium. Tum Xanthus solertiam eius admiratus, cessare iubet uerba. Non multis autem post diebus philosophos & rhetores cum inuissset Xanthus, iussit Aesopo ante uestribulum stare, & nullum indoctum ingredi sinere, sed doctos solos. Hora autem prandij clauso uestibulo, Aesopus intus sedebat. Ex inuitatis autem quodam profecto, & ianuam pulsante, Aesopus intus ait, Quid mouet canis? ille putans canis uocari, iratus discessit: sic ergo unusquisque ueniens reuertebatur iratus, putans iniuria affici, Aesopo eadem omnes interrogante. Cum autem unus ex ipsis ostium pulsasset, interrogatus quid moueret canis, respondit, Caudam & aures. Aesopus ipsum rectè iudicans respondisse, aperta ianua ad herum duxit, ac inquit, Nullus philosophus ad conuiuium tuum uenit? ò here, praeter hunc solum. Xanthus igitur ualde tristatus est, deceptum se existimans ab inuitatis. Postridie cum uenissent inuitati ad literarium ludum, accusabant Xanthum, dicentes, Vt uideris ò praceptor, cupiebas quidem ipse continere nos: sed ueritus, putridum in uestibulo constituisti Aesopum, ut nos iniuria

afficeret, & canes uocaret. Et Xanthus, Inſomnium ne id eſt, an uera res? Tum illi, Niſi ſtertinus, uera res. Conſeſſum accerſitus Aefopus, & rogatus cum ira, cuius rei gratia amicos ignominioſe amolitus eſſet, ait, Nō tu mihi here mand:ſti, ne quem uulgarem ac indoctum hominem permitterem in tuū conuenire conuiuiū, ſed ſolos doctos? Tum Xanthus, Et quales hi, non ne docti? Et Aefopus, Nullo pacto: ipſis etenim paſſantibus ianuā, & me intus rogitante quidnā moyeret cantis, nullus eorū intellexit ſermonem. Ego igitur cum indocti omnes uiderentur, nullū ipſorum inroduxi niſi hunc, qui doctē reſpondit mihi. Sic igitur cū Aefopus reſpondiſſet, rectē omnes dicere ipſum cōfirmarunt. Ac poſt dies rursus aliquot Xāthus ſequēte Aefopo, ad monimenta acceſſit, & quæ in arcis erant epigramata legens ſe ipſum delectabat. At Aefopo in quadam ex ipſis inſculptas literas has uidente. α.β.δ.ε.ζ.η.θ.χ. oſtendenteq; Xantho, atq; rogante, an haſce nouiſſet: diligēter ille ſcrutatus, non potis fuit harum inuenire declarationem, ac ſuſſus eſt dubitare omnino. Tum Aefopus, Si per hanc columnulam, ō here, theſaurum oſtendam tibi, qua re me remunerabis? Et is: Conſide, accipies enim libertatem tuam, atque dimidium auri. tunc Aefopus diſtans à cippo paſſus quatuor, & fodiens, accepit theſaurum, & tulit hero, dicens, Da mihi promiſſum, cuius gratia inueniſti theſaurum. Et Xanthus, Non, ſi & ego ſapiam, niſi & ſenſum literarum mihi dixeris: nam ſcire hoc multò re inuenta mihi pretioſius. Et Aefopus, Qui theſaurum inſodit hic,

Id eſt, recedēs ut uir eruditus literas inſculpiſi: has, quæ & inquirunt, α, & τρωβὰς. β, βύμα. α.δ, τῆς ἀρχῆς. ο.δ.β.ζ.α.ς.ε.ζ.ε.γ.κ.ο.ε.ι.ς.θ.β.η.σ.α.υ.ρ.ο.χ. χ.ρ.ο.ι.ς. Xanthus autem, Quia ita ſolers es, & aſtutus, non accipies tuam libertatem. Et Aefopus, Re-

nuntia

nuntiabo dandum aurum ô domine, regi Byzantinorum: illi enim reconditum est. Et Xanthus, Vnde hoc noscitur? Et ille, Ex literis: hoc enim inquiunt. α, αὐτὸς. β, βασιλεῖ. δ, διοῦσω. ε, εἶδες. θ, θυσανθῶν. χ, χρυσός. Xanthus audiens regis esse aurum, Aesopo ait, Accepto diuidio lucrari, taceto. Et ille, Non tu mihi nunc hoc præbes, sed qui aurum hic infodit. ac quemadmodum, audi: hoc enim dicunt literæ, α, ἀνελόμην. β, βαδίσας. δ, διήλθε. ε, εἶπε. θ, θυσανθῶν. χ, χρυσός. At Xanthus, Venias, inquit, in domum, ut & thesaurum diuidamus, & tu libertatem accipias. Profectus ergo, Xanthus timens Aesopi loquacitatem, in carcerem ipsum iussit injici. Cum abduceretur Aesopus, sic inquit, Huiusmodi sunt promissa philosophorum? non solum enim non accipio meam libertatem, sed & in carcere iubes injici me. Xanthus igitur iussit ipsum solui, & ait ei, Nimirum recte inquis, ut parta libertate, uehementior sis contra me accusator. Tum Aesopus dixit, Quodcunque mihi potes facere, fac malum: omnino uel inuitus liberabis me. Ea uero tempestate huiusmodi res Sami obtigit. Cum publice festum celebraretur, repente aquila deuolans, & publicum rapiens anulum, in serui sinum demisit. Itaque Samii perterriti, cum ob hoc prodigium incidissent in multum moerorem, in unum coacti, coeperunt rogare Xanthum, quod prius ciuium esset, & philosophus, ut sibi iudicium prodigij manifestaret. At ille omnino ambigens, tempus petijt. Profectus igitur domum, tristis erat admodum, & solitudinibus immersus, ut qui nihil iudicare posset. Aesopus uero, moerore Xanthi cognito, audiens ait, Qua causa, ô here, sic persequeris tristari? Mihi committe, uale dicto moerori. Cras in forum profectus dic Samijs, Ego neque prodigia soluere didici, neque

Id est, Redde regi Dionysio quem inuenisti thesaurum aureum.

Id est, Accepti euntes diuidite quæ inuenistis thesaurum aureum.

augurari: sed puer mihi est multarum rerum peritus, ipse uobis quæsitum soluet. Et si ipse consecutus fuero solutionem here, tu gloriam reportabis, tali utēs seruo: sin minus fuero consecutus, mihi soli erit dedecus. Persuusus igitur Xanthus, postero die in theatrum profectus, & astans in medio, iuxta monita Aesopi concionatus est ijs, qui conuenerant. Illi uerò statim rogabāt Aesopum acciri. Qui cum uenisset, staretq; in medio, Samij facie ipsius considerata, deridentes clamabant, Hæc facies prodigium soluet? ex deformi hoc quid unquam boni audiemus? Ita ridere cœperunt. At Aesopus extenta manu silentio petito, inquit, Viri Samij, quid faciem meam cauillamini? non faciem, sed animum respicere oportet: sæpe enim in turpi forma bonum animum natura imposuit. An uos exteriorem testarum formam consideratis, ac non potius interiorem uini gustum? Hæc ab Aesopo cum a idissent omnes, dixerunt, Aesope si quid potes, dic ciuitati. Ille igitur audacter ait, Viri Samij, quoniam fortuna, quæ contentionis studiosa est, gloriæ certamen proposuit domino & seruo: si seruus inferior uideatur domino, uerberibus cæsus abibit: sin autem præstantior, nibilominus & sic uerberibus lacerabitur. Si uos per meam libertatem, loquendi mihi fiduciam indulseritis, ego nūc uobis intrepidè quæsitum narrabo. Tunc populus uno ore clamabat ad Xanthum, Libertate dona Aesopum, obtempera Samijs, largire libertatem eius ciuitati. At Xantho non annuente, Prætor ait Xantho, Si tibi non placet auscultare populo, ego hac hora Aesopum libertate donabo, & tunc tibi æqualis fuerit. Tunc igitur Xanthus necessariò libertatem reddidit, & præco clamauit, Xanthus philosophus liberū Samijs largitur Aesopum, atq; interim finem sermo Aesopi accepit dicentis Xantho, uel inuitus me li

me libertate donabis. Aesopus itaq; libertatem consecutus, stans in medio, ait, Viri Samij, aquila ut scitis, regina autem est. Quoniam autem imperatorium annulum hæc raptum demissu in serui sinum, hoc significare uult quendam ex ijs, qui nunc sunt, regem, uelle uestram libertatem in seruitutem redigere, atq; sanctas leges irritas facere. His auditis Samij mœrore repleti sunt. Sed non multo post tempore & literæ à Crœso Lydorum rege uenerunt ad Samios, iubentes eis ut in posterum tributa sibi penderent: sin minus obtemperassent, ut ad pugnam se pararet. Consultabāt igitur uniuersi. Timuerūt enim subditi fieri Crœso, conducibile tamen esse & Aesopum consulere. Et ille consultus, ait, Cum principes uestri sententiam dixerint de tributo dando obtemperandum esse regi, consilium iam minime, sed narrationem uobis afferam, & sciatis quid conducat. Fortuna duas uias ostendit in uita, alteram libertatis, cuius principium accessu difficile, sed finis planus: alteram seruitutis, cuius principium facile, & accessibile, finis autem laboriosus. His auditis, Samij exclamauerunt, Nos cum simus liberi, serui esse gratis nolumus: & oratorem infecta pace remisserunt. His ergo cognitis, Crœsus decreuit bellū in Samios mouere. Sed legatus retulit, Non poteris Samios debellare, quandiu est apud eos Aesopus, & consilia suggerit. Potes autem magis, ait, ô rex, legatis missis, petere ab ipsis Aesopum, pollicitus eis & gratias alias relaturum, & remissionem iussorum tributurum: tunc fortè poteris eos superare. Crœsus his persuasus, legato misso dedi sibi pctebat Aesopum. Samij autem hunc tradere decreuerunt. Quo cognito, Aesopus in media concione stetit, ac inquit, Viri Samij, & ego permulsi facio ad regis pedes proficisci: uolo autem uobis fabulam dicere.

Quo

De lupis & ouibus.

Quo tempore animalia inter se loquebantur, lupi bellum ouibus intulerunt. Vnà uerò cum ouibus canibus præliantibus ac lupos arcentibus, lupi legato mīſſo dixerunt ouibus, ſi uoluerint uiuere in pace, & nullū ſuſpicari bellum, ut canes ſibi traderent. Ouibꝯ ob ſtultitiā perſuaſis, & canibus traditis, lupi & canes dilacerarunt, & oues faciliſimè occiderūt. Samiꝯ igitur fabulæ ſenſu cognito, decreuerunt apud ſe detinere Aefopum. Ille uerò nō tulit, ſed cum legato unā ſoluit, & ad Cræſum ſe cōtulit. Proſeſtis autem iſſis in Lydiam, Rex ante ſe ſtantem Aefopum uidens, indignatus eſt dicens, Vide qualis homuncio impedimento mihi ad tantam inſulam ſubigendam fuit. Tum Aefopus,

De homine & Cicada.

Maximè rex, non ui, neque neceſſitate coactꝯ ad te ueni, ſed ſponte adſum, ſuſtine autem me parumper audire. Vir quidam cum locuſtas caperet, occideretqꝯ, cepit & cicadam: cum & illam uellet occidere, inquit cicada: O homo, ne me fruſtra occidas: ego enim neqꝯ ſpicam lædo, neque alia in re quapiam iniuria te afficio: motu uero, quæ in me ſunt, membranularum ſuauiſſime canto, delectans uiatores: præter igitur uocem in me amplius nihil inuenies. Ille his auditis permiſit abire. Et ego itaqꝯ, ô rex, tuos pedes attingo, ne me ſine cauſa occidas: non enim poſſum iniuria quenquam afficere, ſed in uili corpore generoſum loquor ſermonem. Rex autem miratus ſimul & miſeratus ipſum, ait, Aefope, nō ego tibi largior uitam, ſed fatum: ergo quod uiſ, pete, & accipies. Et ille, Rogo te, ô rex, reconciliare Samiꝯ. Cumqꝯ rex dixiſſet, reconciliatus ſum, præcedens ille in terram, gratias ei agebat. Et poſt hæc ſuas conſcripſit fabulas, quas in hunc uſqꝯ diem extantes apud regem reliquit. Acceptis autem ab ipſo literis ad Samios, quod Aefopi gratia eis reconciliatus fuerit, atque muneribus multis,

Quando conſcripſerit Aefopus fabulas.

multis, nauigauit in Samum. Samij igitur hunc uidentes,  
 & coronas ei intulerunt, & choreas eius gratia consi-  
 tuerunt. Ille autem & regis literas legit, & ostendit quòd  
 sibi donatam à populo libertatem, libertate rursus remun-  
 neratus fuerit. Post hæc uerò ab insula decedens, circuibat  
 orbem, ubiq; cum philosophis disputando. Profectus & in  
 Babylonem, & suam ipsius doctrinam demonstrando, ma-  
 gnus apud regem Lycerum euasit. Illis enim temporibus  
 reges inuicem pacem habentes, atque delectationis gratia  
 questiones uicissim sophisticas scribendo mittebant: quas  
 qui soluerent, tributa pacta à mittentibus accipiebant: qui  
 uerò non, equalia præbebant. Aesopus igitur quæ mite-  
 bantur problemata Lycero intelligens dissoluebat, & cla-  
 rum reddebat regem, & ipse Lyceri nomine altera idem  
 regibus remittebat: quæ cum remanerent insoluta, tribu-  
 ta rex quàm plurima exigebat. Aesopus autem cum non  
 genuisset filios, nobilem quendam Ennum nomine adopta-  
 uit, atque ut legitimum filium regi allatum, commenda-  
 uit. Non multo autem post tempore, Ennus cum adoptan-  
 tis concubina rem habuit: hoc sciens Aesopus expulsurus  
 erat domo Ennum, qui in illum ira correptus, epistolamq;  
 fictam ab Aesopo scilicet ad eos, qui sophismatis cum Ly-  
 cero certabant, quòd ipsis paratus esset adherere ma-  
 gis, quàm Lycero, regi dedit Aesopi signatam anulo.  
 Rex & sigillo credens, atque inexorabili ira percitus,  
 statim Hermippo iubet, nulla examinatione facta, tan-  
 quam proditorem occideret Aesopum. At Hermippus  
 & amicus fuerat Aesopo, & tunc se amicum ostendit:  
 in sepulcro enim quodam nemine sciente occultauit ho-  
 minem, & secreto nutrit. Ennus autem regis iussu o-  
 mnem Aesopi administrationem suscepit. Quodam post  
 tempo

tempore Neftenabo rex Aegyptiorum audiens Aesopum mortuum esse, mittit Lycero statim epistolam, architectos sibi mittere iubentem, qui turrin ædificent, quæ neq; cœlum, neq; terram attingat, & aliquem qui semper respondeat ad omnia quæcunque rogauerint: quod si fecisset, tributa exigeret: sin minus, solueret. His lectis Lycerus mœrore affectus est, cum nullus ex amicis posset questionem de turri intelligere. Rex uerò & columnam sui regni dicebat interiisse Aesopum. Hermippus autem dolore regis ob Aesopum cognito, adiit regem, & uiuere illum renuntiavit, addiditq; ipsius causa Aesopum non premississe, sciens quod pœniteret aliquando regem sententiæ. Rege autē uehementer his lætato, Aesopus sordens, ac squalens totus, adductus est. Cumq; rex ut eum uidit, illacrymasset, atq; ut lauaretur, aliaq; cura afficeretur, iussisset, Aesopus post hoc & de quibus accusatus fuerat, causas cōfutauit: ob quæ cum rex Ennum esset occisurus, Aesopus ei ueniam petijt. Post hæc autem rex Aegypti epistolam Aesopo dedit legendam. At ille statim solutione cognita questionis, risit, ac rescribere iussit: cum hyems præterisset, missum iri & qui turrin essent ædificaturi, & aliquem qui responderet ad rogata. Rex igitur Aegyptios legatos remisit, Aesopo autem pristinam administrationem tradidit omnem, deditum ei tradens & Ennum. At Aesopus acceptum Ennum nulla in re tristitia affectit, sed ut filium, rursus receptū inter cætera his admonuit uerbis, Fili, ante omnia cole deū:

Præcepta quæ  
dedit Aesopus  
Enno.

Regem honora: inimicis tuis terribilē te ipsum præbe, ne te contemnant: amicis faciliē, & cōmunicabilem, quò longe beneuolentiores tibi sint. Itē inimicos male habere precare & esse pauperes, ne te possint offendere: at amicos in omnibus bene ualere uelis. Semper uxori tuæ bene adhaere,  
ne al



ne alterius utri periculū facere uelit: leue enim mulierum est genus, ac delinitum adulatione minus mala cogitat. Velocem ad sermonem ne posside audium. Linguae continens esto. Bene agentibus ne inuide, sed congratulare: inuidens enim teipsum magis offendes. Domesticorum tuorum satage, ut te, non solum ut dominum timeāt, sed etiam ut benefactorem ueneretur. Ne pudeat discere semper meliora. Mulieri non unquam credas secreta, nam semper armatur quo modo tibi dominetur. Quotidie in diem crastinum reconde: melius enim mortuū inimicis relinquere, quam uiuentem amicorum indigere. Salutato facile, qui tibi occurrunt sciens & catulo caudam panem comparare. Bonum esse ne pœniteat. Susurronem uirum eijs domo tua, nam quæ à te dicuntur, ac fiunt, alijs communicabit. Fac quæ te non mœstificent. Contingentibus ne trislarere. Neq; praua in eas unquam consilia, neq; mores malorum imiteris. His ab Aesopo Ennius admonitus, tum sermone, tum sua conscientia, ut sagitta quadam percussus animum, paucis post diebus è uita discessit. Aesopus autem aucupes omneis accersuit, atq; aquilarum pullos quatuor ut caperent, iubet: sic itaq; captos nutriuit, ut dicitur, ac instruxit (cui rei non magnā fidem adhibemus) ut pueros in sportis ipsis appensis gestando in altum uolarent, atque ita obedientes pueris essent, ut quocunq; illi uellent, uolarent, siue in altum, siue in terram deorsum: præterito uerò hyemali tempore, ac Vere arridente, cum ad iter omnia parasset Aesopus, & pueros accepisset, & aquilas, decessit in Aegyptum, multa imaginatione, & opinione ad stupefactionem illorum hominum usus. Sed Neftenabo audito adesse Aesopum, Insuper dijs circumuentus sum, inquit amicis, quia intellexerā Aesopum mortuum esse. Postridie autem iussit rex, ut omnes

c magist

magistratus candidis circumdarentur uestibus: ipse igitur induit, & coronam, ac gemmatam xtragyn. Cumq; sedes in alto folio, Aesopum introduci iussisset, Cui me asinus (ingredienti inquit) Aesope, & eos qui mecum sunt? Et ille, Te quidem, Soli uerno: qui uerò te circūstant, maturis aristis, & rex admiratus ipsum, & donis cum prosecutus est. Posterò autem die rursus rex candidissimam togam indutus, amicis purpuras iussis accipere, ingredientem Aesopum iterum rogauit. Et Aesopus, Te, inquit, cōparo Soli: hos autē qui stant circum, radijs solaribus. Et Nestenabo, Puto nihil esse Lycerum præ meo regno. Et Aesopus subridens, Ne facili de illo sic loquere, ô rex: nam gēti uestre uestrum regnum collatum, instar Solis lucet: at si Lycero comparetur, nihil aberit quin splendor hic, tenebræ appareant. Et Nestenabo apposita uerborum responsione stupefactus, Attulisti nobis, ait, qui tarrim ædificent? Et ille Parati sunt, si modò ostēdas locum. Postea egressus extra urbem rex in planiciem, ostendit dimensum locum. Adductis igitur Aesopus ad ostēsos loci angulos quatuor aquilis unā cum pueris per sacculos appensis, ac puerorum manibus datis fabrorum instrumentis, iussit euclarc: illi uerò sublimēs, Date nobis, clamabāt, lapides, date calcem, date ligna, & alia, quæ ad ædificationem apta sunt. Sed Nestenabo uisis pueris ab aquilis in altum sublati, ait, Vnde mihi uolucres homines? Et Aesopus, Sed Lycerus habet: tu autem homo cum sis, uis cum æquo dijs regi contendere. Et Nestenabo, Aesope uictus sum: percontabor autem te, tu responde. Et ait, Sunt mihi fœminæ hic equæ, quæ cum audierint eos, qui in Babylone sunt, equos hinnientes, statim cōcipiunt. Si tibi ad hoc est doctrina, ostēde. Et Aesopus, Respondebo tibi cras, ô rex. Profectus uerò, ubi hospitabatur, sclem

selem iubet pueris comprehendere, & captum publicè circumduci uerberando. Aegyptij autem illud animal colentes, cum sic ipsum male tractari uiderent, concurrerunt, & selem è manu uerberantium eripuerunt, ac rem celestiter renuntiarent regi. Qui uocato Aesopo, Nesciebas, inquit, Aesope, tanquam Deum à nobis coli selem? quare igitur hoc fecisti? At ille, Lycerum regem iniuria affecit, ô rex, præterita nocte hic felis. Gallum enim eius occidit pugnacem, & generosum, præterea & horas ei noctis nuntiantem. Cui rex, Non pudet te mentiri Aesope? Quoniam modo una nocte felis ab Aegypto iuit in Babylonem? Tum ille subridendo inquit, Et quo modo, ô rex, Babylonē equis hinnientibus, hic equæ foemina concipiunt? Rex autem his auditis, prudentiam Aesopi felicem esse dixit. Post hæc autem cum acciussset ex Heliopoli uiros quæstionum sophisticarum peritos, atque de Aesopo cum eis disputasset, inuitauit unum cum Aesopo ad cōuiuium. Discumbentibus igitur ipsis, quidam Heliopolita inquit Aesopo, Missus sum à Deo meo quæstionem quandam rogeturus te, ut ipsam solueres. Cui Aesopus, Mentiris, Deo enim ab homine nihil opus est discere: tu autem non solum te ipsum accusas, sed Deum tuum. Alius rursus ait, Est templum ingens, & in ea columna, duodecim urbes continens, quarum singule triginta trabibus fulciuntur, quas circuncurrunt duæ mulieres. Tum Aesopus ait, Hanc quæstionem apud nos soluent & pueri. Templum enim est hic mundus: Columna, annus: Urbes, menses: Et trabes, horum dies. Dies autem & nox, duæ mulieres, quæ uicissim sibi succedunt. Postridie conuocatis amicis omnibus, Nestenabo inquit, Propter Aesopum hūc debebimus tributa regi Lycero. At ex his unus ait, lubebimus ei quæstiones dicere

nobis ex ijs, quæ neq; scimus, neq; audiuius. Et ille, Cras hac de re uobis respondebo. Decedens igitur, & composito scripto in quo continebatur, Neclenabo confitens nulle talenta Lycero debere, mane reuersus Regi scriptum reddidit. Regis autem amici priusquam aperiretur scriptum omnes dixerunt, Et scimus hæc, & audiuius, & uerè scimus. Et Aesopus, Habeo uobis gratiam restitutionis causa, At Neclenabo confessione debiti lecta ait, Me nihil Lycero debente, omnes uos testificamini? Illi mutati dixerunt, Neq; scimus, neq; audiuius. Et Aesopus, Si hæc ita se habent, solutum est quæsitum. Ad hæc Neclenabo, Felix est Lycerus, talem in regno suo doctrinam habens. Ergo pacta tributa tradidit Aesopo, atq; in pace remisit. At Aesopus in Babylonem profectus, narrauit Lycero acta in Aegypto omnia, & tributa reddidit. Lycerus autem iussit statuam auream Aesopo erigi. Non multo autem post tempore, Aesopus in Græciam decreuit nauigare, cõpositioneq; cum rege facta, discessit, iuratus ei prius proculdubio rediturum se in Babylonem, atq; illic reliquum uitæ uicturum. Peragratia autem Græcis urbibus, & sua doctrina patefacta, peruenit & Delphos: uerum Delphi differentē quidem audierunt libenter, sed honore, & obseruantia cum affecerunt nulla. Is autem ad eos suspiciens ait, Viri Delphi, succurrit mihi ligno uos comparare, quod in mari fertur: illud etenim procul uidentes dum fluctibus agitur, magni pretij esse existimamus, postquam autem proxime aduenit, uilissimum apparet. Et ego itaq; cum procul essem ab urbe uestra, ut eos, qui existimatione digni sunt, uos admirabar: nūc autem ad uos profectus, omnibus, ut ita dixerim, inueni inutiliores, sic deceptus sum. Hæc cum audiuisent Delphi, & timerent ne aliquo modo Aesopus ad alias urbes

urbes accedens male de se diceret, decreuerūt dolo hominem occidere. Auream igitur phialam ex eo, quod apud se erat, sacello Apollinis accipientes, clam in Aesopi absconderunt stratis. Cum Aesopus uerò ignoraret quae ab ipsis dolo facta fuerant, egressus ibat in Phocidē. At Delphi aggregsi, & detinentes ipsum, percontabantur ut sacrilegum. Illo autē negante aliquid fecisse eiusmodi, illi ui stratis euolutis auream inuenerunt phialam, quam etiam acceptam omnibus ciuibus ostenderunt nō cum paruo tumultu. Igitur Aesopus cognitis illorum insidijs, rogauit eos, ut solueretur. Hi autem non solum non soluerunt, sed ut sacrilegum in carcerem quoq; iniecerunt, morte eius suffragijs decreta. Aesopus autem cū nulla astutia à mala hac fortuna liberari posset, seipsum in carcere lugebat sedens. Ex familiaribus autem ipsius quidam, Damas nomine, ad ipsum ingressus, & uidens eum sic lamentari, causam rei rogauit. Ille ait, Mulier quēdam cū recenter suum uirum sepeliiisset, quotidie profecta ad tumulum, plorabat. Arans autem quidam non procul à sepulcro, amore captus est mulieris, & derelictis bobus, iuit & ipse ad tumulum, ac sedens unā cum muliere plorabat. Cū illo rogaret cur' nam & ipse sic lugeret: Quoniam & ego, inquit, decētem mulierem sepelui, & posteaquā plorauero, mortitia leuor. Illa autem, Mihi id ipsum similiter accidit. Et ille, Si igitur in eadem incidimus mala, cur' nam inuicem non coniungimur? ego etenim amabo te, ut illam: & tu me rursus ut tuū uirum. His persuasit mulieri, & conuenerunt: interim autem fur profectus, & boues soluens, abegit. Ille autē reuersus, non inuentis bobus, & plangere, & lugere uehemēter instituit. Profecta est & mulier: & lamentantem inueniens inquit, Iterum ploras? Cui ille, Nūc, ait, uerē ploro. Et ego

itaq; multis euitatis periculis, nunc uerè fleo, solutionem mali necunde inueniens. Post hæc affuerunt & Delphi, & extractum ipsum è carcere trahebant in præcipitium. Ille autem eis dicebat, Quando colloquebantur animalia bruta, mus ranae amicus factus, ad coenam eam inuitauit, & abducta in penarium diuitis, ubi multa edulia erant, Comede, inquit, amica rana. Post epulationem & rana murem in suam inuitauit coenationem. Sed ne defatigare, inquit, natando, filo tenui tuum pedem meo alligabo. Atque hoc facto saltauit in paludem. Ea autem urinata in profundum, mus suffocabatur, & moriens ait, Ego quidem per te morior, sed me uindictabit maior. Supernatante igitur mortuo mure in palude, deuolans aquila hunc arripuit unà cum eo etiam appensam ranam: sicq; ambos deuorauit. Et ego igitur, qui ui per uos morior, habebo ultorem. Babylon enim & Græcia omnis meam à uobis exigent mortem. Delphi tamen ne sic quidem pepercerunt Aesopo. Ille autem in Apollinis confugit sacellum, sed ij & illinc extraxerunt irati, & in præcipitium rursus traxerunt. Aesopus cum abduceretur, dicebat, audite me Delphi, Lepus aquila insectante in lustrum scarabei confugit, rogans ut ab eo seruaretur. Scarabeus autem rogabat aquilam ne occideret supplicem, obtestās ipsam per maximum Iouem, saltem ne despiceret paruitatem suam. Illa uerò irata, ala percutiens scarabeum, leporem raptum depasta est. Scarabeus autem cum aquila uoluit, ut nidum eius disceret, ac iam profectus oua eius deuoluta dirupit. Illa cum graue existimaret si quis hoc ausus fuisset, & in altiore loco secundo nidificasset, & illic rursus scarabeus ipsdē hanc affecit. Aquila autem inops consilij penitus, ascendit ad Iouem (in eius enim tutela esse dicitur) & in ipsius genibus ter-

tiam

tiam facturam ouorum posuit, deo ipsa cōmendās, & sup-  
plicans ut custodiret. At scarabeus e stercore pilula facta,  
ascendit, & in sinū Iouis eam demisit. Iupiter assurgens ut  
finium excuteret, & oua abiecit oblitus, quæ & contriuit  
deiecta. Sed cum didicisset à scarabeo, quod hæc fecisset ut  
aquilam ulcisceretur (nō enim scarabeū tantum illa affecit  
iniuria, sed & in Iouē ipsum impia suū) aquila reuersa ait,  
scarabeum esse qui affecit mœrore, & certē iure affecisse.  
Nolens igitur aquilarum genus deficere, consulit scarabeo,  
ut aquilæ recōciliaretur. Cū hic nō paruisset, ille in aliud  
tempus transposuit aquilarum partum, cū nō appareant  
scarabei. Et uos igitur o uiri Delphi, ne despiciat hunc deū,  
ad quem profugi: & si paruum sortitus est delubrum, neq;  
enim impios negliget. Delphi uerò hæc parum curantes,  
rectā ad mortem itidem ducibāt. Aesopus nulla re a se di-  
cta uidens eos flecti, rursus ait, Viri crudeles, & interfe-  
ctores audite. Agricola quidam in agro cōsenuit: cū nun-  
quam ingressus esset in urbē, precabatur domesticos ut eam  
uideret. At illi iunctis asellis, atq; in currum eo imposito,  
solum iusserunt agere. Eunti autem procella & turbine æ-  
rem occupātibus, & tenebris factis, aselli à uia aberrātes,  
in quoddam præcipitiū deduxerūt senem. At ille iam præ-  
cipitandus, O Iupiter, ait, qua in re te iniuria affeci, quod  
sic iniquè occidor, præsertim cū neq; ab equis generosis,  
neq; à multis bonis, sed ab asellis uilissimis? Et ego itaq; eo-  
dem nodo nunc tristior, quoniam non ab honoratis uiris, &  
elegantibus, uerū ab inutilibus, & pessimis interficior.  
Iamq; præcipitandus, eiusmodi dixit rursus fabulam: Vir  
quidam suam deamans filiam, rursus misit uxorem, solam autē  
filiam receptam uiolauit. Illa autem, Pater, ait, scelestā facis,  
optarem tamen à multis potius uiris de decore hoc affici,

quàm à te, qui genuisti. Hoc nūc & in uos, ô iniqui Delphi dico quòd eligerem in Scyllam, & Charybdim potius incidere, ac in Africæ Syrteis, quàm per uos iniuste atq; indignè mori: execror igitur uestram patriam, & deos testor, me præter omnem iustitiam interire, qui me ulciscuntur ex auditum. Præcipitem igitur ipsum dederunt de rupe, & mortuus est. Non multo post autem pestilentia laborantes, oraculum acceperunt expiandam esse Aesopi mortem. Cui quòd & conscij sibi essent, iniuste eum interfecisse, etiam cippum erexerunt. Sed primates Græciæ, ac doctissimi quique, cum & ipsi quæ in Aesopum facta fuissent, intellexissent, Delphos profecti sunt, & cum illis habita inquisitione, ultores & ipsi Aesopi mortis fuerunt.

AESOPI VITAE FINIS.

EX APHTHONII SOPHISTAE EXERCITAMENTIS.

Fabula quid  
& quotuplex.

**F**abula profecta quidem est à poetis, sed & rhetoribus communis facta est admonendi gratia. Est autem fabula sermo fictus, imagine quadam representans ueritatem. Atque alia Sybaritica, alia Cilix, alia Cypria dicitur, accepto ab inuentoribus nomine. Verum quoniam Aesopus egregie præter ceteros conscripsit fabulas, enicit ut potius Aesopia diceretur. Ea uerò est triplex, Rationalis, Moralis, Mistra. Rationalis, in qua aliquid ab homine geri confingitur. Moralis, quæ eorum imitatur mores, quæ sunt rationis expertia. Mistra uerò, quæ rationale irrationaleq; complectitur. Eam autem admonitionem, cuius causa fabulam constitueris, Antefabulationem præpositam, postpositam uerò, Affabulationem dices.

FABVL



FABVLA, QVA FORMICA-  
rum & Cicadarum exemplo hortantur  
iuuenes ad laborem.

Cicadae olim etate assiduis cantibus indulgebant, formicae uero hyemis memores, laboribus fructibusq; colligendis operam dabant. Verum cum hyems aduenisset, formicae ijs quae collegerant, pascebantur. cicadas autem delectatio illa, & canendi uoluptas, eò indigentiae, miseriaq; perduxit, ut esurirent omnes, & fame conficerentur. Sic iuuentus laborum fugitans, male habet in senectute.

EX PHILOSTRATI  
imaginibus, Fabulae.

Fabulae se ad Aesopum, sua in eum beneuolentia conferunt, quòd satagat sui. Fabula quippe & Homero, & Hesiodo, nec non & Archilocho in Lycamben curae fuit. Sed ab Aesopo humana omnia ad fabellas redacta sunt, sermone brutis nò temere impertito: nam & cupiditatem tollit, & libidinem insectatur, & fraudem. Atq; haec ei leo quispiam agit, & uulpes, & per Iouem equus: nec testudo muta: ex quibus pueri discunt, quae in uita gerantur. Habentur igitur in pretio fabulae propter Aesopum. accedunt ad ianuam docti huius, uittis eum deuincturae, coronaq; oleagina coronaturae. hic, ut puto, fabulam aliquam textit: risus enim faciei, & oculi in terram defixi id praeseferunt. Pictorem, fabularum curas remissione animo indigere, non latuit. Philosophatur autem pictura & fabularum corpora. Bruta enim cum hominibus cōferens, coetum circa Aesopum statuit ex illius scena confictum, Chori dux uulpes depicta est. Utitur enim ea Aesopus ministra argumentorum plurium, ceu Dauo Comœdia.

A E S O P I  
EX HERMOGENIS EXER-  
citamentis, Prisciano interprete.

**F**abula est oratio ficta, uerisimili dispositione imaginē exhibens ueritatis. Ideo autem hanc primam tradere pueris solent Oratores, quia animos eorum adhuc molles ad meliores facile uias rite instituunt. Vbi sunt ea tamen uetustissimi quoque autores, ut Hesiodus, Archilochus, Horatius. Hesiodus quidem Iuscinia, Archilochus autem uulpis, Horatius muris. Nominantur autem ab inuentoribus fabularū, alia Aesopie, alia Cypriae, alia Libycae, alia Sybariticae, omnes autem cōmuniter Aesopie dicuntur, quoniam in conuentibus frequēter solebat Aesopus fabulis uti. Mendacem quidem esse nolunt fabulam sed ad uitam utilem, necnon et uerisimilem. Est autem uerisimilis, si res, quae subiectis accidunt personis, apte reddantur: ut puta de pulchritudine aliquis certat, panno supponatur hic. Oportet alicui astutiam tribuere, uulpecula est subiicienda. Imitatores aliquos hominum uolumus ostendere, hic Simijs est locus. Oportet igitur modò breuiter, modò latius eas differere. Quomodo autem hoc fiet? Si nunc narratione simplici proferantur, nunc etiam sermo inductis fingatur personis. Exempli causa, Simiae conuenerunt, et consilium habuerunt de urbe condenda: et quia placuit illis, paratae erant incipere aedificationem, sed uetus Simia prohibuit ab incepto, eas docens, quòd facile capiantur, si intra muros concludantur: sic breuiter dices. Si uelis producere, sic: Simiae conuenerunt, et consiliabantur de urbe condenda, quarum una in medium ueniens concionata est, quia oportet ipsas quoque ciuitatem habere. Videtis enim, aiebat, quòd ciuitatem habendo felices homines sint, domos etiam habent singuli, et in concionem uniuersi, et in theatrum ascend

ascendentes delectant animos spectationibus, & auditionibus uarijs. Et sic proferes orationem in orando, dicēs, quòd & plebiscitum scriptum est, & finges etiam orationem ueteris simiæ. Expositio autem fabularum uult circuiuionibus carere, & iucundior esse. Sed oratio, qua utilitas fabulæ retegitur, quam ἐπιμυθίον uocant, quod nos affabulationem possumus dicere, à quibusdam prima, à plerisque rationalius postrema ponitur. Sciendum uerò, quòd etiam oratores inter exempla solent fabulis uti.

# LAURENTIUS

VALENSIS INSIGNI

uiro Arnoldo Fouelledæ

salutem.



**P**ROMISERAM nuper, me tibi coturnices, quas ipse uenatus essem, missurum. Eas capere (ut homo uenandi insuetus): um non possem, ad uenationē meam, id est, ad literas me conuerti. Ut fortè ad manus uenit libellus Græcus ex præda nauali, tres & triginta Aesopi fabulas continens, has omnes bidui labore uenatus sum. Mitto igitur ad te, siue fabellas, siue maui coturnices, quibus oblectare te possis ac ludere. Etenim si Octauianum, Marcumq; Antonium, orbis terrarum principes, ludo coturnicum delectatos accepimus: profectò tu uir literarum amantissimus, & literato hoc genere ludendi delectaberis. Et si quis Octauiano aut Antonio pugnacem aliquam harum auium dono dedisset, iucundam illis rem, gratamq; fecisset: ego quoque tibi iucundus, gratusq; ero, qui plures triginta eius generis aues dono mitto

mitto, pugnaces, uictrices, & (si fortè magis hoc te iuuat) etiam pingues. Oblectant enim hæ fabellæ, & alunt, nec minus fructus habent, quàm floris. Sed ne domum suam laudare insolentis sit, finem faciam. Tu si coturnices ueras, quàm has fabellas, malis, rescribe. Mittam nanque non modò coturnices, sed etiam perdices. Ex urbe Caieta Calendis Maij, M. CCCC. XXXVIII.

## DE VULPE ET CAPRO.

**V**ulpes & caper subundi in puteum quendam descendunt: in quo cum perbibissent, circumspectanti capro redditum, uulpes ait, Bono animo esto caper: excogitavi namq; quo pacto uterque reduces sinus. Si quidem tu eriges te rectum primoribus pedibus ad parietem admotus, cornuaq; adducto ad pectus mento, reclinabis: & ego per terga cornuaq; tua transiliens, & extra puteum euadens, te istinc postea educam. Cuius consilio fidem habente capro, atq; ut illa dicebat, obtemperante, ipsa è putco resiliit: ac deinde præ gaudio in margine putci gestiebat exultabatq; nihil de hirco curæ habens. Cæterum cum ab hirco ut fœdis fraga incusaretur, respondit: Enimuero hirce, si tantum tibi esset sensus in mente, quantum est setarum in mento, non prius in puteum descendisses, quàm de reditu exploratum habuisses. Adfabulatio.

Hæc fabula innuit uirum prudentem debere finem explorare, antequàm ad rem agendam ueniat.

## DE VULPE ET PARDO.

**V**ulpes & pardus de pulchritudine altercabantur: & pardo suam pellem uersicoloremi extollente, uulpes suam cum non posset præponere, inquit, At quāto ego speciosior, quæ non corpus, sed animū uersicolorē sortita sum.

Adfabulatio. Hæc fabula innuit pulchritudinem animi

*animi antecellere pulchritudinem corporis.*

DE CATA ET VENERE. 3

**C**Ata quædam delictum erat cuiusdam formosi adulescentis. Hanc ille, ut in sceminam mutaret, Venerem comprecatus est. Dea miserta cupiditatis adulescētuli, conuertit bestiam in speciosam puellam. Cuius forma inardescens adulescentulus, adducit illam secum domum. Quibus confidentibus in cubiculo, Venus uolens periculum facere nunquid illa cum corpore mutasset & mores, murem in medio dimisit. At illa, eorum qui aderant & cubiculi nuptialis immemor, è cubili consurgens, murem insequatur, illum comedere cupiens: tum dea indignata, eam iterum in suam restituit naturam. Adfabulatio.

*Hæc fabula innuit scelestos homines etiam si conditionem statumq; mutant, tamen mores nequaquam mutare.*

DE AGRICOLA ET FILIIS EIVS. 4

**A**gricola filios suos uidens quotidie digladiantes, neq; in gratiam reducere potis esset: iussit fasciculum uirgarum sibi afferri (adcrant autem filij illic sedentes) quæ cum allatæ essent, colligauit omnes in unum fasciculum: iussitq; singulos eorum fasciculum capere atque confringere. Illis uerò confringere non ualentibus, soluens postea fasciculum, tradidit singulas uirgas eis frangendas: atq; illis statim frangentibus, intulit. Ita quidem & uos ô filioli mei, si unanimes inuicem perstiteritis, inexpugnabiles uos hostibus inuictosq; præbebitis: sin minus, uestra ipsa emulatio atq; seditio, opportunam uos prædam inimicis faciet.

Adfabulatio.

*Hæc fabula innuit, æquè res humanas capere, uel à concordia incrementum, uel à discordia iacturam.*

DE MULIERE ET GALLINA. 5

Mulier

**M**ulier quædam uidua habebat gallinam quotidie singula oua ponentem. Sperans autem mulier, pro singulis bina oua posituram, si plus escarum tribuisset, opipare educabat. Gallina uero pinguior effecta, ne unum quidem ouum amplius facere poterat. Adfabulatio.

Hæc fabula innuit, quod homines per luxum rerum & copiam marcescentes, ab instituta industria retardantur.

DE DVOBVS ADVLESCENTIBVS. 6

**D**vo adulescentes obsonium à coquo communiter mercati sunt. Cæterum cum coquus quibusdam negotijs domesticis intenderet, uacaretq;: alter adulescentum partem obsonij in alterius manus immisit. Conuertente autem se coquo, & partem carnis, quæ aberat, requirẽte, qui carnem sustulerat, iurat se nõ habere: qui uerò habebat, se non sustulisse. Quibus coquus (intellecta adulescentum argutia) inquit, Et si me latet fur: tamen eum quem iurastis, non latebit. Adfabulatio. Hæc fabula innuit, quod si quid homines cclamus, Deum tamen nequaquam celare poterimus, qui solus omnia prospicit & omnia uidet.

DE DVOBVS AMICIS ET VRSO. 7

**D**vobus amicis unà iter facientibus sit ursus obuiam, quorum unus perterritus, in arborem scandens, latuit: alter uerò, cum se imparem urso fore, & si pugnaret, superatum iri intelligeret, procidēs simulabat se mortuum esse. Ursus uerò adueniens: & aures & occiput eius olfactiebat, illo, qui stratus iacebat, uisquequa; continente respirationem. Ita mortuum esse credens ursus, abiit. auiunt enim non sentire in cadauera. Mox alter, qui inter frondes arboris latuerat, descendens, interrogat amicum quidnam ad aurem ursus esset secum locutus. Cui amicus inquit, Admonuit me ne posthac cum huiusmodi amicis iter faciam.

Adfab

## Adfabulatio.

*Fabula hæc innuit, deuitandos esse amicos, qui periculo in tempore auxilio præstando reuocant pedem.*

DE ARVNDINE ET OLEA. 8

**D**isceptabant aliquando arundo & olea, de constantia & fortitudine, & de firmitate. Et olea quidem arundini probra ingerebat, ut fragili, & ad omnem uentum uacillanti. Arundo autem obticebat, non longum tempus spectans. Nam cum uentus uehemens ingruisset, arundo reflectebatur, agitabaturq; Olea uero cum uiolentiæ uentorum reluctari uellet, con fracta est. Adfabulatio.

*Hæc fabula innuit, eos qui fortioribus ad tempus cedunt, potiores esse ijs qui non cedunt.*

DE TUBICINE. 9

**E**rat tubicen quidam, qui in militia signum caneret: is interceptus ab hostibus, ad eos, qui circumstitebant, proclamabat, Nolite me uiri innocentem, innocuum, infontemq; perimere, nullum enim unquam occidi: quippe nihil aliud quam hanc buccinā habeo. Ad quem illi uicissim cum clamore responderunt, Tu uero hoc ipso magis trucidaberis, quod cum ipse dimicare nequeas, ceteros potes ad certamen impellere. Adfabulatio. *Fabula hæc innuit quod præter ceteros peccant, qui malos & importunos principes persuadent ad iniquè agendum.*

DE CANE ET LANIO. 10

**C**anis quidam insiliit in macellum, lanio in aliqua re occupato, & arrepto pecoris corde fugiebat. Ad quē lanius conuersus, fugientemq; aspiciens, inquit, O canis abi: ubiqueq; fueris, te obseruabo: non enim mihi cor sustulisti sed cor dedisti. Adfabulatio. *Hæc fabula innuit, iacturam frequenter esse hominibus doctrinam.*

DE

**A** Egrotus quidam à medico interrogatus, quonam modo se habuisset: præter modum, respondit in sudorem se fuisse resolutum. Cui medicus, istud (inquit) bonum est. Altero autem die interrogatus quomodo se haberet, respondit, Algoribus correptus, diu uexatus sum. Et istud (inquit medicus) bonum est. Tertiò cum de eodem interrogaretur, respondit, Profluuiò corporis debilitatus sum. Istud (inquit) etiam bonum est. Postea autem à familiari interrogatus, Quo modo habes ô amice? Respondit, Ego etiam atque etiam bene habeo, sed morior. Adfabulatio.

*Hæc fabula innuit, coarguendos assentatores.*

**A** Sinus calcato ligni aculeo claudicabat: conspectoq; lupus, ait, O' lupe, en præ cruciatu morior, futurus esca aut tua, aut uulturum, aut coruorum. Vnum modò munus abs te flagito: educ prius ex pede aculeum, ut moriar saltem sine cruciatu. Tunc lupus summis dentibus aculeum mordicus deprehendens, eduxit. Asinus uerò doloris oblitus, ferratos calces in faciem lupi impegit: fractisq; illius fronte, naribus, & dentibus, aufugit: lupo seipsum accusante, ac meritò sibi id euenisse dicente: quòd qui didicerat esse lanius iumentorum, nunc eorum uolebat esse chirurgus.

*Adfabulatio. Hæc fabula innuit, quòd qui sua artificia deferunt transferentes se ad aliena, ipsis non apta, & in derisum ueniunt, & in discrimen.*

**P**ASTOR in loco maritimo gregem pascebat: qui cum uideret mare tranquillum, incesit cupido nauigationem faciendi. Itaq; uenundatis ouibus, emptisq; palmarum sarcinis, nauigabat. Orta autem uehementi tempestate, & na-



ui mergi periclitante, omne pondus nauis in mare eiecit, uixq; euasit exonerata naui. Paucis post diebus, ueniente quodam & tranquillitatem maris admirante (erat enim sanè tranquillum) respondens, inquit, Palmas iterum uult, quantum intelligo: ideoq; immotum sese ostendit.

Adfabulatio. Hæc fabula innuit eruditiores fieri homines damno, atq; periculo.

## DE VULPE ET LEONE. 14

Vulpes nullum antea leonem conspicata, cum illi aliquando obuissset, ita conspectum eius expauit, ut parum abfuerit quin extingueretur. Quod cum postea iterum accidisset: ad conspectum quidem leonis exterrita est, sed non ita ut prius. Tertio cum leonem eundem uidisset in ciuitate, non modò non exterrita, sed confidenter adiens, secum colloquuta est & confabulata. Adfabulatio.

Hæc fabula innuit, quòd consuetudo & conuersatio facit, ut quæ maximè horribilia & formidolosa sunt, neque horrida, neq; formidolosa uideantur.

## DE GALLIS ET PERDICIB. 15

Gallus quidam domi suæ cum haberet, mercatus est & perdicem, eamq; in societate gallorum dedit unà cum illis saginandam. Eam uerò statim galli, pro se quisq; mordebant, abigebantq;. Perdix autem apud se afflictabatur: existimans, ideo talia sibi à gallis inferri, quòd suum ab illorum genere alienum esset. Vbi uerò non multo post aspexit & illos inter se pugnantes, mutuoq; percutientes: recreata à mœrore & tristitia, inquit, Equidem uerò posthac ego non afflictabor amplius, uidens eos etiam inter se dimicantes. Adfabulatio.

Hæc fabula innuit, uirum prudentem debere æquo animo ferre contumelias ab alienigenis illatas, quos uidet ne  
d à dom

à domesticorum quidem iniurijs abstinere.

DE VULPE ET CAPITE QVODAM. 16

**V**ulpes aliquando in domum citharædi ingressa: dum omnia instrumenta musica, omnem suppellectilē scrutaretur: reperit ē marmore caput lupinum, sciēter fabreq; factum. Quod cū in manus sumpisset, inquit, O caput cum magno sensu factum, nullum sensum obtinens.

Adfabulatio. Hec fabula ad eos spectat, qui corporis dignitatem habent, animi industriam non habent.

DE CARBONARIO ET FVLLONE. 17

**C**arbonarius cōductus in domo habitans, inuitavit fulconem, qui eo loci proximē uenisset, ut eisdem in edibus unā habitarent. Ad quem fullo, O homo, non est mihi istud factū conducibile: Vereor enim ne quicquid ipse candefacerem, id omne tu carbonaria aspergine fuscāres.

Adfabulatio. Fabula hæc innuit, nullum cum flagitiosis habendum esse commercium.

DE HOMINE GLORIOSO. 18

**V**ir quidam aliquando peregrinatus, cū iterum domum redisset: cū multa ardua in diuersis regionibus à se uiriliter gesta iactabundus prædicabat: tum uerò illud maxime, quod Rhodi omnes certamine salendi superasset: eiusq; rei Rhodios, qui affuerunt, testes esse. Ad quem unus assistentium respondens, inquit, O homo, si uerum est quod loqueris, quid tibi opus est testibus? Ecce Rhodus, ecce hic certamen salendi. Adfabulatio.

Hec fabula innuit, quòd ubi rerum testimonia adsunt, nihil opus est uerbis.

DE HOMINE ET APOLLINE. 19

**Q**uidam facinorosus Delphos se contulit, Apollinem tentaturus, habensq; passerulum sub pallio, quem pugno

pugno tenebat. Accedēsq; ad tripodas, interrogabat Deū, dicens: Quod habeo in dextera, uiuū ne, an mortuum est? Prolaturus passerulum uiuum, si mortuum respondisset: rursus prolaturus mortuum, si uiuum respondisset. Occidisset enim statim sub pallio, priusquā proferret. At Deus subdolam calliditatem hominis intelligens, dixit, O consultor, utrū mauis facere (penes te nanq; arbitrium est) facito: & siue uiuum, siue mortuū quod in manu habes, proferito.

Adfabulatio. Fabula hæc innuit mentem diuinam nihil neque latere, neque fallere.

## DE PISCATORE ET CINARIDE. 20

Piscator quidam demissis in mare retibus, detulit cinaridem pusilli corporis: quæ piscatorem sic obsecrabat, Noli me in præsentiarum capere pusillam & minutam: sine abire & crescere ut postea iam adulta, commodo cum maiore potiaris. Cui piscator, Ego uerò amens sim, si lucrum quod inter manus habeo (licet exiguum) prætermittam spe futuri boni quantum habet magni.

Adfabulatio. Hæc fabula innuit stolidum esse, qui propter spem maioris, rem & præsentem & certam (licet paruam) non amplectitur.

## DE ASINO ET EQVO. 21

Vir quidam habebat equum & asinum. In itinere faciendo, inquit asinus equo, Si me saluum uis, leua me parte oneris mei. Equo illius uerbis non obsequente, asinus sub onere cadens, moritur. Tunc dominus iumentorum omnes quas portabat asinus sarcinas, simulq; corium, quod à mortuo exuerat, equo imponit. Quo onere depressus equus cum clamore inquit, Væ mihi iumentorum infelicissimo, quid mihi misero euenit? Nam recusans partem, nunc totum onus porto, & illius corium. Adfabulatio.

d 2 Hæc

*Hec fabula innuit maiores debere in laboribus participes esse minoribus, ut utriq; incolumes sint.*

DE HOMINE ET SATYRO. 22

**V**ir quidam cum satyro amicitiam inierat. Qui cum edendi gratia sederent, exorta coeli tempestate, uir manus ad os admoües, anhelitu refocillabat. Quod intuens satyrus, interrogat quam ob rem id faceret. Ille inquit, calore oris argentes manus refocillo. Pauloq; pôst, calidiore edulio allato, cum uir iterum manus ad os admoüens, calorem cibi tenui inspiratione refrigerauit, interrogat satyrus, quam ob rem & illud faciat. Respondente autem uiro, ut refrigeraret eduliũ: Atqui ego, inquit satyrus, tecum posthac amicitiam non exercebo, qui ex uno ore & calidum promis & frigidum. Vale. Adfabulatio.

*Fabula innuit deuitandam eius amicitiam esse, cuius anceps uita est, & non simplex sermo.*

DE AGRICOLA, ET CANIBVS. 23

**A**gricola quidam hyberno sydere in agro deprehensus, deficientibus cibarijs, primum interfectis singulis ouibus, illarum carnibus uescebatur, mox & caprarum, postremò operarijs bobus interemptis alcbatur. Quod canes dum animaduertissent, inter se colloquuti sunt, dicentes, At nos hinc faciamus fugam. Si enim operarijs bobus dominus non pepercit, nec nobis quidem parcat.

*Adfabulatio. Hec fabula innuit, fugiendos cauendosq;, qui à familiaribus manus non abstinent.*

DE QVODAM ADMORSO A CANE. 24

**A**dmorsus quidam à cane, circuibat singulos, corrogans curationem: nactusq; quendam est, qui cognita mali qualitate, inquit, Si tu quidem ô homo cõualescere uis, crustam panis madafactam in sanguine uulneris, porrige cani,

cani, qui te momordit comedēdam. Cui ille deridenter inquit, Ego mehercle, si illud fecero, dignus sum qui ab omnibus huius urbis canibus præmordear. Adfabulatio.

Hæc fabula innuit, improbos homines cum maximè beneficia acceperint, tum maximè ad maleficia animari.

DE THYNNO ET DELPHINO. 25

**T**hynnus cum Delphinum insequentem præcipiti cursu fugeret, & iam capiendus esset, in anfractum quēdam se intorsit. Delphinus quoq; ad alterum similem impetu ipso allisus est. Ad quem Thynnus respiciens, cumq; expirantē uidens, inquit, iam mihi mors non erit molesta, uidenti eum qui mihi causa mortis est, mecum morientem.

Adfabulatio. Hæc fabula innuit, æquo animo ferre homines calamitates, cum eos per quos in calamitate sunt, calamitosos aspiciunt.

DE AUCUPE. 26

**A**uceps quidam sumptis aucupatorijs retibus, ad uenandum processit, usq; palumbo in cacumine arboris sedente, compositas artificiose arundines cum retibus ad auem clanculū admouebat. sperans illam se uenari posse. Quod cum agit, in altum intuens, iacentem uiperam pedibus pressit: quæ exasperata dolore hominem momordit. At ille iam deficiens, Me miserū, inquit, qui cum alterū uenari uolo, ipse ab altero captus pereō. Adfabulatio.

Hæc fabula innuit, quod æmuli alios arte sua nitentes decipere, sæpe in laqueos quos tendunt, incidunt.

DE CASTORE. 27

**C**astor præter cæteros quadrupedes, in aqua durare fertur, suaq; genitalia ad artem medicam sanè utilia esse. Hic ubi uidet se ab indagantibus hominibus captum iri (nouit enim quamobrem indagetur) ipse sibi genitalia

d 3 præcid

præcidit, atque in sequentes proiciens, hoc modo incolū-  
mis euadit. Adfabulatio.

Hæc fabula innuit, huius exemplo prudentes debere  
pro adipiscenda salute, nullam rationē habere fortunarum.

## DE VATICINATORE.

28

VAticinator quidam in foro sedens sermocinabatur,  
cū sibi quidam denūtiat fores domus eius effractas  
esse, omniāq; direpta quæ in domo fuissent. Ad quem nun-  
tium uaticinator gemens, properansq;, cursu se domum  
recipiebat. Quem currentem intuens quidam, O tu, in-  
quit, qui aliena negotia te diuinaturum promittis, certē tua  
ipse non diuinasti. Adfabulatio.

Fabula hæc ad eos spectat, qui res suas non rectē admi-  
nistrantes, alienis, quæ nihil ad eos pertinent, providere  
ac consulere conantur.

## DE AUCUPE ET MERULA.

29

AUceps tetenderat uolucris retia: quod eminus in-  
tuens merula, percontabatur hominem quid negotij  
ageret. Ille respondit, se condere urbem. Abijtq; longius,  
& sese abdidit. Merula uerò uerbis illius fidem habēs, ac-  
cedens ad escam iuxta retia positam, capta est. Accurren-  
teq; aucupe, inquit, O homo, si tu quidem talem condis ur-  
bem, haud multos inuenies incolas. Adfabulatio.

Hæc fabula innuit, eo maximē modo rem priuatam, &  
publicam destrui, cum præsides sæuitiam exercent.

## DE VIATORE ET IOVE.

30

Viator longum ingressurus iter, si quid inuenisset, eius  
dimidium Ioui se oblaturum promisit. Inuenio autem  
in ipso itinere uase palmarum & amygdalorum pleno co-  
medit omnes palmulas amygdalāq;: sed horum nucleos,  
illarum putamina ad aram quandam obtulit inquiring, lu-  
piter,

*pter, habes quod tibi uoueram: quod enim inueni, eius & interiora & exteriora tibi offero.*

*Adfabulatio. Fabula hæc innuit, auarum hominem cupiditate pecuniæ, etiam dijs moliri fallacias.*

## DE FILIO ET MATRE.

31

**P**ver quidam in schola cōdiscipuli furatus tabellam alphabetariam attulit matri suæ. A qua non castigatus, quotidie magis furabatur. Procedente autem tempore maiora cœpit furari. Tandem à magistratu deprehensus ducebatur ad supplicium: Matre uerò sequente ac uociferante, rogauit satellites, ut paulisper cum ea ad aurem loqui permitterent. Quibus annuentibus, & matre festinabunda, aurem ad os filij admoüete: Ille auriculam maternam dentibus amorsam euulsit. Et cum mater cæteriç increparent, non modò ut furem, sed etiam ut in parentē suam impium, inquit, Hæc mihi, ut perderer, extiuit causa: si enim me ob tabellam alphabetariam castigasset, nequaquam ad ulteriora progressus, ad supplicium nunc ducerer.

*Adfabulatio. Fabula hæc innuit, quòd qui inter initia peccandi non coërcentur, ad grauiora flagitia euadunt.*

## DE FILIO ET PATRE.

32

**F**ilium quidam senior habebat generosi animi, & uenaticorum canum amatorem. Hunc per quietem uidebat à leone trucidari. Territus igitur, ne fortè somnium hoc aliquando sequeretur euentus, extruxit domum quandam politissimam, laquearibus ac fenestris amoenissimam: illucq; inducens filium, illi custos inhærebat. Depinxerat enim in ea domo, ad oblectationem filij omne genus animalium, in quibus & leonem. Adolescens hæc inspiciens, eo amplius molestiæ contrahabat. Quadam autem uice leoni propius stans inquit, O truculentissima fera, te pro-

d 4 pter,

pter, & propter inane somnium patris, in hac domo asseruor uelut in carcere. Quid igitur faciam? Et hæc dicens, manum parieti incussit, oculum leoni eruere uolens, & clauo, qui illic latebat, offendit: qua ex percussione manus emarcuit: succreuitq; sanies, ac febris subsecuta est: breui adulescens est mortuus. Ita leo adulescentem occidit, nihil adiuuante patris sophismate.

Adfabulatio. Hæc fabula innuit, quæ uentura sunt, deuitare posse neminem.

DE CALVO QVODAM.

33

**C**alvus quidam mentitos crines gerens, dum equo uehebatur, ecce turbinis uentus illos de capite sustulit: risus statim magni presentibus excitantur. Et ille mutuo risu ad eos, inquit, Quid mirum si crines, qui non erant mei, à me recesserint? Illi quoque recesserunt, qui mecum fuerant nati.

Adfabulatio.

Hæc fabula innuit, non debere nos mœrere ob amissas opes. Quod enim nascentes à natura non accepimus, non potest nobiscum perpetuo permanere.

F I N I S.

## ALIAE ITEM

ALIQVOT AESOPI FAB-

bule, è Græco in Latinum uersæ,

incerto interprete.

IMPOSSIBILIA PROMITTENS.

1

**V**ir pauper egrotans, & malè affectus, cum à medicis desperatus esset, deos rogabat, pollicens, si sanitatem sibi rursus restituisent, centum boues ipsis oblaturum esse in sacrificium. Vxore autem eius audiente, Et ubi tibi hæc,



*hæc, si conualueris? ille aut, Putas enim surgere me hinc, ut dei hæc à me repetant?* Adfabulatio.

*Fabula significat, multos facile polliceri, quæ re comprobare non sperent.*

## R A N A E.

2

**R**anæ duæ in palude pascebantur, æstate autem siccata palude, illa derelicta, querebant aliam: ceterum profundum inuenerunt puteum: quo uiso, altera alteri inquit, Descendamus heus tu in hunc puteum. Illa respondens ait, Si igitur & hic aqua aruerit, quomodo ascendemus?

Adfabulatio. Fabula declarat non oportere inconsideratè res aggredi.

## CANIS, ET GALLVS.

3

**C**anis & gallus inita societate iter faciebant. Vespera autem superueniente, gallus conscensa arbore, dormiebat: at canis ad radicem arboris excavatæ. Cum gallus, ut assolet, noctu cantasset, uulpes ut audiuit accurrit: & stans inferius, ut ad se descenderet, rogabat, quod cuperet commendabile adeò cantu animal complecti. Cum autem is dixisset, ut ianitor em prius excitaret ad radicem dormientem, ut cum ille aperuisset, descenderet: & illa quærente ut ipsum uocaret, canis statim prosiliens eam dilacerauit.

Adfabulatio. Fabula significat, prudentes homines inimicos insultantes ad fortiores astu mittere.

## L E O, ET V R S V S.

4

**L**eo & ursus simul magnum nacti hinnulum, de eo pugnant: grauiter igitur à seipsis affecti, ut ex multa pugna etiam uertigine corriperebantur: defatigati iacebant. Vulpes autem circumcirca eundo, ubi prostratos eos uidit, & hinnulum in medio iacentem, hunc per utrosq; percurrento, rapuit, fugiensq; abiuit: at illi uidebant quidem

d 3

ipsam

ipsam, sed quia non poterant surgere, Nos miseros, dicebant, quia uulpi laborauimus. Adfabulatio.

*Fabula significat, alijs laborantibus, alios lucrari.*

VESPERTILIO, ET RUBVS,  
& Mergus.

**V**espertilio, & rubus, & mergus inita societate mercatoriam decreuerunt uitam agere. Itaq; uespertilio argentum mutuata proiecit in medium: rubus uestem secum accepit: mergus tertius, es: & nauigauerunt. Tempestate autem uehementi oborta, & naui euersa, omnibus perditis, ipsi in terram euaferunt. Ex illo igitur mergus litoribus semper asidet, num quopiam es eijciat mare. Vespertilio uerò creditores timens, interdum non apparet, noctu ad pabulum exit. Rubus prætereuntium uesli inheret, sicubi suam cognoscat quærendo.

*Adfabulatio. Fabula significat, in ea quibus incumbimus, in posterum incidere.*

PAVO, ET MONEDULA.

**A**vibus creaturis regē, pavo orabat, ut se ob pulchritudinem eligerent. Eligentibus autem cum omnibus, monedula suscepto sermone ait, Sed si te regnante, aquila nos persequi aggressa fuerit, quomodo nobis opem ferēs?

*Adfabulatio. Fabula significat, principes non modo propter pulchritudinem, sed & fortitudinem & prudentiam eligi oportere.*

SINGULARIS ANIMAL ET VULPES.

**S**ingularis agrestis super quadam fidens arbore dentes sacuebat. Vulpe rogante causam, quare nulla præposita necessitate dentes acueret, ait, Non abs re hoc facio: nam si me periculum inuaserit, nequaquam me tunc acuendis dentibus occupatum esse oportebit, sed potius paratis uti.

*Adfab*

**Adfabulatio.** Fabula significat, aduersus periculum preparatum esse oportere.

## C A S S I T A.

8

**C**assita laqueo capta plorans dicebat, Hei mihi misere, & infelici uolucris, non aurum surripui cuiusquā, non argētum, non aliud quicquam pretiosum. Granum autem tritici paruum, mortis mihi causa fuit.

**Adfabulatio.** Fabula in eos, qui ob inutile lucrum magnum subeunt periculum.

## H I N N V L V S.

9

**H**innulus aliquando ceruo ait, Pater, tu & maior, & celerior canibus, & cornua præterà ingentia gestas ad uindictam, curnam igitur sic eos times? Et ille ridēs ait, Vera quidē hæc inquis, filij: unū uerò scio, quòd cum canis latratū audiuerò, statim ad fugam nescio quomodo effëror.

**Adfabulatio.** Fabula significat natura timidos, nulla admonitione fortificari.

## A V A R V S.

10

**A**varus quidam cum omnia sua bona uendidisset, & auream glebam fecisset, in loco quodam infodit, unā defosso illic & animo suo, & mente: atq; quotidie eundo, ipsam uidebat. Id autem ex operis quedam obseruando cognouit, & refossam glebam abstulit. Post hæc & ille profectus, & uacuum locum uidens, lugere cœpit, & capillos euellere. Hunc cum quidam uidisset sic plorantem, & causam auduisset, Ne sic, ait, ô, tu, tristare: neque enim habens aurum, habebas: lapidem igitur pro auro acceptum reconde, & puta tibi aurum esse, eundem enim tibi usum præstabit: nam, ut uideo, neq; cum aurum erat, utebare.

**Adfabulatio.** Fabula significat, nihil esse possessionem, nisi usus adfuerit.

**A**nseres, & grues in eodem prato pascebantur. Venatoribus autem uisis, grues, quòd essent leues, statim euolauerunt, anseres uerò ob onus corporum cum mansissent, capti fuerunt. Adfabulatio.

*Fabula significat, & in expugnatione urbis, inopes facile fugere, diuites autem seruire captos.*

**T**estudo orabat aquilam, ut se uolare doceret. Ea autem admonente procul hoc à natura ipsius esse, illa magis precibus instabat, Accepit igitur ipsam unguibus, & in altum sifilui: inde demisit: hæc autem in petras cecidit, & contrita est. Adfabulatio.

*Fabula significat, multos quia in contentionibus prudentiores non audiuerint, seipsos læsisse.*

**C**erua altero obcæcata oculo, in litore pascebatur, scilicet unum oculum ad terram propter uenatores habens, alterum uerò ad mare, unde nihil suspicabatur. Præternauigantes autem quidam, & hoc conuictantes, ipsam sagittarunt: hæc autem seipsam lugebat, quòd unde timuerat, nihil passa foret: quod non putabat malum allaturum, ab eo proditam. Adfabulatio.

*Fabula significat, sepe quæ nobis noxia uidentur, utilia fieri: quæ uerò utilia, noxia.*

**C**erua uenatores fugiens, in speluncam ingressa est. In leonem autem ibi cum incidisset, ab eo comprehensa est. Moriens autem dicebat, Hei mihi homines fugiens, inferarum inmitissimum incidi. Adfabulatio.

*Fabula significat, multos homines dum parua fugiunt peri*

pericula, in magna incurrere.

CERVA, ET VITIS.

15

**C**erua uenatores fugiens sub uite delituit. Cum præterissent autem parumper illi, cerua prorsus iam latere arbitrata, vitis folia pisci incoepit. Illis uero agitatæ, uenatores conuersi, & quod erat uerum arbitrati, animal aliquod sub folijs occultari, sagittis confecerunt ceruam. Hæc autem moriens talia dicebat, Iusta passi sum, non enim offendere oportebat, quæ me seruauit.

Adfabulatio. Fabula significat, qui iniuria benefactores afficiunt, à Deo puniri.

ASINVS, ET LEO.

16

**C**um asino gallus aliquando pascebatur. Leone autem aggresso asinū, gallus exclamauit, & leo (aiunt enim hunc galli uocem timere) fugit. At asinus ratus propter se fugere, aggressus est statim leonem. Vt uero procul hunc persecutus est, quò non amplius galli perueniebat uox, conuersus leo deuorauit. Hic uero moriens clamabat, Me miserum & dementem : ex pugnacibus enim non natus parentibus, cuius gratia in aciem irrui? Adfabulatio.

Fabula significat, plerosq; homines, inimicos, qui se de industria humiliarunt, aggredi, atq; ita ab illis occidi.

OLITOR, ET CANIS.

17

**O**litoris canis in puteum decedit : olitor autem ipsum illinc extracturus, descendit & ipse in puteum. ratus autem canis accessisse ut se inferius magis obrueret, conuersus olitorem momordit. Hic autem cum dolore reuersus, iusta, inquit, patior. nam cur unquam sui interfectorem seruare studui? Adfabulatio.

Fabula in iniustos, & ingratos.

SVS, ET CANIS.

18

Sus &

**S**Vs & canis mutuò conuitiabantur. Et sus iurabat per Venerem, procul dubio dentibus discissurum canem, Canis uerò ad hæc dissimulante dicit, Bene per Venerem nobis iuras: significas enim ab ipsa uehementer te amari, quæ impuras tuas carnes degustantem nullo pacto in sacellum admittit. Et sus, Propter hoc igitur magis præ se fert dea amare me: nã occidentem aut alio quouis modo ledentem omnino auersatur: tu tamen male oles & uiua & mortua.

**Adfabulatio.** Fabula significat, prudentes oratores, quæ ab inimicis obijciuntur, artificiose in laudem cōuertere.

S V S, E T C A N I S.

19

**S**Vs & canis de fœcunditate certabant. Dixit autem canis, fœcundam esse maxime pedestrium omnium. Et sus occurrens, ad hæc inquit, Sed cum hæc dicis, scito & cecos tuos te catulos parere. **Adfabulatio.**

**Fabula significat,** non in celeritate res, sed in perfectione iudicari.

S E R P E N S, E T C A N C E R.

20

**S**Erpens unà cum cancro uiuebat, inita cum eo societate. Sitq; cancer simplex moribus, ut & ille astutiam mutaret, admonebat: hic autem minimè obediebat. Cum obseruasset igitur cancer ipsum dormientem, & pro uiribus compressisset, occidit. At serpente post mortem extenso, ille ait, Sic oportebat antehac rectum & simplicem esse: neq; enim hanc pœnam dedisses. **Adfabulatio.**

**Fabula significat,** qui cum dolo amicos adeunt, ipsos offendi potius.

P A S T O R, E T L U P V S.

21

**P**Astor nuper natum lupi catulum reperit, ac sustulit, unaq; cum canibus nutriuit. At cum adoleuisset, si quando lupus ouem rapuisset, cum canibus & ipse persequetur.

tur. Cum canes uerò aliquando nō possent assequi lupum, atq; ideo reuenterentur, ille sequebatur, ut cū ipsum asscutus esset, particeps foret uenationis ut lupus: inde redibat. Sin autē lupus extrā nō rapuisset ouem, ipse clam occidēs, unā cum canibus comedeat: donec pastor cū conieciasset, & intellexisset rem, de arbore ipsum suspendit, & occidit.

Adfabulatio. Fabula significat, naturam prauam bonos mores non nutrire.

## L E O, E T L V P V S.

22

**L**Eo cum consenuisset, egrotabat iacēs in antro. Accesserant autem uisitatura regem, præter uulpem, cetera animalia. Lupus igitur capta occasione accusabat apud leonem uulpem, quasi nihili facientem suum omnium dominum, & propterea neque ad uisitationem profectam. Interim affuit & uulpes, & ultima audiuit lupi uerba: Leo igitur contra eam infremuit. Sed defensionis tempore petito, Et quis, inquit, eorum, qui cōuenerunt, tantum profuit, quantum ego, quæ in omnem partem circuiui, & medicamentum pro te à medico quæsiui, & didici? Cum autem leo statim, ut medicamentum diceret, imperasset, illa inquit, Si lupo uiuente excoriato, ipsius calidam pellem indueris. Et lupo iacente uulpes ridens ait, Sic nō oportet dominum ad maluolentiam mouere, sed ad beneuolentiam.

Adfabulatio. Fabula significat, eum qui quotidie machinatur, in seipsum laqueum uertere.

## M V L I E R.

23

**M**ulier quædam uirum ebrium habebat: ipsum autem à morbo liberatura, tale quid commenta est. Aggrauatum enim ipsum ab ebrietate cum obseruasset, & mortui instar insensatum, in humeros eleuatum, in sepulcretū alatum deposuit, & abiuit. Cum uerò ipsum iam sobrium esse

esse coniectata est, profecta ianuam pulsavit sepulcreti. Ille autem cum diceret, *Quis est, qui pulsat ianuam?* uxor respondit, *Mortuis cibaria ferēs ego adsum.* Et ille, *Non mihi comesse, sed bibere o optime potius asser: tristem enim me reddis, cum cibi non potus meministi.* Hæc autem petrus plangendo, *Hic mihi misere,* inquit: nam neque astu profui: tu enim uir non solum non emendatus es, sed peior quoque; te ipso euasisti. in habitum tibi deductus est morbus.

*Adfabulatio.* Fabula significat, non oportere in malis actibus immorari: nam et nolentem quandoque hominem consuetudo inuadit.

## C Y C N U S.

24

**V**ir diues anserem simul et cycnum nutriebat, non ad eadem tamen, sed alterum cantus, alterum mense gratia. Cum autem oporteret anserem pati ea, quorum causa nutriebatur, nox erat, ac discernere tempus non permisit utrunque: cycnus autem pro anserē abductus, cantat cantum quendam mortis exordium: et cantu significat naturam, mortem uero effugit suauitate canendi. *Adfabulatio.*

*Fabula significat, sæpe muscen differre mortem.*

## A E T H I O P S.

25

**A**Ethiopem quidam emit, talem ei colorē inesse ratus negligentia eius, qui prius habuit: ac assumpto in domum, omnes ei adhibuit abstersiones, omnibus lauacris tenuit mundare: et colorem quidem transmutare non potuit. sed morbum dolor parauit. *Adfabulatio.*

*Fabula significat, manere naturas, ut à principio proenerunt.*

## H I R V N D O, E T C O R N I X.

26

**H**irundo et cornix de pulchritudine cōtendebāt, Respondens autem cornix ei dixit, *Sed tua pulchritudo uerno*



verno tempore floret, meū uerò corpus etiā hyeme durat.

Adfabulatio. Fabula significat, durationem corporis, decore meliorem esse.

## B V T A L I S.

27

**B**vtalis à fenestra quadam pēdebat: Vespertilio autem profecta rogauit causam, quare die sileret, nocte caneret. Cū autem id ea non incaſsum hoc facere dixisset (nam die canendo olim capta fuerat, & propterea ex illo prudens euasit) uespertilio ait, Sed nō nunc te cauere oportet, cū nullā utilitas, sed antē quā capereris.

Adfabulatio. Fabula significat, in infortunijs inutilē esse poenitentiam.

## C O C H L E A E.

28

**R**vstici filius assabat cochleas. Cū autem audiret eas stridentes, ait, O pessimæ animantes, domibus uestris incensis uos cantis?

Adfabulatio.

Fabula significat, omne intempestiuē factum, uituperabile.

## M V L I E R, E T A N C I L L A E.

29

**M**ulier uidua operosa ancillas habens, has solebat noctu excitare ad opera ad gallorum cantus. His uerò assiduē defatigatis labore, uisum est oportere domesticum occidere gallum, tanquā illum qui noctu excitaret heram. Euenit autē ipsis, hoc facto, ut in grauiora inciderent mala: nam hera ignorās gallorū horā, temporius eas excitabat.

Adfabulatio. Fabula significat, plerisq; hominibus consilia esse malorum causas.

## M V L I E R V E N E F I C A.

30

**M**ulier uenefica diuinarū irarum propulsiones promittens, multa facere perscuerabat, & lucrum inde facere. Quidā igitur accusauerunt eā impietatis, & conui-

e

ccrunt

cerunt, & damnatam ducebant ad mortem. Videns autem quidā eam duci, ait, Tu quæ deorum iras auertere promittebas, quomodo neq; hominum consilium mutare potuisti?

Adfabulatio. Fabula significat, multos magna promittentes, ne parua quidem facere posse.

AGRICOLA.

31

**A**gricola quidam fodiendo aurum reperit: quotidie igitur terram, ut ab ea beneficio affectus, coronabat. Huic autem Fortuna adstans, inquit, Heus tu, cur terræ mea munera attribuis, quæ ego tibi dedi ditatura te? nam si tempus immutetur, & in alias manus hoc tuum aurum eat, scio te nunc me Fortunam accusaturum.

Adfabulatio. Fabula significat, oportere benefactorem cognoscere, atq; huic gratiam referre.

VIATORES.

32

**D**vo quidam unā iter faciebant: & cum alter securim reperisset, alter, qui non inuenit, admonebat ipsum ne diceret inueni, sed inuenimus. Paulò post autem cum aggrederentur ipsos, qui securim perdididerant, qui eam habebat, persequētibus illis, ei qui unā iter faciebat, dixit, Perijimus. Hic autem ait, perij dic: nō, perijmus: etenim & tunc, cum securim inuenisti, inueni dixisti, nō, inuenimus.

Adfabulatio. Fabula significat, qui non fuerunt participes felicitatū, neq; in calamitatibus firmos esse amicos.

RANAE DVAE.

33

**D**ve ranæ vicinæ sibi erant: pascebantur autem altera in profundo stagno, & procul à uia: altera in uia parum aquæ habens. Verum, cum quæ in stagno, alteram admoneret, ut ad se migraret, ut tutiore cibo frueretur, illa non paruit, dicens firmissima teneri huiusce loci cōsuetudine: quousq; obtigit currum prætereuntē ipsam confringere.

Adfab

**Adfabulatio.** *Fabula significat, homines quoq; praua aggredientes citius mori, quàm mutentur in melius.*

## A P I A R I V S.

34

**I**N mellarium ingressus quidam domino absente, fauum abstulit. Hic autè reuersus, ut alucolos uidit inanes, stans quod in his erat perscrutabatur. Apes autè è pastu redeuntes, ut deprehenderunt ipsum, aculeis percutiebant, pessimeq; tractabant. Hic autem ad eas. O pessimæ animantes, furatum uestros fauos illæsum dimisistis, me uerò satæ gentem uestri percutitis? **Adfabulatio.**

*Fabula significat, sic homines quosdam ob ignorantiam inimicos non cauere, amicos autè ut insidiatores repellere.*

## A L C E D O.

35

**A**Lcedo auis est solitaria, semper in mari uitam degens: hanc dicitur hominum uenationes cauentem, in scopulis maritimis nidificare. Ceterum aliquando paritura, pullos fecit. Egressa autem ea ad pabulum, accidit mare à uehementi concitatum uento, eleuari supra nidum: atq; hoc submerso, pullos perdere: hæc uerò reuersa, re cognita, ait, Me miseram, quæ terram ut infiditricem cauens, ad hoc confugi, quod mihi longe est infidius.

**Adfabulatio.** *Fabula significat homines etiam quosdam ab inimicis cauendo, ignaros in multo grauiores inimicis amicos incidere.*

## P I S C A T O R.

36

**P**iscator in flumio quodam piscabatur. Extensis autem retibus, & fluxu comprehenso utrinq; , funi alligato lapide, aquam uerberabat, ut pisces fugientes incautè in retia inciderent. Cum quidam uerò ex ijs, qui circa locum habitabant, id facere uideret, increpabat, quod flumiū turbaret, & claram aquam non sineret bibere: & is respondit, Sed  
e 2 nisi

nisi sic fluuius perturbetur, me oportebit esuriens mori.

Adfabulatio. Fabula significat, ciuitatū etiā rectores tunc maximē operari, cum patrias in seditionē induxerint.

SIMIVS, ET DELPHIS.

37

**M**Oris cum esset nauigantibus Melitenses catulos & simios adducere in solamen nauigationis, quidam habebat secum & simium. Cum autem peruenissent ad Sunium Atticæ promontorium, tempestatem uehementē fieri contigit: naui autem euersa, & omnibus natantibus, natabat & simius. Delphis quispiam ipsum conspiciens, & hominem esse ratus, digressus leuabat, ad terram perferens. Ut uerò in Piræo fuit Atheniensium nauali, rogauit simium, an genere esset Atheniensis. Cum autem hic diceret & clavis hic esse parentibus: rogauit an & Piræum sciret. Ratus autem simius de homine cum dicere, ait, Et ualde amicum esse ei, & familiarem. At Delphis tanto mendacio indignatus, submergens ipsum occidit.

Adfabulatio. Fabula in uiros qui ueritatem ignorant, existimant se decipere.

M V S C A E.

38

**I**N cella quadam melle effuso, muscæ aduolantes comedeant: implicitis autem earum pedibus, euolare non poterant: cum uerò suffocarentur, dicebant, Miseræ nos, quia ob modicum cibum perimus.

Adfabulatio. Fabula significat, multis gulam multorum malorum esse causam.

M E R C V R I V S, E T S T A -

T V A R I V S.

39

**M**ercurius scire uolens, quanti apud homines esset, uiuit in statuarij domum transformatus in hominem, & uisa statua Iouis, rogabat, quanti quis ipsam emere posset.

let. Hic autem cum dixisset, drachma, risit. Et quanti Iunonis? ait, Cum dixisset, pluris: uisa & sua ipsius statua, ac opinatus cum nuntius sit deorum, & lucrosus, maximam de se apud homines haberi rationem, rogauit de se. Statuarius uero ait, Si hæc emeris, & hanc additamentum do.

Adfabulatio. Fabula in uirum gloriosum, qui nullius apud alios est pretij.

MEECVRIVS, ET TIRESIAS. 49

**M**ercurius uolens Tiresiæ uaticinium, an uerum esset cognoscere, furatus ipsius boues ex rure uenit ad ipsum in urbem, similis factus homini, & ad ipsum diuertit. Bouem autem amissione renuntiata Tiresiæ, ille assumpto Mercurio exiit, augurium aliquod de fure consideraturus. Et huic iubet dicere sibi quamnam auem uiderit. Mercurius autem primum uidisse aquilā à sinistris ad dextram uolantem, dixit. Hic non ad se id esse cum dixisset, secundo cornicem super arbore quadam sedentem uidit, & modò superius aspicientem, modò ad terram declinatam, uati refert. Et is re cognita ait, Sed hæc cornix iurat & cœlum, & terram, si tu uelis, meas me recepturum boues.

Adfabulatio. Hoc sermone uti quispiam poterit aduersus uirum furacem.

CANES.

4E

**H**abens quidam duos canes, alterum uenari docuit, alterum domum seruare. Ceterum si quando uenaticus caperet aliquid, qui domum custodiebat, particeps una cum eo erat cœnæ, Aegrè ferente autem uenatico, & illi obijciente, quod ipse quotidie laboraret, ille nihil faciens suis nutriretur laboribus, respondens ipse ait, Non me, sed herum reprehende, qui non laborare me docuit, sed labores alienos comesse.

Adfabulatio.

c 3

Fabu

*Fabula significat, adolescentes qui nihil sciunt, haud esse reprehendendos, cum eos parentes sic educauerunt.*

## MARITVS ET VXOR.

42

**H**Abens quidam uxorem, quæ domesticis omnibus inuicem erat, uoluit scire an etiam erga paternos domesticos ita afficeretur. Quapropter cum rationabili prætextu ad suum patrem ipsam misit. Paucis uerò post diebus ea reuersa, rogauit quomodo aduersus illos habuisset. Hæc uerò cum dixisset, Bubulci & pastores me suspectabant: ad eam ait, Sed o uxor, si eos odisti, qui mane greges agunt, serò autem redeunt, quid sperare oportet in ijs quibus cum tota conuersaris die?

Adfabulatio.

*Fabula significat, sic sæpe ex paruis magna, & ex manifestis incerta cognosci.*

## HOEDVS ET LVPVS.

43

**H**oedus derelictus à grege, persequente lupo, conuersus ad eum dixit, O lupo, quoniam credo me tuum cibum futurum, ne iniucundè moriar, cane tibia primum, ut saltem. Lupo autem canente tibi, atq; hœdo saltante, canes cum audiissent, lupum persecuti sunt. Hic conuersus hœdo inquit, Merito hæc mihi fiunt: oportebat enim me cocus cum sim, tibicinem non agere.

*Adfabulatio. Fabula significat, qui ea quibus natura apti sunt, negligunt, quæ uerò aliorum sunt, exercere conantur, in infortunia incidere.*

## CANCER ET VVLPES.

44

**C**ancer è mari cum ascendisset, in loco quodam pascebatur. Vulpes esuriens ut uidit, accessit, ac eum rapuit. Ille deuorandus ait, Sed ego condigna patior, qui marinus cum sim, terrestris esse uolui.

Adfabulatio.

*Fabula significat, homines, etiam qui proprijs derelictis*

*lis exercitijs, ea quæ nihil conueniunt, aggrediuntur, merito infortunatos esse.*

CITHARÆDVS. 45

**C**itharædus rudis in domo calce incrustata familiariter, ut solebat, canens, & contra resonante in se uoce, existimabat ualde canorus esse: uerum elatus super hoc, cogitauit & in theatro sese committere oportere. Profectus uerò ad se ostendendum, cum male admodum caneret, lapidibus ipsum explosum abegerunt.

*Adfabulatio. Fabula significat, sic ex rhetoribus quosdam, qui in scholis putant esse aliquid, cum ad res publicas se conferunt, nullius pretij esse.*

FVRES. 46

**F**vres in domum quādam ingressi, nihil inuenerunt nisi gallum, atq; hoc capto, abierunt. Hic ab eis occidendus rogabat, ut se dimitterent, dicēs utilem esse hominibus notū eos ad opera excitando. Hi uerò dixerunt, Sed propter hoc tanto magis occidimus: illos enim excitando, furari nos non sinis.

*Adfabulatio.*

*Fabula significat, ea maxime prauis esse aduersa, quæ bonis sunt beneficio.*

CORNIX ET CORVVS. 47

**C**ornix coruo inuidens, quod is per auguria hominibus uaticinaretur, ob idq; crederetur uti futura prædicens, conspicata uiatores quosdam prætereuntes, iuit super arborem quandam stansq; ualde crocitauit. Illis uerò ad uocem conuersis & admiratis, re cognita, quidam inquit, Abeamus heus nos, cornix enim est, quæ crocitauit, & tugurium non habet.

*Adfabulatio.*

*Fabula significat, eodem modo & homines præstantioribus certantes, præter quàm quod non ad æqua perue-*

*niunt*

niunt, risum quoque debere.

CORNIX, ET CANIS.

48

**C**ornix Minervæ sacrificans canem inuitavit ad epulas. Ille uerò ad eam dixit, Quid frustra sacrificia absumis? Dea enim adeò te odit, ut ex peculiaribus quoq; tibi augurijs fidem sustulerit. Cui cornix, Ob id magis ei sacrifico, ut reconcilietur mihi. Adfabulatio.

Fabula significat plerosq; ob lucrum non mereri inimicos beneficijs prosequi.

CORVVS, ET SERPENS.

49

**C**orvus cibi indigens, ut serpentem in aprico quodam loco dormientē uidit, hunc deuolando rapuit. Hic cum se uertisset, atq; momordisset ipsum coruus moriturus dixit, Me miserum, qui tale reperi lucrum, quo etiam pereō.

Adfabulatio. Fabula in uirum, qui ob thesaurorum inuentionem de salute periclitatur.

MONEDVLA, ET COLUMBAE.

50

**M**onedula in columbario quodam columbis uisis benenutritis, dealbavit sese, iuitq; ut & ipsa eodem cibo impertiretur. Hæ uerò, donec tacebat, ratæ eam esse columbam, admiserunt: sed cum aliquando oblita uocem emisisset, tunc eius cognita natura, expulerunt percutiendo: eaq; priuata eo cibo, rediit ad monedulas rursum: & illæ ob colorem, cum ipsam non nossent, à suo cibo abegerunt, ut duorum appetens, neutro potiretur. Adfabulatio.

Fabula significat, oportere & nos nostris contentos esse, considerantes auaritiam præterquam quòd nihil iuuat, auferre sæpe & quæ adsunt bona.

MONEDVLA.

51

**M**onedulam cum quis cepisset, & pedem alligasset filo, suo tradidit filio. Hæc non ferendo uictum inter homin



homines, ubi parumper libertatem nacta est, fugit, in suumq;  
nidum se contulit. Circunuoluto uerò ramis uinculo euola-  
re haud ualens, cum moritura esset, secum loquebatur, *Me  
miseram, quæ apud homines non ferendo seruitutem, in-  
cautè mea me uita priuauit.* Adfabulatio.

*Fabula significat, nonnunquam quosdam, dum se à me-  
dioeribus student periculis liberare, in maiora incidere.*

## M E R C V R I V S.

52

**I**upiter Mercurio iussit, ut artificibus omnibus menda-  
cij medicamentum misceret: hic eo trito, & ad mensu-  
ram facto, ex æquo singulis miscet. Cum uerò solo relicto  
sutore, multum superesset medicamenti, totum acceptum  
mortarium ei miscuit: atque hinc contigit artifices omneis  
mentiri, maxime uerò omnium sutores.

Adfabulatio. *Fabula in mendaces artifices.*

## I V P I T E R.

53

**I**upiter formatis hominibus, omneis illis affectus indi-  
dit, solum indere pudorem oblitus est. Quapropter non  
habens undenam ipsum introduceret, per turbam ingredi  
eum iussit. Hic uerò primum indignè ferens contradicebat:  
uehementius uerò eo instante, ait, sed ego sanè his ingre-  
dior pactis, si amor non ingrediatur: sin ingrediatur, ipse  
exibo quàm primum. Ex hoc sanè euenit, omnia scorta in-  
uerecunda esse.

Adfabulatio.

*Fabula significat, captos amore inuerecundos esse.*

## I V P I T E R.

54

**I**upiter nuptias celebrans, omnia animalia accipiebat: so-  
la uerò testudine tardè profecta, admirans causam tar-  
ditatis, rogauit eam, quamobrem ipsa ad coenam non ac-  
cesserat. Cum hæc dixisset, Domus chara, domus optima:  
iratus ipsi, damnauit ut domum baiulans circumferret.

e 5

Adfab

**Adfabulatio.** Fabula significat, plerosq; homines eligere parce potius apud se uiuere, quàm apud alios laute.

LVPVS, ET OVIS. 55

**L**vpus à canibus morsus, & male affectus, abiectus iacebat. Cibi uerò indigens, uisa oue, rogabat ut potum ex præterfluente flumine sibi afferret: Si enim tu mihi, inquit, dederis potum, ego cibum mihi ipsi inueniam. Illa recognita ait, Sed si ego potum do tibi, tu & cibo me uteris.

**Adfabulatio.** Fabula in utrum maleficum, per simulationem insidiantem.

LEPORES. 56

**L**epores olim belligerantes cum aquilis inuocarunt in auxilium uulpes. Hæ autem dixerunt, Vobis auxiliaremur, nisi sciremus qui uos estis, & cum quibus præliamini. **Adfabulatio.** Fabula significat, eos, qui cum præstantioribus certant, suam salutem contemnere.

FORMICA. 57

**Q**uæ nunc formica, homo olim fuit, hic agriculturæ assidue incumbens, non erat proprijs laboribus contentus, sed & uicinorum fructus surripiebat. Iupiter autem indignatus huius auidia, transmutauit eum in hoc animal, quæ formica appellatur. Verùm cum mutasset formam, non & affectum mutauit: nam usq; nunc arua circumeundo, aliorum labores surripit, & sibi recondit.

**Adfabulatio.** Fabula significat natura prauos, etsi maxime speciem transmutauerint, mores non mutare.

VESPERTILIO, ET MUSTELA. 58

**V**espertilio in terram cum cecidisset, à mustela captus est: & cum occidenda foret, pro salute rogabat. Hac uerò dicente non posse ipsam dimittere, quòd natura uolucris omnibus inimica foret, ait non auem, sed nuxem esse:

& sic

Et sic dimissa est. Postremò autem cùm iterum cecidisset, Et ab alia capta mustela, ne uoraretur orabat. Hæc autem dicente, cunctis inimicam esse muribus, hæc non mus, sed uespertilio sum, dicebat: Et rursus dimissa est: atq; ita cunctis, bis mutato nomine, salutem consecutam fuisse.

Adfabulatio. Fabula significat, neq; nos in eisdem semper esse oportere, considerantes eos, qui ad tempus mutantur, plerumq; pericula effugere.

## VIATORES.

39

Viatores secundum littus quoddam iter facientes, iuerunt in speculam quandam, Et illic conspicati sarmentâ procul natantia, nauim esse magnam existimarunt: quâ-obrem expectarunt, tanquam appulsura ea esset. Cum uerò à uento lata sarmenta propius forent, non nauim amplius, sed scapham uidere uidebantur. Aduectis autem illis, cum sarmenta esse uidissent, inter se dixerunt, Vt nos igitur frustra, quod nihil est, expectabamus? Adfabulatio.

Fabula significat, nonnullos homines, qui ex improvisa terribiles esse uidentur, cùm periculum feceris, nullius esse pretij inueniri.

## ASINVS SYLVESTRIS.

60

Asinus sylvestris asino uiso domestico in loco quodam aprico, profectus ad ipsum, beatum dicebat, Et corporis habitudine, Et cibi perceptione. Deinde uerò cùm uidisset eum ferentem onera, Et agasonem retro sequentem, Et baculis ipsum percutientem, ait, Ast ego non amplius beatum te existimabo: uideo enim non sine magnis malis habere te felicitatem. Adfabulatio.

Fabula significat, non esse emulanda lucra, in quibus insunt pericula, Et miseria.

## ASINI.

61

Asini

te, lupus prateries, ipsum uidit, & dixit, Miseri nos, quos si tantum uiderit persequitur, huic autem & arridet.

Adfabulatio. Fabula significat, maleficos homines, si tantum appareant, dignosci.

## A S I N U S, E T V U L P E S.

65

**A**sinus & uulpes inita inter se societate, exiuerunt ad uenationem: Leo uero cum occurrisset ipsis, uulpes imminens periculum uidens, profecta ad leonem, tradituram ei asinum pollicita est, si sibi impunitatem promiserit. Qui cum dimissurum eam dixisset, illa adducto asino in casses quosdam ut incideret, fecit. Sed leo uidens illum fugere minimè posse, primam uulpem comprehendit: deinde, sic ad asinum uersus est.

Adfabulatio.

Fabula significat, eos, qui socijs insidiantur, sæpe & se ipsos nescios perdere.

## G A L L I N A, E T H I R V N D O.

66

**G**allina serpentis ovis inuentis diligenter calcfacta excludit. Hirundo autem cum eam uidisset, ait, O demens, quid hæc nutris? quæ cum excreuerint, à te prima iniuriam auspicabuntur.

Adfabulatio.

Fabula significat, implacabilem esse prauitatem, licet afficiatur maximis beneficijs.

## C A M E L U S.

67

**C**um primum uisa est camelus, homines perterriti, & magnitudinem admirati fugiebant. Vbi uero procedente tempore cognouerunt ipsius mansuetudinem, confisi sunt eò usq; ut ad eam accederent. At intellecto paulò post beluæ non inesse bilem, eò contemptius iere, ut & fræna ei imponerent, & pueris agendam traderent.

Adfabulatio. Fabula significat terribiles res consuetudine contemptibiles fieri.

Serpens.

**S**erpens à multis hominibus pessundatus, Iouem postulat. Iupiter autem ad eum dixit. Si qui prior concucauit, pupugisses, nequaquam id facere secundus aggressus fuisset.

Adfabulatio.

Fabula significat, eos qui prius inuadentibus resistunt, alijs formidolosos fieri.

**C**olumba siti corrupta, ut uidit quodam in loco poculum aque depictum, uerum rata, atq; multo elata impetu, inscia in tabulam offendit, usque adeo ut ex pennis ipsius perfractis in terram decideret, atque à quodam occurrentium caperetur.

Adfabulatio.

Fabula significat, nonnullos homines ob uehemētes ascriptates inconsulto res aggrediētis, iniicere sese in perniciem.

**C**olumba in columbario quodam nutrita, fecunditate superbiebat. Cornix uerò ea audita, ait: Heus tu, desine hac re gloriari: nam quò plures paris, eò plus mœoris accumulas.

Adfabulatio.

Fabula significat, ex famulis quoq; eos esse infeliciſsimos, qui in seruitute multos filios faciunt.

**D**ives duas habens filias, altera mortua, præficus conduxit. Cum uerò altera filia dixisset, Vt nos miseræ, ipse, ad quas pertinet luctus, lamentari nescimus: hæ uerò non necessariæ sic uehementer plangunt. mater ait, Ne mirare filia, si hæ ita lamentantur, nam nummorum gratia id agunt.

Adfabulatio.

Fabula significat, nonnullos homines ob auaritiā non uereri alienis calamitatibus quæstum facere.

## P A S T O R.

72

**P**astor actis in quercetum quoddam ouibus, strata sub quercu ueste, ascendit, & fructum decutiebat. Oves uerò inter edendum glandes, nesciæ & uestes unà deuorant. At cum pastor descendisset, ut quod erat actum, uidit, O pessima, ait, animalia, uos cæteris uellera ac uestes præbetis, à me uerò, qui uos nutrio, & uestem surripitis.

Adfabulatio. Fabula significat, plerosq; homines ob dementiam eos qui nihil attinent, beneficio afficere, in domesticos mala operari.

## B V B V L C V S.

73

**B**ubulcus armetum taurorum pascens, amisit uitulum, blustrando omnem solitudinem, indagando moram traxit. Vbi inuenire nihil potuit precatus est Iouem, si furem qui uitulum cepit, ostenderet, hocdum in sacrificium oblatum. Cæterum proficiscens in quercetum quoddam, inuenit à leone deuorari uitulum. Trepidus igitur & perterrefactus, eleuatis manibus suis in cælum, ait, O domine Iupiter, promiseram tibi hocdum me daturum esse, si furem inuenirem: nunc taurum tibi recipio sacrificaturum, si huius manus effugero. Adfabulatio. Fabula in homines infortunatos, qui dum quippiam amiserint, precantur ut inueniant, cum inuenerint, quærunt effugere.

## A Q V I L A.

74

**S**uper petra aquila sedebat leporem captura: hanc autem quidam percussit sagitta, quæ intra ipsam ingressa est, sed crena cum pennis ante oculos stabat: quã cum uidisset, Et hoc mihi altera mœstitia, quod proprijs pennis intereat.

Adfabulatio. Fabula significat, durum esse, cum quis à suis periculis patiatur.

## V E R M I S, E T V V L P E S.

75

Qui

**Q**ui sub coeno celabatur uermis, super terrā egressus dicebat omnibus animalibus, Medicus sum medicaminum doctus, qualis est Pæon deorum medicus. Et quomodo, ait uulpes, alios curans, te ipsum claudum non curas? Adfabulatio. Fabula significat, nisi præstō experientia fuerit, omne uerbum inane esse.

GALLINA AVRIPARA.

76

**G**allinam quis habens oua aurea parientem, ratus intra ipsam auri massam inesse, occisam alijs Gallinis similem reperit. Hic multum sperans inuenire diuitiarum, & exiguis illis priuatus est. Adfabulatio.

Fabula significat, oportere contentum esse præsentibus, & fugere inexplēbilitatem.

LUPVS, ET VETVLA.

77

**L**upus esuriens circuibat quærendo cibum. Profectus autem ad locum quendam, audiuit lugentem puerulum, eiq; dicentem anum, Desine plorare: sin minus, hac hora tradam te lupo. Ratus igitur lupus seriō loqui aniculam, expectabat ad multam horam. Sed cū aduenisset uespera, audit rursus anum blandientem puerulo, ac dicentem, Si uenerit lupus huc, interficiemus eum fili. His auditis lupus cundo dicebat, In hoc tugurio aliud dicunt, aliud faciunt. Adfabulatio.

Fabula in homines quorum facta uerbis nō respondent.

DE CVLICE, ET LEONE.

78

**C**vlex ad leonem accedens, ait, Neq; timeo te, neq; fortior me es: minus mihi adesse uirium ideo existimas, quòd laceres unguibus, & dentibus mordeas? hoc & femina cum uiro pugnans facit. Ego uerò longè sum te fortior. Si uerò uis, ueniamus ad pugnam. Et cū tuba cecinisset, culex inhæsit mordens circa nares ipsius leueis genas:

leo

leo autem proprijs unguibus dilaniavit se ipsum, donec indignatus est. Culex autem iuncto leone cum sonuisset tuba, & epinicius cecinisset, euolavit. Araneæ uero uinculo implicius cum deuoraretur, lamentabatur quòd cum maximis pugnans, à uili animali aranea occideretur.

Adfabulatio. Fabula in eos, qui prosternunt magnos, & à paruis prosternuntur.

# G V L I E L M V S C A.

NONICVS, D. AVR. AVGV-

stini Florentio suo, illustri Baroni

Iseltseino, S. D.



ABVLAS Aesopi cum ex oratione ligata in solutam uertissem, tibi florentissime Florenti dicare placuit: quàm enim sis amans literarum, ex meo Antonio uiro literatissimo facile intelligo. Nam cum tu quidem quòd eruditum scires, acciuisisti, & is tui amantissimus est, cum ob alia quaedam, tum ob amorem tuum erga literatos. Neq; illud præterire debeo, me quoq; à te uehementer amari, & te commendante magistro Antonio successum desiderio nostri. Apprime sane decere solet, qui genere sit illustris, cum esse amicum & familiarem literarum, quæ, ut cætera commoda earum sileam, uel sole adeò faciunt immortalem. Erit autem harum fabularum lectio tibi, ut opinor, utilis, quippe ubi multa ad bene uiuendum appposita inuenies, grata certè earum lectio, & iucunda non esse non potest. Hactenus autem eas illis, qui alias complures scripserint, fuisse neglectas, satis miror: nec equidem tamen scripturus fuisset, ni & Titus Linius harum in histo-

f ria



ria meminisset, & Flaccum nostrum in epistola usum uiderem, & Quintilianum Institutionum libris uicem suaderere cernerem. Sed satis iam exordij. Illud te admonitum uelim, ne sis inscius, animantes, quæ iam muta sunt, olim fuisse loquaces. Vale, & me, ut facis, ama.

DE GALLO GALLINACEO. I

**G**allus gallinaceus dum uerrit stercorarium, offendit gemmam, Quid, inquit, rem sic nitidam reperio? Si gemmarius reperisset, nihil esset eo letius, ut qui pretium sciret. Mihi quidem nulli est usui, nec magni aestimo: imò equidem omnibus gemmis granum hordei malim.

Morale. Per gemmam artem, sapientiamq; intellige: per gallum hominem stolidum & uoluptuarium. Nec stolidi artes liberales amant, cum usum earum nesciant: nec uoluptuarius, quippe cui una placeat uoluptas.

DE LVPO, ET AGNO. 2

**L**vus ad caput fontis bibens, uidet agnum procul infra bibentem. Accurrit: agnum increpitat, quod turbavit fontem. Trepidare agnus, supplicare, ut parcat innocent: se quādo longe infra biberit, potum lupi nec potuisse quidem turbare, nedum uoluisse. Lupus contra intonat, Nihil agis sacrilege, semper obes. Pater, mater, omne tuum inuisum genus, sedulo mihi aduersatur. Tu mihi dabis hodie poenas.

Morale.

Vetus dictum est, ut canem cedas, facile inueniri baculum. Potens si libet nocere, facile capit nocendi causam: satis peccauit, qui resistere non potuit.

DE MVRE, ET RANA. 3

**B**ellum gerebat mus cum rana. De paludis certabatur Imperio. Pugna erat uehemens, & anceps: mus callidus sub herbis latitans, ex insidijs ranam adoritur: rana uiribus

ribus melior. pectore, & insultu ualens, aperto Marte hostem laceffit. Hasta utriq; erat iuncea. Quo certamine procul uiso, niluus adproperat: dumq; præ studio pugne, neuter sibi cauet, utrunq; bellatorem niluus r:pit, ac laniat.

Morale. Itidem euenire solet factiosis ciuibus, qui accensi libidine dominandi, dum inter se certant fieri magistratus, opes suas, plerūq; etiam uitam in periculo ponunt.

## DE CANE ET VMBRA.

4

CAnis tranans fluuium, rictu uehebat carnem. Splendente sole, ita ut sit, umbra carnis lucebat in aquis. Quum ille uisam auide captans, quod in faucibus erat, perdidit. Itaq; tum rei, tum spei iactura percussus, primū stupuit, deinde animum recipiens, sic elatrauit, Miser, decrat cupiditati tuæ modus: satis superq; erat, ni desipuisses. Iam per tuam stultitiam minus nihilo tibi est.

Morale. Monemur hac fabella modestiæ, monemur prudentiæ: ut & cupiditati sit modus, ne certa pro incertis amittamus. Astute certè Terentianus ille Sannio, Ego, inquit, spem pretio non emo.

## DE LEONE ET QVIBVS DAM ALIIS.

5

CUm oue ac quibusdā alijs pepigerat leo uenationem fore communem: itur uenatum: capitur ceruus: partiantur. Singulas singulis partes tollere, ut conuenerat incipientibus, leo rugijt, Vna, inquiēs, pars mea est, quia sum dignissimus. Altera itidem mea est, quia uiribus præstantissimus. Porro quia in capiendō ceruo plus sudauerim, uen dico tertiā. Quartam deniq; partem ni cōcesseritis, adlum est de amicitia. Socij hoc audito, discedunt uacui, & taciti, non ausi mutire contra leonem.

Morale.

Rara semper fuit fides: apud hoc seculum rarior est: apud potentes, & est, & fuit semper rarissima, Quocirca

f. 2

satius

satius est ut uiuas cum pari. Qui enim cum potentiore uiuit, necesse habet sæpe de suo iure concedere: cum æquali æquale tibi ius erit.

DE LVPO ET GRVE. 6

**L**Vpo uoranti ouem, fortè ossa hædere in gula. Ambit, Lorat opem: opitulatur nemo. Omnes dictitant tulisse eum pretium uoracitatis. Tandem blanditijs multis pluribusq; promissis gruem inducit, ut collo longissimo in gulam inserto, os infixum eximeret. Petenti autem præmium illufit, inepta, inquit, abi: non sat habes quòd uiuis? uitam debes mihi: Si libuisset, licuit præmordere collum tuum.

Morale. Tritum est, perire quod facis ingrato.

DE RVSTICO ET COLVBRO. 7

**R**Vsticus repertum in niue colubrum frigore propè renectum, domum tulit, abiecit ad focum. Coluber ab igni uim, uirusq; recipiens, deinde flammam non ferens, omne tugurium sibilando infecit. Accurrit rusticus correpta sude uerbis, uerberibusq; cum eo iniuriam exposulat. Num hanc referat gratiam? num uitam erepturus sis illi, qui uitam ipsi dederit? Morale.

Fit interdum ut obsint tibi, quibus tu profueris, & male de te mereantur ij, de quibus tu bene sis meritus.

DE APRO, ET ASINO. 8

**D**Vm iners asinus irrideret aprum, ille indignas frenabat. Malum quidem ignauissime fueras meritus, sed etiam si tu poena fueras dignus, tamen ego indignus, qui à te poenas sumam. Irride tutus, impune tibi licet, tutus enim es ob inertiam. Morale.

Demus operam, ut cum indigna nobis audimus, aut patiamur, ne indigna nobis dicamus, aut faciamus. Mali enim & perditii plerunq; gaudent, si quispiam bonorum eis resistat

sistat, magni pendunt haberi se dignos ultione. Imitemur equos, & magnas bestias, qui oblatrantes caniculos, cum contemptu prætereunt.

DE MURE VRBANO,  
& mure rustico.

9

**L**ibitum est urbano muri deambulare rus. Vidit hunc mus rusticus, inuitat, apparatur, itur cœnatum. Depromit rusticus quicquid posuerat in hyemem, & exhaurit omne penu, ut tanti hospitii expleat lautitiam. Urbanus tamen frontem corrugans, ruris damnat inopiam, urbis subinde laudat copiam. Remeans ducit secum in urbem rusticum, ut quæ uerbis iactitaret, re comprobaret. Ineunt conuiuium, quod urbanus splendide compararat. Inter epulandum auditur in sera murmur clauis: trepidare illi, & fugitare fugitando. Rusticus & insuetus, & loci ignarus ægrè se tueri. Discedente famulo redit urbanus ad mensam, uocat rusticum; ille uix tandem metu deposito proreptit. Inuitantem ad pocula urbanum percunctatur, num hoc periculum crebrum sit: Respondit ille quotidianum esse, oportere contemni. Tum rusticus, Quotidianum? inquit, Mehercle istæ dapes plus fellis quàm mellis sapiunt. Equidem malo cum securitate meam inopiam, quàm cum tali anxietate istam copiam.

Morale.

Diuitiæ præ se ferunt quidem uoluptatem, sed si introspicias, habet pericula & amaritudinem. Eutrapelus quidam fuit, qui cum inimicis suis quàm maxime nocere uellet, diuites eos faciebat, dictitans ita se eos ulcisci, quippe accepturos cum diuitijs ingentem sarcinam curarum.

DE AQUILA, ET CORNICULA. 10

**A**quila nacta cochleam, non ui aut arte quiuuit cruere pisicem. Accedens cornicula dat consilium. Suadet sub-  
f 3 uolare

uolare, & è sublimi cochleam in saxa præcipitare, sic enim fore ut concha frangatur. Humi manet cornicula, ut præstoletur casum, præcipitat aquila, frangitur testa, subripitur piscis à cornicula, dolet elusa aquila. **Morale.**

Noli quibusuis habere fidem: & consilium, quod ab alijs acceperis, fac inspicias. Multi enim consulti, non suis consultoribus, sed sibi consulunt.

DE CORVO, ET VULPECULA. II

**P**Rædam nictus strepitat in ramis coruus. Videt uulpecula gesticentem, accurrit: Coruum, inquit, plurima salute impertit uulpes. Sæpe numero audieram famam esse mendacem, iam re ipsa experior. Nam ut hac fortè iam prætereo, suspiciens te in arbore, aduolo culpans famam. Fama enim est, te nigriorè pice esse, & uideo candidiorem niue. Meo sanè iudicio cygnos uincis, & hêdera formosior alba es. Quod si ut plumis, ita & uoce excellis, omnium auium equidem te dixerim reginam. Hæc assentatiuncula illectus coruus, ad canendum apparat, apparanti uerò è rostro excidit caseus: quo correpto, uulpecula cachinnum tollit. Tum demum miserum Coruum pudet, pigetq; sui: & iactura rei in ista pudore dolet. **Morale.**

Nonnò sic audi laudis sunt, ut cum suo probro & damno cœnent assentatorem. Eiusmodi homunciones præde sunt parasitis. Quod si uitaueris iactantiam, facile assentatorum pestiferum genus uitaueris. Si tu uoles esse Thraço, nusquam deerit Gnatho.

DE LEONE SENECTUTE CONFECTO. IZ

**L**Eo qui in iuuentute complures sui ferocitate fecerat inimicos, in senectute exoluit pœnas. Reddunt talionè bestie. Dente aper, cornu petit taurus. In primis asellus, uetus ignauie nomen cupiens abolere, uerbis & calcibus stren

strenuè insultat. Tum gembundus leo, Hi quibus olim nocui, iam uicissim nocent, & meritò. Sed hi quibus aliquando profui, iam uicissim non profunt, imò etiam immeritò obsunt. Stultus fui, qui multos fecerim inimicos, stultior qui falsis amicis confusus fuerim. *Morale.*

In secundis rebus non efferaris, non sis ferox: nam si uultum mutarit fortuna, ulciscuntur quos læsisti: & inter amicos sic habeas discrimen: sunt enim quidam amici non tui, sed mensæ tuæ, sed fortunæ tuæ: quæ quidem fortuna simul ac mutata erit, & illi mutabuntur: & bene tecum actum erit si non inimici fuerint. Meritò queritur Ouid.

En ego non paucis quondam munitus amicis,

Dum flauit uelis aura secunda meis:

Vt uerò nimbo so tumuerunt æquora uento,

In medijs lacera puppe relinquitur aquis.

DE CANE, ET ASINO.

13

**D**um blandiretur canis hero, & familiæ herus, & familia canem demulcet: asellus id uidens, altius gemit, coepit eum pigere suæ sortis, iniquè putat comparatum canem gratum esse cunctis, pasciq; de mensa herili, idq; otio ludoq; consequi: Sese contrà portare clite llas, cædi flagello, nunquam otiosum esse, & cunctis tamen odiosum. Si hæc fiant blanditijs, eam artem, quæ tam utilis sit, statuit scētari. Igitur quodam tempore redeunti domum hero, rem tentaturus, procurrat obuiam, subsilit, pulsat ungulis: exclamante hero, accurrere serui, & ineptus asellus, qui se iubanum credidit, fuste uapulat. *Morale.*

Non omnia possumus omnes (ut ait Vergil. in Bucolicis) nec omnes omnia decent: id quisque uelit, id tentet, quod possit. Non simus id quod Græce significantius dicitur, ὄν & ἄσπας, id est, asinus lyrarum, uel lyrae. Sic au-

f 4 tem

tem Boëthius, Asinus ad lyram positus. Repugnante natura irritus est labor. Tu nihil inuita facies dices uic Minerua, teste Horatio.

DE LEONE, ET MURE. 14

**L**Eo estu cursuq; defessus, sub umbra fronde super uiridi quiescebat. Murium autem grege tergum eius percurrente, experrectus, unum è multis comprehendit. Supplicat captiuus, indignum se esse cui leo irascatur, claudit: reputans ille in nece tantillae bestiulae nihil esse laudis, captiuum dimittit. Nec uero ita multo post, leo forte dum per saltum currit, incidit in plagas, rugire licet, exire non licet. Rugientem miserabiliter leonem mus audit, uocem agnoscit, repit in cuniculos, laqueorum quaerit nodos, quæsitos inuenit, inuentos corrodit, leo è plagis euadit.

Morale. Hec fabella suadet potentibus clementiam. Etenim ut sunt res humanae instabiles, egent interdum ipsi potentes ope humillimorum. Quare uir prudens, & si potest, timebit uel ulli hominum nocere. Qui autem non timet nocere alteri, ualde desipit. Quid ita? Quia etsi iam potentia fretus neminem metuis, forsitan olim erit ut metuas. Constat enim euenisse claris, magnisq; regibus, ut uilium hominicionum uel gratia indiguerint, uel iram metuerint.

DE MILVO AEGROTO. 15

**L**Ecto decumbebat miluus. Iam ferme moriens matremorat precatum ire Deos. Mater respondet, nil opis illi sperandum à dijs, quorum sacra, & aras suis rapinis toties uiolasset.

Morale.

Decet uenerari superos. Illi enim pios iuuant, impios auersantur: in felicitate neglecti, in miseria non exaudient. Quare in secundis rebus sis eorum memor, ut in aduersis rebus praesentes sint uocati.

**C**um primum coeptum est feri linum, hirundo suadet auiculis impedire sementem, dictitans sibi fieri insidias. Irrident ille, stultam uatem hirundinem uocant. Surgente iam lino & uirescente, rursus monet euellere satas. Iterum irrident. Maturescit linum, hortatur populari segetem. Cum ne tunc quidem consulentem audirent, hirundo auium cœtu relicto, hominis sibi conciliat amicitiam. Init cum eo fœdus, cohabitât, cantu demulcet, Cæteris auibus è lino fiunt retia & laquei. **Morale.**

Multi nec ipsi consulere sibi norunt, nec rectè consulentem audiunt. Sed cum in periculis sunt & damnis, tum demum sapere incipiunt, & suam damnare secordiam. Tum sat superq; consilij est: Hoc, inquiunt, & illud factum oportuit. Sed præstat esse Prometheum, quàm Epimetheum. Fuere hi fratres, nomina sunt Græca. Alteri consilium ante rem fuit, alteri post rem, quod declarat interpretatio nominum.

## D E R A N I S, E T E A R V M R E G E. 17

**G**ens ranarum, cum esset libera, Ioui supplicabat dari regem. Ridere Iupiter uota ranarum: illæ tamen iterum atq; iterum instare, donec ipsum perPELLERENT. Deijcit ille trabem, ea moles ingenti fragore quassat fluuium: territæ silent ranæ: regem uenerantur. Accedunt pedetentim propius, tandem abiecto metu, insultant & desultant: iners rex lusui est, & contemptui. Lacesunt rursum Iouem, orant regem dari qui strenuus sit. Dat Iupiter ciconiam. Is præstrenuè perambulans paludem, quicquid ranarum obuium sit, uorat. De huius igitur seuitia ranæ frustra questæ sunt. Iupiter non audit: nam & hodie adhuc queruntur.



runtur. Vesper enim ciconia cubitum eunte, & antris egressa, rancio ululatu murmurant, sed surdo canunt. Vult enim Iupiter, ut quæ regem clementem sint deprecata, iam ferant inclementem. **Morale.**

Perinde atq; ranis euenire solet plebi, quæ si regem paulò mansuetiorem habet, ignavum, inertem esse causatur, optat aliquando contingere sibi virum. Contrà si quando nactus est regem strenuum, huius seuitiam dānat, prioris laudat clementiam, siue quòd semper presentium nos poenitet, siue quòd verum est verbum: Nova veteribus non esse potiora.

DE COLUMBIS, ET EA-

rum rege Accipitre.

18

**C**olumbæ olim bellum gessere cum miluo, quem ut expugnarent, delegerunt regi accipitrem. Ille rex factus, hostem agit non regem. Non segnius ac miluus rapit, ac laniat. Poenitet columbas incepti, satius fuisse putantes, pati bella milui, quàm tyrannidem accipitris.

**Morale.** Neminem suæ sortis nimium pigeat. Nihil est (teste Flacco) ab omni parte beatum. Equidem meam sortem, modò tolerabilis sit, mutari non optem. Multi nova sorte quæsitæ, ueterem rursus optarunt. Ita pleriq; ingenio sumus omnes, nosmet nostri poenitet.

DE FVRE, ET CANE.

19

**F**uri aliquando panem (ut fideat) porrigenti, respondit canis: Infidias tuas novi, panem das quòd desinam latrare: sed ego tuum munus odi. quippe si ego tulero panem, tu ex his testis cuncta asportabis. **Morale.**

Caue parui commodi causa, amittas magnum: caue cuius homini fidem habeas. Sunt enim qui dolo non tantum benigne dicunt, sed & benigne faciunt.

DE LVPO, ET SVCVLA.

20

Partu

**P**arturiebat sucula, pollicetur lupo se custodē fore fœtus. Respondit puerpera, lupo obsequio se non egerē: si uelit pius haberi, si cupiat gratū facere, longius abeat. Lupi enim officium constare, non præsentiā, sed absentia.

**Morale.** Non sunt cuncta credenda cunctis. Multi suam operam pollicentur, non tui amore, sed sui, suum querentes commodum, non tuum.

## DE PARTU MONTIVM.

21

**O**lim rumor erat parturire montes, homines accurrunt, circumsistunt, monstri quippiam non sine pauore expectantes. Pariunt tandem montes, exit mus, tum omnes risu emori.

**Morale.**

Hanc fabellam tangit Horatius, Parturiunt montes, inquit, nascetur ridiculus mus: notat autem iactantiam. Iactabundi enim cum magna profitentur, et ostentant, uix parua faciunt. Quapropter Thrasones illi iure sunt materia ioci, et scommatum. Vetat item hæc fabella inanes timores. Plerumque enim grauior periculo est periculi metus, imò ridiculum est, quod metuinus.

## DE CANE VETULO, QUI

ab hero contemnitur,

22

**C**anem uenaticum, qui iam senuerat, instigat herus, frustra hortatur, tardi sunt pedes, nō properat. Præbenderat feram, fera edentulo elabatur. Increpitat herus uerbere et uerbo. Canis respondet, debere sibi iure ignoscere, iam senuisse, at iuuenem fuisse strenuum. Sed ut uideo, inquit, nil placet sine fructu. Iuuenem amasti, senem odisti. Amasti prædandum, odisti tardum edentulum. Sed si gratus esses, quem olim iuuenem fragis causa dilexisti, senem fructuose iuuentutis gratia diligeres. **Morale.**

Recte canis: Nam teste Nasone.

Nil

Nil, nisi quod prodest, charum est: en detrahe menti  
 Spem fructus avidæ, nemo petendus erit.  
 Præteriti commodi nulla est memoria: futuri autem gra-  
 tia non magna, præsentis commodi summa.  
 Turpe quidem dictu, sed si modò uera fatemur,  
 Vulgus amicitias utilitate probat.

DE LEPORIBVS INANI-  
 ter timentibus.

23

**S**ylua insolito mugiente turbine, trepidi lepores rapidè  
 Occipiunt fugere. Fugientes, cum obsisteret palus, stete-  
 re anxij utrinque comprehensi periculis. Quoq; maioris  
 esset incitamentum timoris, uident in palude mergi ranas.  
 Tum ex leporibus unus prudentior cæteris, ac disertior,  
 Quid, inquit, inaniter timemus? Animo opus est. Corporū  
 quidè agilitas nobis est, sed animus dceft. Hoc periculū tur-  
 binis non fugiendum, sed est contemnendum. *Morale.*

Omni in re opus est animo. Iacet uirtus sine confiden-  
 tia. Confidentia enim dux, & regina uirtutis est.

DE HOEDO, ET LVPO.

24

**C**Apra cum esset pastum itura, hœdum domi conclu-  
 dit, monens aperire nemini, dum redeat ipsa. Lupus,  
 qui id procul audierat, post matris discessum pulsat fores,  
 uoce caprizat, iubens recludi. Hœdus dolos præsentiens,  
 Non aperio, inquit: nam etsi uox caprizat, tamen equidem  
 per rimulas lupum uideo. *Morale.*

Obedire parenti filios, ipsis est utile, & iuuenem seni  
 decet auscultare.

DE CERVO, ET OVE.

25

**C**eruus coram lupo ouem ream facit, modium tritici  
 debere clamitans. Ovis debiti quidem erat inscia, ta-  
 men ob lupi præsentia spondet se daturam: dicitur solutioni  
 dies.

dies. Dies adest, monet ceruus ouem. Illa it inficias. Quod enim promiserit excusat, factum in metu, & praesentia lupi: Votum extortum non esse seruandum. *Morale.*

Sententia iuris est, Vim ui repellere licet. Ex hac fabella noua quaedam nascitur, Fraudem fraude refellere licet.

## DE RVSTICO ET ANGV. 26

**R**vsticus quidam nutrierat anguem. Iratus aliquando, bestiam petit securi. Euadit illa non sine uulnere. Postea rusticus deueniens ad paupertatem, ratus est id infortunij propter anguis iniuriam sibi accidere: igitur supplicat angui, ut redeat. Ille ait ignoscere se, sed redire nolle. Neque enim fore securum cum rustico, cui tanta sit domi securis. Liuiorem uulneris desisse, superesse tamen memoriam. *Morale.*

Ei qui semel fidem soluit, iterum habere fidem uix est tutum: iniuriam quidem donare, id sane misericordiae est: cauere autem sibi, & decet, & prudentiae est.

## DE VVLPPECVLA ET CICONIA. 27

**V**vlpacula uocarat ciconiam ad coenam. Obsonium in mensam effundit: quod cum liquidum esset, ciconia frustra rostro tentante, uulpecula lingit. Abit elusa auis, pigetq; pudetq; iniuriae. Post plusculum dierum redit, inuitat uulpeculam. Vitrum uas situm erat plenum belli obsonij. Quod quidem uas quum esset arcti gutturis, uulpeculae obsonium licuit uidere, & esurire. gustare non licuit. Ciconia rostro facile exhausit. *Morale.* Risus risum, iocus iocum, dolum dolum, fraus meretur fraudem.

## DE LVPO, ET CAPITE PICTO. 28

**L**vpus in officina sculptoris caput humanum repertum luerat, miratur, sentiens id, quod erat, nihil habere sensus. O pulchrum, inquit, caput: est in te artis multum, sed

sed sensus nihil. Morale.

Externa pulchritudo si adsit grata est: sin alterutra carendum est, præstat externa quàm interna careas. Illa enim sine hac interdum incurrit odium, ut stolidus eo sit odiosior quò formosior.

DE GRACULO.

29

**G**raculus ornauit se plumis pauonis. Deinde pulchellus sibi uisus fastidito genere suo, contulit se ad pauonum genus. Ille tandem intellecta fraude, stolidam avem coloribus nudarunt, & plagis affecerunt. Horatius hanc fabellam primo epistolarum libro narrat de cornicula. Ait eam olim adornatam collectis, quæ auibus exciderant, plumis: post, ubi unaquæque auium suam plumam decerpfit, ridiculam fuisse.

Ne si fortè suas repetitum uenerit olim  
Grex auium plumas, moueat cornicula risum,  
Furtiuus nudata coloribus.

Morale. Notat hæc figura eos, qui se gerant æquo sublimius, qui cum his uiuunt, qui & diiores sunt, & magis nobiles. Quare sepe inopes fiunt, & sunt ludibrio. Probè Iuuenalis monet: Ε' cælo descendit, γυνῆ σ'εαυτοῦ, hoc est, Nosce teipsum.

DE MUSCA ET FORMICA.

30

**M**usca altercabatur cum formica se nobilem, illā ignobilē: se uolitare, illam repere: se uersari in tectis regum, illam cauernis latere, segetem rodere, aquam bibere, se splendide epulari iactitabat, & hæc tamen otio nansisci. E regione formica se non ignobilem esse, sed suis natalibus contentam: muscam uagam esse, se stabilem: sapere formicæ grana & fluenta, quòd muscæ pastilli & uina. Atq; hæc se non segni otio, at strenua opera nansisci. Porro  
formi

formicam letam esse & tutam, charam omnibus, exemplar deniq; laboris : Muscam anxiam cum periculo esse cunctis infestam, cunctis inuisam, exemplar deniq; segnitiei. Formicam hyemis memorem, alimenta reponere : muscam in diem uiuere, hyeme aut esuriuram, aut certè morituram.

Morale. Qui pergit quæ uult dicere, quæ non uult audiet. Musca si bene dixisset, bene audisset. Assentior autem formicæ: Videtur enim optabilior uita obscura cum securitate, quàm cum periculo splendida.

## DE RANA, ET BOVE.

31

**R**ana cupida æquandi bouē, se distentabat. Filius hortabatur matrem cœpto desistere: Nihil enim esse ranam ad bouem. Illa secūdum intumuit, clamat natus, Crepes licet mater, bouem nunquam uinces. Tertiū autem quum intumuisset, crepuit.

Morale.

Cuique sua dos est. Hic forma, ille uiribus, hic opibus, ille pollet amicis. Vnum quenque suo decet esse contentum. Vallet ille corpore, tu ingenio. Quocirca quisque semet consulat, ne inuideat superiori, quod miserum est: nec, quod stultitiæ est, certare optet.

## DE EQVO, ET LEONE.

32

**V**enit ad equum comedendum leo. Carens autem præ senectâ uiribus, meditari cœpit artem, medicum se profitetur, uerborum ambage equum moratur. Hic dolo dolum, artem opponit arti. Fingit se nuper in loco spinoso pupugisse pedem, orat ut inspiciens sentem medicus ducat. Paret leo. At equus quanta potuit ui, calcem leoni impingit, & se continuo conijcit in pedes. Leo uix tandem ad se rediens (istū enim propè exanimatus fuerat) Pretium, inquit, fero ob stultitiā, & is iure effugit: Dolum enim dolo ultus est. Morale. Odio digna est simulatio,

*Et simulatione capienda: Non est timendus hostis, qui hostem præ se fert, sed qui cum hostis sit, benevolentiam simulat, is demum timendus, et odio dignissimus.*

DE EQVO, ET ASINO.

33

**E**quus phaleris sellaq; exornatus, cum ingenti hinnitu per uiam currebat. Currenti autem onustus asellus fortè obstabat. Equus ira fremebundus, et fræna ferox spumantia mandens: Quid, inquit, tarde, ignaue obsistis equo? Cede, inquam, aut proculco te pedibus. Asellus contrarudere non ausus, cedit tacitus. Equo autem prouolanti, et cursum intendenti crepat inguen. Tum cursui et ostentui inutilis, ornamentis spoliatur, dein carrario uenditur. Videt postea cum carro uenientem asellus, et affatur: Heus bone uir: quid isthuc ornati es? Vbi aurata sella, bullata cingula? Vbi nitidum frænum? Sic amice necesse fuit euenire superbienti.

Morale.

Plerique in secundis rebus elati sunt, nec sui memores nec modesti. Sed quia prosperitate insoleseunt, aduersitatem incurrunt. Eos qui felices uidentur, monuerim esse cautos. Etenim si rota fortunæ circumacta fuerit, sentient miserimum genus infortunij esse fuisse felicem. Accedet ad cumulum infelicitatis id quoque mali, contemnentur ab ijs, quos ipsi contempsere, et illudent eis ijs, quos ipsi risere.

DE AVIBVS, ET

quadrupedibus.

34

**A**vibus pugna erat cum quadrupedibus. Vtrinque spes, utrinque metus, utrinque erat periculum. Vespertilio autem relictis socijs defecit ad hostes. Vincunt aues duce et auspice aquila. Transfugam uerò vespertilionem damnant, uti ne ad aues unquam illi sit reditio, uti ne luce unquam sit uolatus. Hæc causa Vespertilioni est, ut non nisi noctu,

noſtu uolet.

Morale.

Qui cum ſocijs aduerſitatis & periculi particeps eſſe renuit, proſperitatis & ſalutis expers erit.

DE LVPO, ET VVLPE.

35

**L**Vpus quum prædæ ſatis eſſet, in otio degebat. Accedit uulpecula, ſciſcitatur olij cauſam. Senſit lupus inſidias fieri ſuis epulis, ſimulat morbum eſſe cauſam, orat uulpeculam deprecatum iri deos. Illa dolens dolum non ſuccedere, adit paſtorem, monet petere latebras lupi: hoſtem enim ſecurum poſſe inopinatò opprimi. Adoritur paſtor lupum, maſtat. Illa potitur antro & præda. Sed fuit illi breue ſcleris ſui gaudium. Nam non ita multo poſt idem paſtor & ipſam capit.

Morale.

Fœda res inuidia eſt, & ipſi interdum autori quoque pernicioſa. Flaccus epistolarum primo:

Inuidus alterius rebus macreſcit opinis.

Inuidia Siculi non inueniẽre tyranni

Maius tormentum.

DE CERVO.

36

**C**ervus in perſpicuo fonte ſe conſpicatus, probat proceram frontis & ramoſa cornua: ſed tibiarum exilitatem damnat. Fortè dum contemplatur, dum iudicat, interuenit uenator. Fugit ceruus ocyor pilis, & agente nimbos ocyor Euro. Inſectantur fugiẽtem canes. Sed quum intraſſet condenſam ſyluam, implicita ſunt ramis cornua, tum demum tibiaſ laudabat, & cornua damnabat, quæ fecere ut præda eſſet canibus.

Morale.

Fugienda petimus, petenda fugimus. Placent quæ officiunt, quæ conſerunt diſplicant. Beatitudinẽ cupimus, priuſquam ubi ſit intelligamus. Opum excellentiam & honorum celſitudinem quærimus: in his beatitudinẽ ſitam opi-

g

namur



namur, in quibus tamen multum laboris est, & doloris.  
Pulchrè id significat Lyricus ille noster,

Sæpius uentis agitur ingens

Pinus, & celsæ grauiore casu

Decidunt turres, feriuntq; summos Fulgura montes.

DE VIPERA, ET LIMA. 37

**I**N fabrica offendens limam uipera, cœpit rodere. Sub-  
iristit lima, Quid, inquiens, inepta? quid agi? Tu tibi antè  
côntrinceris dentes, quàm me atteras: quæ duritiem æris  
præmordere soleo. Morale.

Etiam atq; etiam uide, quicum tibi res sit. Si in fortio-  
rem dentes acuis, non illi, sed tibi nocueris.

DE LVPIS, ET OVIBVS. 38

**L**Vpis & agnis, quibus discordia est, fœdus aliquando  
fuit, datis utrinq; obsidibus. Lupi suos catulos, oues ca-  
num cohortem dedere. Quietis ouibus ac pascenibus, lu-  
puli matrum desyderio ululatus edunt. Tum lupi irruen-  
tes, fidem fœdusq; solutum clamitant, ouesq; canum præ-  
sidio destitutas laniant. Morale.

Inscitia est, si in fœdere tua præsidia hosti tradas. Nam  
qui hostis fuit, hostis forsitan nondum esse desijt. Fortassis &  
causam ceperit, cur te nudatum præsidij adoriatur.

DE SYLVA, ET RVSTICO. 39

**Q**Vo tempore etiam arboribus suus sermo erat, uenit  
rusticus in syluam, rogat ut ad securim suam tol-  
lere liceat capulum. Annuit sylua. Rusticus aptata securi  
cœpit arbores succidere. Tum, & quidem serò, pœnituit  
syluam suæ facilitatis. Doluit se ipsam esse causam sui exitij.

Morale. De quo bene increaris uide. Multi fuerunt,  
qui accepto beneficio in autoris abusi sunt perniciem.

DE MEMBRIS, ET VENTRE. 40

Pcs

**P**ES & manus ventrem olim incusarunt, quod ab otioso  
eo lucra ipsorum uorarentur. Iubent aut laboret, aut  
ali ne petat. Supplicat ille semel atq; iterum: negant tamen  
manus alimentum. Exhausto inedia uentre, ubi coepere om-  
nes artus deficere, tum manus uoluit tandem officiosa  
esse, uerum id serò. Nam uenter desuetudine debilis, cibum  
repulit. Ita cuncti artus dum uentri inuident, cum uentre  
pereunte pereunt. **Morale.**

Perinde atque in membrorum societate est, ita habet se  
societas humana. Membrum eget membro, amicus eget  
amico: quare mutuis operis & mutuis officijs utendum  
est. Neque diuitiæ, neque dignitatum apices hominem satis  
tuentur. Vnicum & summum præsidium, complurium  
amicitia est.

## DE SIMIA, ET VULPECULA. 41

**S**imia uulpeculam orat, ut partem caudæ sibi donet ad  
stegendas nates. Illi enim esse oneri, quod sibi foret usui  
& honori. Respondet illa, nihil nimis esse, & se malle hu-  
mum cauda sua uerri, quàm simiæ nates tegi. **Morale.**

Sunt qui egeant, sunt quibus superet. Nulli tamen diui-  
tum id moris est, ut re superflua beet egenos.

## DE CERVO, ET BOBUS. 42

**C**eruus tennatorem fugiēs, coniecit se in stabulum. Bo-  
ues orat ut in præsepe latitare liceat. Boes tutum  
esse negant: mox enim & dominum & famulum affutu-  
ros. Ille securum se esse ait, modò ne ipsi prodant. Intrat  
famulus, occultum foeno non uidet: exit. Gestire ceruus,  
& nihil iam timere. Tum unus è bobus & a quo & consi-  
lio grauis, Facile, inquit, erat hunc, qui talpa est, fallere, sed  
ut herum, qui Argus est, lateas, hoc opus, hic labor est.  
Mox deinde introgreditur herus. Qui ut serui negligenti-

g 2 tiam

tiam corrigit, cuncta lustrans oculis, & præsepe manu tentans, cerui deprehendit sub fœno cornua. Inclamat famulos, accurrunt, feram concludunt, capiunt.

Morale. In aduersis rebus & periculis latebræ difficiles sunt inuentu, aut quia miseros ut cepit, fortuna exagitat: aut quia ipsi metu impediti, & inopes consilij semet imprudentia produnt.

DE LEONE ET VULPECULA. 43

**L**Eo ægrotabat, uiscebant animalia, una officium diffrente uulpecula. Ad hanc legatum mittit leo cum epistola, quæ uenire admoneat: gratissimam rem ægroto fore eius unius præsentia. Nec quicquam periculi fore cur uulpecula metuat: leonem enim primum quidem amicissimum esse uulpeculæ: ideoq; percipere eius colloquium. Deinde ægrotum esse & decumbere, & etiam si, id quod nō erat, uelit, nocere tamen non queat. Rescribit uulpecula, optare se ut leo conualescat, idq; oraturam superos. Ceterum minime usuram, terreri enim se uestigijs. Quæ quidem uestigia cum omnia sint antro leonis aduersa, & nulla auersa, eam rem indicium esse, multum quidem animalium introisse, sed exisse nullum. Horat. in 1. Epist.

Olim quod uulpes ægroto cauta leoni

Respondit, referam, quia me uestigia terrent,

Omnia te aduersum spectantia, nulla retrorsum.

Morale. Caue fidem habeas uerbis: ni caueris, sepe tibi d:buntur uerba. Capienda est coniectura cum ex uerbis, tum ex factis, & ex his illa sunt iudicanda.

DE VULPECULA, ET MUSTELLA. 44

**V**ulpecula longa inedia tenuis, fortè per angustiore rimam in cumeram frumcui repsit. In qua cum probe pasci fuit, dein rursus tentantem egredi, discentius impedit

*diſt uenter. Muſtella luſtantem procul cōtemplata, tandem monet ſi exire cupiat, ad cauum macra redeat, quò macra intrarat.* **Morale.**

*Videas complures in mediocritate lætos eſſe, atq; alacres, uacuos curis, expertes animi mol: ſtijs. Sin hi diuites facti fuerint, uidebis eos mœſtos incedere, nunquam frontem porrigere: plenos curis, animi moleſtijs obrutos. Hanc fabellam ſic Horatius canit lib. 1. Epiſt.*

*Fortè per anguſtam tenuis uulpecula rimam  
Reperat in cumeram frumenti, paſtaq; ruruſ  
Ire foras pleno tendebat corpore fruſtra.  
Cui muſtella procul: Si uiſ, ait, eſſugere iſtinc,  
Macra cauum repetas arctum, quem macra ſubiſti.*

DE EQVO ET CERVO. 45

**E**quus gerebat bellum cum ceruo. Pulſus tandem è paſcuis implorabat opem humanam. Redit cum homine, deſcendit in campum: uictus antea, iam fit uictor. Sed tamen hoſte uicto, & ſub iugum miſſo, ipſe uictor neceſſe eſt ſeruiat homini. Equitem fert dorſo, & frænum ore.

**Morale.** Dimicant multi contra paupertatem, Quæ per fortunam & induſtriam uicta, ſæpe uictoris interit libertas. Domini quidem & uictores paupertatis ſeruire incipiunt diuitijs, anguntur auaritiæ flagris, parſimonie cohibentur fræniſ, nec querendi tenent modum, nec iuſto quidem auaritiæ ſupplicio, partis rebus audent uti. Horatius de hac fabella lib. 1. Epiſt.

*Ceruus equum pugna melior communibus herbis  
Pellebat, donec minor in certamine longo  
Implorauit opes hominiſ, frænumq; recepit.  
Sed poſtquàm uiolens uictor diſceſſit ab hoſte,  
Non equitem dorſo, non frænum reppulit ore.*

g 3 Sic

*Sic qui pauperiem ueritus, potiore metallis  
Libertate caret dominum uellet improbus, atq;  
Seruiet aeternum, qui paruo nesciat ui.*

## AESOPI FABV.

LAE XXXVI. ADRIA-  
no Barlando interprete.

DE DVOBVS ADOLESCENTIBVS. 1



**A**DOLESCENTES duo obsonium  
apud cocum sese emptorios simulant. Coco  
illas res agente, carnem alter è canistro  
surripit, dat socio et sub ueste occulat. Co-  
cus surreptam sibi carnis partem ut uidit,  
furti utriusq; coepit insimulare. Qui abstulerat, per Iouem  
nihil habere: is uerò qui habuit, nihil abstulisse identidem  
deierat. Ad quos, Me quidem, inquit cocus, fur nunc latet,  
sed is inspexit, is scit, quem iurastis. Morale. Si quid  
peccauimus, id non statim sciunt homines: at Deus omnia  
uidet, qui sedet super coelos, & intuetur abyssos. Quod si  
cogitent homines, suppressius, prudentiusq; peceabitur.

DE CANE, ET LANIO. 2

**C**Anis in macello cum lanio carnem abstulisset, in pe-  
des sese continuo quantum potuit coniecit. Lanius ia-  
ctura rei percussus, primum tacuit, deinde animum reci-  
piens, sic procul acclamauit: O furacissime curre tutus,  
impune tibi licet: tutus enim es nunc ob celeritatem. Posthaec  
autem cautius mihi obseruaberis. Morale.

Hæc fabula significat plerosq; omnes tum demum fieri  
cautiores, ubi damnum acceperint.

DE CANE, ET OUE. 3

**C**Anis ouem in ius uocat, panem ex mutuo debere cla-  
mitans:

mitans: illa it inficiat. Miluus, lupus, uultur accersuntur, & affirmant, dānatur ovis, damnatam canis rapit ac deglubit.

Morale. Falsis testimonijs opprimi quā plurimos, cū nemo nescit, tum hæc quā optime docet fabellula.

## DE AGNO, ET LUPO.

4

**A**Gno comitanti caprum, lupus sit obuiam, rogitat cur arelictæ matre olidum potius sequatur hircum, suadetq; ut ad distenta lacte matris ubera redeat, sperans ita fore abductum ut laniet. Ille uerò, Mater me, ô lupe, inquit, huic commisit, huic summa cura seruandi data est, parenti potius quā tibi obsequendum, qui me seducere istis dictis postulas, seductum mox percerpere. Morale.

Noli omnibus fidem habere. multi enim dum alijs uidentur uelle prodesse, sibi interim consulunt.

## DE ADOLESCENTE, ET CATO.

5

**C**Um adolescens quidam in delitijs amoribusq; usurpasset catum, Venerem precibus fatigauit, ut catum in foeminam trāsfiguraret. Commisere scit, & audit orantem Venus, fit metamorphosis, quæ adolescenti misere amanti perplacuit, nempe tota succi plēnula, tota candidula, tota elegantula. Itur deinde in cubiculum, ridetur, luditur. Nec uerò ita multo post percipiens experiri Dea nūquid catus cū corpore mutasset & mores, per impluuium immittit musculum, ibi risu prorfus, atque ludo res digna accidit. Conspectam ilico bestiolam insequitur muliercula. Venus indignans, foemine uultus iterum in Catum,

Cum pedibusq; manus, cum paruis brachia mutat

Cruribus, & cauda est mutatis addita membris.

Morale. Cælum non animum mutant, qui trans mare currunt: nimisq; difficile est assueta relinquere. Naturam expellas furca licet, ipsa recurret, inquit Horatius.

## DE AGRICOLA, ET FILIIS. 6

**C**omplures habebat agricola filios, adolefcēulos, ijꝯ inter se discordes fucere: quos pater elaborans trahere ad mutuum amorem, apposito fasciculo iubet singulos breui circumdatum funiculo effringere: imbecilla ne quicquam conatur etatula. Soluit parens, reddiꝯ singulis utrugulam, quam cum pro suis quisꝯ uiriculis facīle frangeret: O inquit, filioli, sic concordēs uos uincere poterit nemo: sed si mutuis uolueritis scēire uulneribus, atꝯ intestinum agitare bellum, erūis tandem praeda hostibus.

Morale. Docet hic apologus, concordia paruas res crescere, discordia magnas dilabi.

## DE ASINO, ET EQVO. 7

**R**usticus equum uacuum, asinumꝯ; sarcinulis egregiē onustum producit ad uiam, defessus asellus, equum sibi onere ut adiutet, orat, si saluum uelit. Negat facturum equus. Asellus tandem sarcinæ pondere grauat⁹ procumbit, moritur. Herus omne onus, mortui quoꝯ aselli corium, in equi dorsum reclinat: quibus cū ille deprimeretur, Me miserum, inquit, merito meo si nunc exerceor, qui dudum laboranti asino opitulari nolui.

Morale. Monemur hac fabula, ut oppressis subueniamus amicis: ortus nostri (inquit Plato) partem sibi patria uendicat partem amici.

## DE CARBONARIO ET FVLLONE. 8

**F**vllonem inuitabat carbonarius, ut secum in unis edibus habitaret. Fullo, Non est, inquit, mi homo, isthuc mihi uel cordi, uel utile: uereor enim magnopere, ne quæ ego eluam, tu reddas tam atra quàm carbo est.

Morale. Monemur hoc apologo cum inculpatis ambulare: monemur sceleratorum hominum consortia ueluti pestem

pestem quandam deuitare. Trahunt, inquit Campanus, hominem sodalitia, commercia etiam in mores penetrant, & perinde quisque euadit, ut quibus cum uersatur.

## D E A V C V P E.

9

**I**T uenatum auceps, uidet nidulantem procul in altissima arbore palumbum, adpropiat, deniq; insidias molitur, premit fortè calcibus anguem. Hic mordere: ille improviso exanimatus malo, Me miserum, inquit, dum alteri insidior, ipse dispero.

Morale.

Significat hæc fabula, nonnunquam eos suis artibus circumueniri, qui res nouas moliuntur.

## D E B U C C I N A T O R E, S E V T V B I C I N E.

10

**B**Vccinator quidam ab hostibus capitur, abducitur: trepidare ille, supplicare, ut parcant innoxio, se quando nihil unquam armorum præter unam buccinā gestauerit, hominem ne potuisse quidem occidere, nedum uoluisse. Illi contrà murmure tum sæuo, tum uerberibus intonant, Nihil agis scelus, maxime nocet, atque nunc hic trucidabere, quòd cum ipse, ut fateris, sis rei militaris imperitus, cornu isthoc tuo aliorum excitas, eubrasq; animos.

Morale.

Grauiissime peccant nonnulli, qui ad mala alioqui satis pronis principibus, ut inique agant, consulunt, atq; huiusmodi quædam ad illorum aures occinunt, Quid etiam dubitas? an te principem esse oblitus es? an non tibi quod lubeat licet? tu legibus maior, in te legirupæ nomen cadere haud potest, qui ipsis etiam dominaris legibus: tui nihil possident quod tuum non sit: potes & seruare & perdere: tibi fas est opibus dignitateq; augere quem uisum sit, fas est ubi libuerit adimere. Alios alia uel damnant, uel condemnant, tibi nihil non honestissimum futurum.

## D E L V P O, E T C A N E.

11

g 5

Lupus



**L**upus canē ante lucē in sylua forte fortuna sit obuīam, salutatur, aduentum gratulatur, deniq; rogat quo pacto tam sit nitidus. Cui ille, Herilis cura hoc efficit, herus me blandientem sibi demulcet, de mensa pascor herili nitidissima, nunquam sub dio dormito, tum uniuersæ familiæ non dici potest quā sim gratus. Næ tu ( inquit lupus ) multo es felicissimus o canis, cui tam benignus & comis contigit herus, quocum o utinam cōmorari & mihi liceat, nullum me animantium esset uspiam fortunatius. Canis noui status cupidissimum uidens lupum, effecturum se pollicetur, ut hæreat in parte aliqua apud herum, modò de pristina ferocia aliquid remittere, & seruitutē seruire uelit. Stat sententia: lupo libitum est deambulare ad uillam. Sermones edunt in itinere prorsus iucundissimos. Postea uerò quā illuxit, cōtritum canis collum uidens lupus, Quid sibi uult, inquit, o canis tua isthæc prorsus deplata ceruix? Solebam, inquit ille, feroculus notis pariter & ignotis allatrare, obmordereq; nonnunquam: id ægrè ferens herus, crebris me tundeat uerberibus, prohibens etiam, ne quē præter furem lupumq; adorirer: ego sic uapulando uictus sum, eo mitior factus, hocq; genialis seuitiæ seruauī signum. Lupus hoc audito, Ego, inquit, heri tui amicitiam tanti non emo. Vale igitur o canis cum tua isthac seruitute: mihi mea potior est libertas.

Morale.

Optabilius est in humili casa dominū esse, panem atrum uorare, quā in amplissima regia opiparis mensis frui, & obnoxium trepidumq; agere. Nam libertas sublimi exultat aula, ubi accipiendæ uenit & musitanda iniuria est.

DE AGRICOLA, ET CANIBVS. 12

**A**.gricola quum ruri plusculos hyemasset dies, cœpit tandem necessariarū rerum penuria laborare: inter-

ficit

fixit oves, mox & capellas, postremò boues quoq; mactat, ut habeat quo inedia pane exhaustum corpusculum sustentet. Id uidētes canes, salutem fuga querere cōstituunt: sese enim non uicturos diutius, quando ne bobus quidem, quorum in opere rustico faciundo utebatur opera, pepercit herus.

Morale. In quam domum mercedis gratia te tradas, uide. Nonnulli inhumanissimi sunt heri. Multi enim ho die cō dementiæ proli buntur, ut uel seruos infortunio malo & damno libenter mactent.

DE VULPE, ET LEONE. 13

Vlpecula, quæ leonis immunitatem insuetam habebat, semel atq; iterum id fortè animalis contemplata, trepidare & fugitare. Quum iam tertio obtulisset sese obuiam leo, tantum absuit ut metueret quicquam uulpes, ut confidenter illum adierit, salutaueritq;. Morale.

Omnes nos consuetudo audaciores facit, uel apud eos, quos antea aspicere uix ausi fuimus.

DE VULPE, ET AQUILA. 14

Vlpecula proles foras excurrerat, ab aquila comprehensa, matris fidem implorat: accurrit illa: ut captiuam prolem dimittat, aquilam rogat: aquila nacta prædā ad pullos subuolat: uulpes correpta face quasi illius munitiones incendio absumptura esset, insequitur. Quū iam arborem cōscendisset & ipsa, Nunc te, inquit, tuosq; si potes tuere. Trepidans aquila, incendium dum metuit, Parce, inquit, mihi, paruisq; liberis, tum quicquid habeo reddidero.

Morale. Per aquilam potentis atq; audacis animi homines intellige: per uulpem pauperculos, quos calūnijs premere, contumelijsq; afficere, diuitibus æquè studium est. Verum, quando est sua & fornicis ira, impotentes ij acceptam interdum probe ulciscuntur iniuriam.

DE AGRICOLA, ET CICONIA. 15

**G**ruibus anseribusq; sata depascentibus laqueum praetendit rusticus: capiuntur grues, capiuntur anseres, capitur & ciconia. Supplicat illa innocentem sese clamitans, & nec gruem nec anserem esse, sed auium omnium opitiam, quippe quae parenti sedulo semper inferuere, eundemq; senio confectum alere consueuerit. Agricola, Horum, inquit, nihil me fugit: uerum cum nocentibus postquam te cepimus, cum his quoq; morieris. *Morale.*

Qui flagitium committit, & is qui impurus se adiungit socium, pari poena plectuntur.

DE GALLO, ET CATO. 16

**V**enit ad gallum comedendum catus: non satis autem habens ad nocendum causae, gallum criminari occipit, obstreperam esse auem dictitans, utpote quae uoce tam acuta noctu dormientis homines expergefaciat. Ille se innocentem ait, quum sic excitet in opera mortales. Catus contra intonat, Nihil agis scelerate: cum matre rem habes, nec sorore abstines. Id gallus quoq; expurgare quum nitretur. Nec hoc, inquit, perseverantius seuerus catus, quicquam facis, tu mihi hodie discerperis. *Morale.*

Vetus dictum esse ait Gulielmus Gaudanus ut canem cedas, facile inueniri baculum. Malus si libitum fuerit, quo iure, quaq; iniuria te praecipitem dabit.

DE OPILIONE, ET AGRICOLIS. 17

**P**er editiore pratulo oves pascebat, atque per iocum terq; quaterq; lupum adesse clamitans, agricolas undiq; exciebat: illi sepius elusi, serio auxilium imploranti dum non subueniunt, fiunt oves praeda lupo. *Morale.*

Si mentiri insueuerit quispiam, huic si quando uerum narrare occiperit, haud facile habebitur fides. Superiori apolo

logo finitimus est ille apud Horat. de plano scurra iocus:

Nec semel irrisus triuijs attollere curat  
 Fracto crure Planum, licet illi plurima manet  
 Lacryma, per sanctum iuratus dicat Ostrim,  
 Credite, non ludo, crudeles tollite claudum.  
 Quære peregrinum, uicinia rauca reclamat.

DE AQUILA, ET CORVO. 18

**R**upe editissima in agni tergum deuolat aquila. Vidēs  
 id coruus, imitari, uelut simius, gestit aquilam in arie  
 tis uellus se demittit, demissus impeditur, impeditus com-  
 prehenditur, comprehensus proijcitur pueris. Morale.

Non aliorum, sed sua se quisq; uirtute æstimet. Tuo te  
 pede metire, inquit Horatius. Id uelis, id tētes, quod possis.

DE CANE INVIDO, ET BOVE. 19

**P**ræsepio fœni pleno decumbebat canis. Venit bos ut  
 comedat. Ille sese surrigens, prohibere. Bos, Dij te cum  
 tua istac inuidencia perdant, inquit, qui nec fœno uesceris,  
 nec me uesci sinis. Morale.

Eo sunt ingenio plerique ut alijs inuideant, quod ipsi  
 mentis inopia assequi nequeunt.

DE CORNICE, ET OUE. 20

**S**trepitat in ouicula dorso cornicula. Ouis, Cani inquit,  
 si sic obstrepere, ferres infortunium. At cornix, Scio,  
 inquit, quibus insultem, placidis molesta, seuis amica.

Morale. Impotenti & sincero perpetua est cum  
 malis parata certatio. Illiditur solo innocentissimus quisq;  
 nocentis uerò præferocis hominis aures adstrepit nemo.

DE PAVONE, ET LUSCINIA. 21

**P**auo apud summi Iouis sororem & coniugem Iano-  
 nem, quæritur lusciniæ suæ cantillare, se ob raucam  
 rauim ab omnibus irrideri. Cui Iuno: Dos sua à dijs cuiq;  
 Lusciniæ

Luscinia cāntu, tu plumis longe superat: unumquenq; sua  
sorte decet esse contentum. *Morale.*

Quæ diu largiuntur, grato sumamus animo, neq; ma-  
iora quæsierimus. Superi temere agunt nihil.

DE MUSTELLA, ET MVRIBVS. 22

**M**ustella præ senio uiribus carēs, mures iam ita, ut so-  
let, insequi nō uolebat, meditari cepit dolum, in fa-  
rinulæ se colliculum illatebrat, sic sperans fore, ut citra la-  
borem uenetur. Accurrūt mures, & farinam esitare dum  
cupiunt, ad unum omnes à mustella uorantur. *Morale.*

Vbi uiribus quispiā destitutus fuerit, ingenio opus est. Ly-  
sander Lacedæmonius subinde dicere solebat, quò nō per-  
ueniret leonina pellis, uulpinā assuendā esse: quod sic luci-  
dus dixeris, Vbi uirtus nō satis potest, adhibēda est astutia.

APOLOGVS EX MAN-

tuano traductus.

23

**R**usticus quidam ex malo, quam in proximo habebat  
agello, sapidissima quotannis legebat poma, hero le-  
cta donabat urbano, qui illeclus incredibili pomorum dul-  
cedine, malum tandem ad se transtulit: ea ueterrima repen-  
tē exaruit, atq; ibi poma pariter & malus perire. Quod  
cum patrisfamiliās nuntiaretur: Heu difficile est, inquit, an-  
nosam transplantare arborem. Satis superq; fuerat, si fræ-  
nos meæ nouissem imponere cupiditati, fructus ramo de-  
cerpere. Hanc fabulam sic Mantuanus:

Rusticus ex malo dulcissima poma legebat,

Vnde dare urbano dona solebat hero.

Ast herus illeclus frugum dulcedine, molum

Transtulit in laribus proxima rura suis.

At quia malus erat senior, translata repen-  
tē

Aruit, & proles cum genitrice obiit.

Heu

*Heu malè transfertur, senio quum induruit arbor,*

*Inquit herus, fuerat carpere poma satis.*

*Morale eiusdem.*

*Qui nimium sapiunt, atq; inconcessa sequuntur.*

*Desipiunt: cohibet qui sua uota sapit.*

## F A B V L A E M. P E T R O S C O-

to, uiro ornatissimo, eidemq; humanissimo,

scriptæ à Barlando.

## D E L E O N E, E T R A N A.

24

**A** Vdire uocem uisus leo prosiliit: subsistit non sine trepidatione, magni quippiam expectans: egreditur tandem aquis ranula. Leo deposito metu appropians, bestiolam proculcat pedibus.

*Morale.*

*Vetat hic apologus inanes timores, ut illa à Gulielmo Gaudano uersa fabula de partu montium.*

## D E F O R M I C A.

25

**S**itiens uenit ad fontem ut biberet formica, incidit fortè in puteum: opitulatur eminus, ex arbore deiecto ramo, columba. Ramum conscendens formica seruatur. Adest, columbam ut capiat, auceps: non sinit formica, aucupis pedem arripit mordicus, auolat columba.

*Morale.*

*Docet fabula, præclare meritis referendâ esse gratiam.*

## D E P A V O N E, E T P I C A.

26

**G**ens auium quum liberè uagaretur, optabat sibi dari regem, Pauo se in primis dignum qui eligeretur putabat, quia esset formosissimus. Hoc in regem accepto, pica, O rex, inquit: si te imperante aquila nos præstrenuè ut solet, insequi cœperit, quo illam modo abiges? quo nos pacto seruabis? *Morale.* In principe non tam forma, quàm corporis fortitudo spectanda est, & prudentia.

## D E A E G R O T O E T M E D I C O.

27

*Medicus*

**M**edicus curabat ægrotum, ille tandem moritur. Tum ad cognatos medicus: Hic, inquit, intemperantia periit. Morale. Bibacitatem & libidinem nisi quis maturè reliquerit, aut nunquam perueniet ad senectutem, aut perbreuem est habiturus senectutem.

DE LEONE, ET ALIIS.

28

**L**eo, asinus, uulpes eunt uenatum: capitur ampla uenatio: capta partiri iussa. Asino singulas singulis partibus ponente, irrugit leo: asinum rapit, ac laniat. Postea uulpecula id dat negotij: quæ astutior, cum leoni longe optima proposita parte, sibi uix minimam particulam reseruasset, rogat leo à quo sic docta sit: cui illa, Huius me, inquit, calamitas docuit, mortuum asinum ostendens. Morale.

Felix quem faciunt aliena pericula cautum.

DE HOEDO ET LVPO.

29

**F**enestra prospectans hædus, prætereuntē lupum conuitijs incesse audebat: cui lupus, Non tu, ait, scelesti mihi conuitiaris, sed locus. Morale.

Et tempus & locus sæpe audaciam addunt homini.

DE ASINO.

30

**A**sinus de hortulani seutia quæres, Ioui supplicat aliū dari herum. Exaudire Iuppiter uota asini, dat tegularium. Apud quem cum tegulas, grauioraq; tergo uectaret onera, accessit rursus Iouem, orat dari, qui mitior sit. Ridere Iuppiter: ille tamē non destitit instare, orare usque adeo donec perpelleret. Dat ille coriarium: quem ubi pernouit asellus, Me miserum, inquit, qui dum nullo sum contentus domino, in eum inciderim, qui ne corio quidē meo, quantum auguror, parcat. Morale.

Semper damnamus quæ presentia sunt: & noua appetimus, quæ (ut dici solet) ueteribus non sunt potiora.

DE AN

DE ANV, ET ANCILLIS. 31

**A**Nus quædam domi habebat ancillas complures, quas quotidie antequam luceſceret, ad galli gallinacci, quæ domi alebat, cantum excitabat ad opus. Ancillæ quotidiani tandem negotij cōmotæ tædio, gallum obtruncant, ſperantes iam necato illo in medios ſeſe dies dormituras: ſed hæc ſpes miſeras fruſtrata eſt: hera enim ut interemptum gallum reſciuit, intempeſta deinceps nocte ſurgere iubet.

**Morale.** Non pauci grauius malum dum ſtudent euitare, in alterum diuerſum incidunt. Peruulgatum eſt, Incidit in Scyllam, qui uult uitare Charybdim.

DE ASINO ET EQVO. 32

**A**Sinus beatum putabat equum, quod pinguis eſſet, & in otio degeret: ſe uerò infelicem dicebat, quod macilentus eſſet, ac ſtrigoſus, quotidie ſerendis oncribus ab immiti hero exerceretur. Haud multo poſt ad arma conſecratum eſt. Tum equus non equitem dorſo, nō frænum reſpuli ore, nec telum corpore: hoc uiſo, aſinus magnas dijs gratias agebat, quod non equum ſe, ſed aſinum feciſſet.

**Morale.** Miſeri ſunt quos uulguſ beatos iudicat, & non pauci beati qui ſe miſerrimos putant. Sutor crepidarius regem dicit felicem, quem omnium rerum compotem uidet, non conſiderans in quantas rex ſollicitudines diſtrahatur, dum interim ipſe optima cum paupertate cantillet.

DE LEONE ET CAPRA. 33

**E**Dita rupe ambulanti capram fortè conſpicatus leo, monet ut potius in uiride pratum deſcendat. Capra, Facerem fortæſſis, inquit, ſi tu abeſſes, qui mihi non iſtud ſuades, ut ego inde ullam capiam uoluptatem, ſed ut tu habeas quod uores famelicus. **Morale.** Omnibus ne habeas fidem: quidam enim non tibi, ſed ſibi conſulunt.

h

DE



DE VULTRE ALIISQVE AVIBVS. 34

**A**nnuum se natalem celebrare adsimulat uultur, auiculas ad coenam inuitat, ueniunt pleræq; omnes, uenientes magno plausu, fauoribusq; accipit, acceptas laniat uultur. *Morale.*

Non sunt amici omnes, qui blandè dicunt, aut benignè se facere uelle simulant: latent sub hoc melle uenena.

DE ANSERIBVS. 35

**A**nseres unà cum gruibus agrum uastabant: quibus auditis, rustici protinus in illos feruntur. Rusticos conspicatæ auolant grues, capiuntur anseres, qui impediti corporis onere subuolare non poterant. *Morale.* Expugnata ab hostibus urbe, facile se subducit inops, at diues seruit captus. In bello diuitiæ magis oneri sunt quàm usui.

DE IOVE ET SIMIA. 36

**I**upiter scire percipiens, quisnam mortalium scitissimos lederet liberos, conuocari iubet quicquid uspiam est animantium. Concurritur ad Iouem undiq;: aderat iam alitù, pecudumq; genus: inter quos & simia, deformes catulos brachio gestans, cùm aduenisset. à risu nemo temperare potuit, quin etiam Iupiter ipse profuse admodum risit. Ibi continuo simia ipsa, Imò, inquit, nouit & Iupiter iudex nosler catulos meos magnopere omnes quotquot adsunt, præcellere. *Morale.* Suum cuiq; pulchrum, ut est adagium. Et alibi apud Theocritum in Idyl. Quæ minime sunt pulchra, ea pulchra uidentur amanti.

ANIANI FABVLAE IIII.

Adriano Barlando interprete.

DE QVERCV ET ARVNDINE. I

**F**astus olim atq; adeò insolentia plena quercus, arundinem aggressa est: Si nunc, inquiens, pectus animosum tibi

tibi, procede agetum ad pugnam, ut nosler duarum euentus ostendat, utra uiribus præstet: arundo quercus cantum, exultationem, fortitudinisq; iactationem uanam nihil mirata, sic respondit: Certamē nunc abnuo, nec meæ sortis me piget: Nam etsi in omnem partem mobilis, tempestates tamen peruinceo sonoras: tu, si semel uaslo rex Acolus antro luctantes emisserit uentos, cōcides, & nūhi tum rideberis.

Morale. Declarat hæc fabella, non eos semper fortissimos esse, qui nulla etiam lacesiti iniuria, alijs insultant.

## DE PISCATORE ET PISCICVLO. 2

Piscator iacto in aquam hamo cibus illito, pisciculū eduxit: orat obsecratq; captiuus, se minutulum uti abire sinat, & adolescere, ut postea maiore potiatur. Piscator, Ego, inquit, spem pretio non cmo, quippe qui eo sucrim ingenio semper, ut quicquid possem, malletm auferre potius in presentia.

Morale.

Hæc nos monet fabella, ne certa unquam incertorum spe unguibus amittamus. Quid enim stultius (ut est apud Ciceronem) quàm incerta pro certis habere?

## DE FORMICA ET CICADA. 3

Appetente hyeme frumentum in areolam ad solem trahebat formica: uidet id cicada, accurrit, rogat granum: formica, Cur non, inquit, & tu meo exemplo æstate trahis quodcunq; potes, atq; addis acervos? Respondet illa, sibi id temporis cantando transigi. Ridens formica, Si, ait, æstate cantitare soles, meritò nunc esuris.

Morale. Monemur hæc fabula, dum adhuc robur corporis adest, quærere ea, quibus imbecilla sistetur senectus. Per hyemem senectutem intellige. Per æstatem adolescentiam & florem illum ætatis.

## DE LEONE ET TAVRO. 4

b 2

Leon

**L**eonem fugitabat taurus, in hircum incidit : is cornu, & caperata minitabatur fronte : ad quem plenus ire taurus, Non tua, inquit, in rugas contracta frons me terri-  
tat, sed immanem metuo leonem, qui nisi tergo hæeret  
meo, iam scires non ita paruum rem esse pugnare cum tau-  
ro, & nostro sequi de uulnere sanguinem. *Morale.*

*Calamitosus non est addenda calamitas. Sat miser est, qui semel est miser.*

## ANIANI FABVLÆ

TRIGINTA OCTO, GV-

lielmo Hermanno diui Augustini or-  
dinis canonico interprete.

DE NVTRICE ET LUPO. I



**N**UTRIX minatur puerum plorātem,  
ni taceat, dari lupo. Lupus id fortē audit,  
sæpe cibi manet ad fores. Puer tandem sile-  
scit obrepente somno. Regreditur lupo  
in syluam ieiunus & inanis : lupa ubi sit  
præda, scitatur. Genubundus ille, Verba, inquit, mihi da-  
ta sunt : puerum plorantem se abicere minabatur nutrix,  
at sefellit. *Morale.* Fœminæ non est habenda fides.

DE TESTVDINE, ET AQVILA. 2

Ceperat testudinem tædium reptandi. Si quis eam in coe-  
lum tolleret, pollicetur baccas maris rubri. Sustollit eam  
aquila, poscit præmium. Non habentem fodit unguibus. Ita  
testudo, quæ concupijt uidere astra, in astris uitam reliquit.

*Morale.* Tua sorte sis contentus. Fuere nonnulli qui  
si mansissent humiles, poterant esse tuti : facti sublimes, in-  
ciderunt in pericula.

DE

DE CANCRIS, MATRE, ET FILIO. 3

**C**ancrum retrogradū monet mater antrorsum ut eat:  
 filius respōdet, Mater, inquit, i præsequar. *Morale.*  
 Nullum reprehēderis uitij, cuius ipse queas reprehēdi.

DE SOLE ET AQUILONE. 4

**S**OL, & uentus Aquilo certant, uter sit fortior. Conuen-  
 tum est experiri uires in uiatorem, ut palmā ferat, qui  
 excusserit manticam. Boreas horrifono nimbo uiatorē ag-  
 greditur: at ille non desistit, amictum gradiendo duplicans.  
 Adsumt uices solis, qui nimbo paulatim euictō, emoliunt ra-  
 dios: incipit uiator aestuare, sudare, anhelare. Tandem pro-  
 gredi nequiens captat frigus opacum, atque sub frondoso  
 nemore abiecta mantica, resedit: ita Soli contigit uictoria.

*Morale.* Quicum certes etiam atq; etiam uide. Nam  
 & si tu fortis es, est forsitan alius te fortior. Aut si non for-  
 tior, certe callidior, ut consilio suo tuum uincat robur.

DE ASINO. 5

**A**sinus uenit in syluam, offendit exuias leonis: quibus  
 indutus redit in pascua, greges armenta q; territat, &  
 fugat. Venit qui perdiderat, quæritat suum asinum. Asinus  
 uiso hero occurrit, inò cum rugitu suo incurrit. At herus  
 prehensis quæ extabant auriculis, Alios licet, inquit, fallas,  
 ego te aselle mi probe noui. *Morale.*

Quod non es, nec te esse simules. Non doctum cum sis  
 indoctus, non diuitem, non nobilē, cum sis pauper & igno-  
 bilis, te iactes. Vero enim comperto rideberis.

DE RANA ET VULPE. 6

**R**ana egressa paludem, in syluis apud feras medicinā  
 profutetur. Ait se nec Hippocrati, nec Galeno cede-  
 re. Cæteris habentibus fidem illudit uulpes. An hæc, inquit,  
 medicinæ habebitur perita, cui sic pallet os? Quin curat se-  
 h 3 ipsam?

ipsam? Sic illuſit uulpes. Eſt enim ranæ os cæruleo colore.

Morale. Stultitia eſt profiteri quod neſcias, & ridiculū.

DE CANE MORDACI. 7

**C**Ani ſubinde homines mordenti, ut ſibi quiſque caueret, alligauit dominus nolam. Canis ratus uirtuti ſue tributum decus, ſuos populares deſpicit. Accedit ad hunc canum aliquis iam ætate, atque autoritate grauis, monens eum ne erret. Nam iſta, inquit, nola data eſt tibi in dedecus, non in decus.

Morale. Glorioſus interdum ſibi ducit laudi, quod ipſi eſt uituperio.

DE CAMELO. 8

**C**amelus ſui poenitens, querebatur tauros inſignes ire geminis cornibus, ſe inermem obiectum cæteris animalibus. Orat Iouem donari ſibi cornua. Ridet Iupiter ſtultitiam cameli, nec modò uotum negat, uerum & auriculas beſtiæ decurtat.

Morale.

Sit quiſq; fortuna contentus ſua. Etenim multi fortunam ſequuti meliorem, incurrere peiorem.

DE DVOBUS AMICIS, ET VRſO. 9

**D**vo amici faciunt iter. Occurrit in itinere urſus. Vnus arbore conſenſa, pericula cuitat: alter quum ſpes fugæ non eſſet, collidit ſe humi. Accedit belua, contrectat iacentem, os explorat & aures. Homine ſpiritum continente ac motum, urſus qui mortuis parcat, ratus caduer eſſe, innocuus diſcedit. Percunſtanti poſtea ſocio, quid nam beſtia dixiſſet iacenti in aurem, hoc monuiſſe ait, ne unquam cum illiuſmodi amicis iter faceret.

Morale.

Rara auis in terris, nigroq; ſimillima cygno, fides eſt. Verum amicum res aduerſæ & pericula monſtrant.

DE EQVITE CALVO. 10

Eques

**E**ques caluus illigarat pilco comam factitiā. Venit in campum, ac i spirante Borea: ac dum male obseruat capillatū galeā, subito apparet caluities. Tollit cachinnū corona, necnon & ipse ridet. Quid noui est, inquit, auolare capillos alienos, quū olim defluerint qui fuerāt mei. Morale. Belle fecit eques, qui non est indignatus, sed cum ridentibus risit. Socrates uerò cū accepisset in foro alā pam, hoc modo respondit, Melesum esse nescire homines, quando debeant prodire cum galea.

## DE DVABVS OLLIS.

11

**D**væ ollæ steterē in ripa: altera erat lutea, altera ærea: utraq; tulit uis fluij. Luteæ collisionem metuenti, respondet ærea, ne quid timeat, sese enim ne collidantur satis curaturam. Tum altera: Seu me, inquit, tecum, seu te mecum flumen coliserit, cum meo utrunque fiet periculo. Quare certum est à te separari. Morale.

Satius est uiuere cum socio pari, quā cum potentiore. A potentiore enim potest esse periculum tibi, non illi à te.

## DE RVSTICO ET FORTVNA.

12

**R**vsticus quū araret, offendebat in sulcis thesaurum. Gratias agit Telluri, quæ hunc dedisset. Fortuna uidens nihil honoris haberi sibi, ita est secum loquuta, Thesauro reperto stolidus mihi non est gratus: at eo ipso thesauro postea amisso, me primam omnium uctis & clamore sollicitabit. Morale. Beneficio accepto grati simus bene de nobis merenti. Ingratitudo enim digna est etiam beneficio, quod iam acceperit, priuari.

## DE TAVRO ET CAPRO.

13

**E**vgit leonem taurus, uenit ad speluncam, quærens latibulum: intranti occursat cornibus, qui intus erat caper. Tum his uerbis bos emugit: Tu quidem cornibus tuis  
h      †      meam

meam excipis fugam: uerum si abierit quæ fugio, quantum à uiribus tauri distet caper, tum senties. *Morale.*

Qui nescit miseris esse succurrendum, aut certe non nocendum, caper est. Quisquis enim à miserorum iniuria non temperauerit, si (ut est fortuna mutabilis) miseris redierit felicitas, nimirum nocuisse miseris cum poenitebit.

DE SIMIA ET EIVS PROLE. 14

**O**Mneis animantes suo conspectui Iupiter adesse iusserrat, cuius nã soboles esset pulcherrima iudicaturus. Properant feræ, aduolant aues, necnon ad id certamen adnatant pisces. Omnium postrema festinat simia, trahens secum suam prolem. Cuius quidem prolis fœdas nates cunctis ridentibus, sic inquit: Maneat, cui fauerit Iupiter, uictoria. Meo tamẽ iudicio, hic meus natus est bellus, & omnium natis iure præferendus. Hoc dicto subrisit & Iupiter.

*Morale.* Et nos & nostra nobis placent. Sed de nobis & de nostris factis, aliorum sit iudicium: ne si ipsi iudicemus, cum simia rideamur.

DE PAVONE ET GRUE. 15

**P**Auo & grus unà cœnant. Pauo se iactat, caudã ostentat, gruem contemnit. Grus fatetur pauonem formosis esse pennis: se tamen dum uix tectis superuolat pauo, animoso uolatu penetrare nubes. *Morale.*

Nemo alterum contempserit. Sua cuiq; dos, sua cuiq; est uirtus. Qui tua uirtute caret, forsã habet qua careas tu.

DE QVERCV ET ARVNDINE. 16

**V**alidiore Noto effracta quercus, in flumen præcipitat. Dumq; fluitat, hæret fortè ramis suis in arundine, miratur arūdinem in tanto turbine stare incolumem. Hæc respondet, cedendo, & declinando se esse tutam, inclinare ad Notum, ad Boream, ad omnem flatum. Nec mirum esse quod

quod quercus exciderit, quæ non cedere, sed resistere concupivit. Morale. Potentiori ne resistas, sed hunc cedendo & ferendo uincas. Quod pulchrè docet facundissimus poetarum Vergilius,

Nate dea, quò fata trahunt retrahuntq; sequamur.

Quicquid erit, superanda omnis fortuna ferendo est.

DE TIGRIDE ET VULPE. 17

**V**enator iaculis agitabat feras. Tigris iubet omnes feras absistere, sese unam aut bellum confecturam. Pergit uenator iaculâri. Tigris oppidò sauciatur. Fugientem è prælio, telumq; extrahentem, percunctatur uulpes quisnam ualentem beluam tam ualide uulnerasset. Respondit, se autorem uulneris haud nosse, uerum ex uulneris magnitudine capere se coniecturam, aliquem fuisse uirum.

Morale. Fortè plerumq; sunt temerarij, & ars uim, ingenium fortitudinem superat.

DE TAVRIS ET LEONE. 18

**Q**uatuor fuisse tauri, quibus placuit communem ipsorum esse salutem, & commune periculum, Videt leo simul pascentes: etsi esurit, tamen coniunctos aggredi metuit. Primum dat operam uerbis fallacibus segregare, tum segregatos laniat. Morale. Concordia nihil est firmitus, discordia etiam fortes reddit imbecilles.

DE ABIETE ET DUMO. 19

**F**ertur olim abies despicere dumos, iactitat se procerâ esse, locari in ædibus, cum uelo stare in nauibus, dumos autem humiles, uiles: nulli usui idoneos. Quorum quidem tale fuit responsum: Tu sane abies tuis gloriare bonis, ut nostris insultes malis. Verum nec tua refers mala, & nostra præteris bona. Cum tu sonanti detrucare securi, quàm uelles tum nobis, qui securi sumus, esse te similem.

h 5

Mora



**Morale.** Et summe fortune sua insunt mala, & humili fortune sua bona. Ut nil aliud nunc dicam, hæc secura est, ac tutæ illa nec extra metum est, nec caret periculo. Horatius canit in lyricis, Celsæ grauiore casu Decidunt turres, feriuntq; summos Fulgura montes.

## DE PISCATORE ET PISCICULO. 20

**S**ubductus hamo pisciculus, orat piscatorem se dimitti. Sait modò se à matre fuisse, atq; mensem, cum adhuc minutus sit, non multum iuuare. Si dimittat, postea grandem ultro ad hamum eius rediturum. Piscator negat se dimittere prædam certam, licet exiguam. Quid habeam, inquit, scio: quid sim habiturus, nescio. Ego spem pretio non emo.

**Morale.** Certum præstat incerto, præsens futuro, etsi nonnunquam exile commodum omissum attulit magnum.

## DE ALITE ET PULLIS EIVS. 21

**A**les positos in segete pullos monet, ut dum ipsa abest, diligenter attendant, si fiat sermo de occatione. Rediunt à pastu matri pulli anxij narrant dominum agri operam illam mandasse vicinis. Respondet nihil esse periculi. Item alio die trepidi, aiunt rogatos ad metendum esse amicos: iterum iubet illa ut sint securi. Tertiò ut audiuit ipsum dominum cum filio statuisse postero mane cum falce messem intrare, iam inquit, tempus est ut fugiamus. Vicinos & amicos non timui, quia non uenturos scui. Timeo dominum, illi enim res est cordi. **Morale.**

Secordes alicuius in rebus pleriq; sumus: Quòd si quid rectè curatum uelis, alteri ne mandes, sed cures ipse.

## DE AVARO, ET INUIDO. 22

**D**uo homines orabant Iouem, cupidus & inuidus, Mititur à Ioue Apollo, per hunc ut eorum uotis satisfiat. Dat hic utriq; optandi liberam facultatem ac conditionem:

ut

ut quodcumq; petisset alter, id ipsum alter acciperet duplicatum. Hæret diu cupidus, cum nihil putat fore satis. Petit tandem non pauca. Et duplum accipit socius. Porro inuidus hoc petit, ut ipse uno priuetur oculorum, letus socium mulctandum esse utroque. **Morale.** Auaritiam quid possit satiare? Inuidia uerò dementius est nihil. Quæ dummodo noceat alteri, sibi meti imprecatur malum.

## DE LEONE ET CAPELLA.

23

**V**idit leo pendere dumosa de rupe capellam. Suadet descendere ut in campo thymum, salicesq; carpat. Recusat capella descendere, uerba quidem eius haud sanè mala, sed mentem esse plenam doli reclamans.

**Morale.** Cogita quis quid suadeat. multi suadent utilia, non tibi, sed sibi.

## DE CORNICE ET VRNA.

24

**S**itibunda cornix reperit urnā aquæ. Sed erat urna profundior, quàm ut posset à cornice aqua contingi. Conatur effundere urnam, nec ualet. Tum lectos ex arena scrupulos iniecit. Hoc modo aqua leuatur, & cornix bibit.

**Morale.** Interdum id, quod non potes efficere ui, efficies prudentia, & consilio.

## DE LEONE ET VENATORE.

25

**L**itigat leo cum uenatore, suam præfert fortitudinē hominis fortitudini: post longa iurgia, uenator ducit leonem ad Mausoleum, in quo sculptus erat leo, caput deponens in gremium uiri. Negat fera id satis esse iudicij, homines enim sculperet quod uellent, ait: quòd si & leones forent artifices, iam uirum sculptum iri sub pedibus leonis.

**Morale.** Quisq; quoad potest, & dicit, & facit quod sue parti, & causæ putet prodesse.

## DE PVERO ET FVRE.

26

Sedeb

**S**edebat puer flens ad puteum. Fur rogat causam flendi. Puer dicit, rupto fune incidisse in aquas urnam auri. Homo exiit se, insiluit in puteum, quærit. Vase non inuento, conscendit, atq; ibi nec puerum, nec suam inuenit tunicam. Puer quippe sublata tunica fugerat.

Morale. Falluntur interdum qui fallere solent.

DE RVSTICO ET IUVENCO. 27

**E**rat rustico iuuenus, uinculi omnis, iugiq; impatiens. Homo astatulus, bestie refecat cornua. Cornib. enim petebat. Tum iungit non currui, sed aratro: ne, ut solet, herum pulsaret calcibus. Stiuam ipse tenet, gaudens industria effecisse, ut iam foret tutus, & à cornibus & ab ungulis. Sed quid euenit? Taurus subinde resistens spargendo pedibus os, caputq; rustici opplet arena.

Morale. Sunt nonnulli sic intractabiles, ut nulla queant arte, nullo consilio tractari.

DE SATYRO ET VIATORE. 28

**S**atyros, qui Deus nemorum olim est habitus, uiatorem sniue obrutum, atque algore eneclum miseratus, ducit in antrum suum, fouet igni. Spirantem autem in manus, percunctatur causam. Qui respondens. Vt calefiant, inquit. Postea cum accumberent, sufflat uiator in polenta. Quod cur faceret, interrogatus, Vt frigescat, inquit, Tum continuo Satyrus uiatorem eiiciens, Nolo, inquit, in meo sit antro, cui tam diuersum est os.

Morale. Caue sit in tuo conuictu homo duplici ore, quiq; in sermone est Proteus.

DE APRO, ET RVSTICO. 29

**A**pro uasanti segetes, rusticus præcidit auriculam. Iterum deprehenso, præcidit alteram. Et tunc quoq; redeuntem capit, captum portat in urbem destinatum lauitie

tia sui patroni. Secta iam in conuiuio belua nusquam apparet cor. Excandescente hero, & fl. gitante cocos, uillicus respondet, Patrone, inquit, non est mirum non apparere cor: nam credo stulium aprum nūquam cor habuisse. Nam si cor habuisset, nunquam in poenam suam ad meas segetes toties redisset. Sic rusticus. At omnes conuiuæ emori risu, cachinnari de stultitia rustici.

Morale. Multorum hominum tam est excors uita, ut an cor habeant possis ambigere.

DE TAVRO, ET MVRE. 30

**M**VS tauri pedem momorderat fugiens in antrum suum. Taurus uibrat cornua, querit hostē, nusquam uidet: irridet eum mus: Quis, inquit, robustus es ac uastus, non idcirco quemuis contempseris. Nunc te, & quidem gratis, Lesit exiguus mus. Morale.

Tritum est illud uerbum, quod significantius nostrate lingua dixerim, Nyemant sol uerachten seinen feindt. Latine sic, Nemo suum hostem flocci pendat.

DE RVSTICO ET HERCVLE. 31

**R**VSTICI currus hæret in profundo luto. Non supinus Deum Herculem implorat. Intonat uox è cælo, Inepte, inquit, flagella equos, & ipse annitere rotis, atq; tum Herculem uocato, tum enim aderit Hercules uocatus.

Morale. Nil profunt otiosa uota, quæ sanè Deus non audit. Iuua temet, inquiunt, ipse tum iuuabit te Deus.

DE ANSERE. 32

**F**Vit anser qui ponebat oua aurea singulis diebus singula: dominus ut subito fiat diues, anserem iugulat. sperans intus latere gazam. Sed ansere inuento uacuo stupet miser, anxieq; dehinc suspirat, ac plangit, & rem, & spem periisse. Morale. Moderanda sunt uota. Curandum

dum est ne uel præproperi simus, uel nimij. Nam & festinantia nocet, & qui plura quam decet quærit, interdum acquirit nihil.

DE CICADA ET FORMICA. 33

**C**um per æstatem cicada cantat, formica suam exercet messem, trahit in antrū grana, reponens in hyemem. Se uiente bruma, famelica cicada uenit ad formicam, mendicat uictum. Renuit formica, dictitans, sese dum illa cantabat laborasse. **Morale.**

Qui segnis est in iuuenta, egebit in senectâ: & qui non parcit, olim mendicabit.

DE SIMIA ET DVOBVSEIUS NATIS. 34

**S**imia, ut ferunt, cum peperit gemellos, alterum diligit, alterum negligit. Erat puerpera cum gemellis. Atque cum incidisset terror, uitatura periculum, dilectum præhendit ulnis, quem dum præceps fugitat, collidit petra, atque enecat: neglectus autem, qui in hirsuto hæserat tergo fugientis mansit incolumis. **Morale.**

Solet euenire, ut ipsi parentes filio, quem temerè amant, præ nimia indulgentia sint mali occasio & periculo, eo, quem minus amarunt, præstante se strenuum ac probum.

DE BOVE ET IUVENCO. 35

**B**os iam grandis æuo quotidie trahebat aratrum. Iuuenus laboris expers, uicinis exultat in pascuis, ac tandem insultat fortunæ senioris. Iactat se iugi, ac uinculi insecum, se liberum, se otiosum, illi attritum esse labore colulum. Deniq; se glabrum ac nitidum, illum esse hirsutum ac squalidum. Senior tum quidem nihil contra. Sed breui pòst tempore uidet hunc insultorem duci ad aras, ac tum hisce uerbis affatur, Quò tua mollis uita peruenit? securū istud otium redijt ad securim. Iam saltem (ut opinor) potius suades

*des mihi laborem, qui me tuetur, quàm otium, quod nunc te traxit ad necem.* Morale.

*Ad uitam rectè gerendam opus est labore & uigilantia. Secors autem & uoluptati deditus, suarum rerū, quem nolet, fortietur exilium.*

## DE CANE ET LEONE.

36

**O**ccurrit canis leoni, iocatur, *Quid tu miser exhaustus inedia percurris syluas & denia? Me specta pinguem ac nitidum: atq; hæc non labore consequor, sed otio, Tum leo: Habes tu quidem tuas epulas, sed habes stolidæ etiam uincula. Tu seruus esto, qui seruire potes: equidem sum liber, nec seruire uolo.*

Morale. *Pulchrè respondit leo. Quibuslibet enim rebus potior est libertas.*

## DE PISCIBVS.

37

**P**iscis fluuiialis ui fluminis correptus est in mare. Vbi suâ efferens nobilitatem, omne marinum genus uilipendebat. Non tulit hoc phoca, sed ait tum fore iudicium nobilitatis, si cum phoca captus portetur ad forum. Se emptum iri à nobilibus, illum autem à plebe. Morale.

*Multi sic capti sunt libidine gloriæ, ut sese ipsi prædicent & iactent: sed laus sui oris non datur homini laudi, ac excipitur cum auditorum risu.*

## DE PARDO ET VULPECULA,

38

**P**ardus, cui pictum est etiam tergū, ceteris feris etiam leonibus despectis, intumescerebat. Accedit ad hunc uulpecula, suadet non superbire, dicens, illi quidem speciosam esse pellem, sibi uerò speciosam esse mentem.

Morale. *Discrimen est bonorum & ordo. Bona corporis præstant bonis fortunæ. Vtriusque illis animi bona præferantur oportet.*

AESO

# AESOPi FABV.

LATORIS CLARIS-

simi apologi, è Græco Latini  
per Rimicium facti.

ARGVMENTVM.



ESOPVS fabulator clarissimus, natione quidē Phryx, fortuna uerò, seruus fuit, colore niger, ac facie supra modum deformis. Is quia beneficus semper in hospites fuit, Dea hospitalis in somnis sibi assistens, largita est loquelam (nā ab initio blatero fuit) sapiētiamq; ac uariarum fabularum inuentionē: quæ porro fabulæ non parum cōducunt mortalium uitæ. Nam animalia bruta fingit agere ea, quæ hominum sunt actiones: quas ita ante oculos ponit, quòd audientium animos incitet ad uirtutem: nec ulli sunt hominum mores, quos in brutis fingendo ipse non aperiat. Has igitur fabulas, si quis ritè gustauerit, quā uiam sequi, quamq; uitare debeat, in priuatis publicisq; negotijs facile comperiet. Nam in primis fabulam narrat: tum quid fabula significet, compendiosius exponit. Atq; ordinem alphabeti in Græco sequutus, qui in Latino sermone seruari non potest; hinc sumit initium.

DE AQUILA ET VULPE.

**A**quila & uulpes conflata inter se amicitia, in proximo habitare cōstituunt. firmiorem amicitiam ex frequenti conuersatione fore putantes. Igitur aquila nidum alta super arbore instituit. Vulpes uerò arborem propter, inter dumeta catulos collocat. Vna igitur dierum quum uulpes latibulum egressa pastum catulis quæreret, aquila & ipsa cibi indiga, in latibulum deuolans, uulpis catulos arripuit

arripuit, ac pullis suis comestum præbuit. Vulpes reueniens, cognita filiorum morte atroci, ualde tristata est. Et cum aquilam ulcisci non posset, quia quadrupes existens uolucrum persequi nequibat, quod unum miseris ac impotentibus datur, aquilam execratur, ac mala sibi imprecatur: tantum in odium, cum uiolatur, uertitur amicitia. Contigit igitur illis diebus ruri capras immolari, cuius frustum una cum carbonibus accensis aquila arripuens, sustulit ad nidum. Sed uento uehementius spirante, nidus qui ex foeno ac materia exili aridaq; confectus erat, incenditur. Aquilæ pulli flammam sentientes, cum uolare adhuc nequirent, humi decidunt. Vulpes confestim illos arripuens, in aquilæ conspectum deuorat. Fabula significat quod qui amicitiam uiolant, quamuis quos læserint, ultionem declinent, Dei supplicium non tamen effugiunt.

## DE AQUILA ET CORVO. 2

**A**quila celsa ex rupe deuolans, agnum ex ouium grege arripuit. Quam rem coruus conspiciatus, emulatione motus, uehementi cum strepitu ac stridore deuolat in arietem, atq; unguis in arietis uellus ita implicat, quod inde etiam motu alarum se explicare non posset. Hunc pastor cum ita implicitum uidet, accurrens coruum comprehendit: atq; alarum pennis incisis, pueris suis pro ludibrio dedit. Verum enim cum quispiam coruum rogaret, quenam uolucris esset: coruus ait, Prius equidem, quo ad animum, aquila fui, nunc uero me coruum esse certo cognosco.

Fabula significat, quod qui supra uires quippiam audet, hoc solum efficit, quod in diuersa sæpius incidit, ac se uulgo ridiculum exhibet.

**A** DE AQUILA ET SCABRONE. 3  
i quem



quem tempus obtulit scabronem uidēs, ab eo auxilium implorauit. Cui scabro pollicitus est tutelam ac custodiā suam. Deinde quum aquilam propinquātem scabro conspiciatur, eam precatur, ne suum sibi eripiat seruum. At aquila scabronis paruitatem contemnens eo coram, leporem exedit. Verū scabro suae iniuriæ memor, ubi aquila nidificaret, obseruat. Ecce aquila oua parit. Scabro alis elatus, ad aquilæ nidum uolat, atq; oua deuoluēs, humi deijcit. Aquila iacturæ ouorum mœrore concita, euolat ad iouem (est enim ales Deo illi sacrata) ac locum ad pariēdum sibi tutum dari precatur. Iupiter sibi concedit, ut cū tempus adest, eius in sinu pariat oua. Hoc scabro prouidens, globum ē stercore conficit: atq; sursum euolans, in Iouis sinum demisit. Iupiter uolens ē sinu globum excutere, oua aquilæ simul excussit. Extunc aiunt aquilam nunquam parere, quo tempore scabrones existunt. Fabula significat, quod nullus porro est contemnendus: quoniam nemo est qui iniuriam accipiat, quin quum tempus datur, se ulcisci non querat.

## DE PHILOMELA, ET ACCIPITRE. 4

**P**hilomela quum alta quercu sederet, more suo, sola canebat. Eam accipiter, cibum queritans, quum intueretur, repenti deuolat, illamq; rapit. At philomela cū se interitum iri uidet, accipitrem precatur ut se missam faciat, quoniam ad explendum eius uentrem ipsa satis minima sit: sed pro saturitate sua ad maiores aues ut se uertat opus profecto fore. Eam accipiter toruē conspiciens ait: Stultus equidem nimium essem, si quem manibus tenco cibū, illum dimitto amplioris spe pastus. Fabula significat, quod qui omittunt id quod manu tenent rerum maiorum spe, consilio inopes ac ratione nimium sunt.

## DE VULPE, ET TRAGO, 5

Vulpe

**V**ulpes & tragus sitientes in quendā puteum descenderunt. Verumenim post potum, quū egressum conspiceret hircus, vulpes ei comiter ait, Bono sis animo: nam quid saluti nostræ opus sit, probè animaduerti. Si enim relictus stabis, ac pedibus anterioribus cornibus uē muro adharebis, tuas ego scapulas cornuq; conscēdens, quū egressa puteum fuero, te manu cōprehendens hinc desuper trabam. Huic caper promptè deseruiuit. Vulpes suo exultans egressu circa os putei capro illudebat. At dum caper illā inculsat, sibi pacta haud seruasse, ei facete iulpecula inquit, Si ea caper sapientiā præditus esses, quo pilorum ornatu isthæc tua barba referta est, non prius in puteum descendisses, quàm egressus pensiculatè uidisses. Fabula significat, quod homines consilio præditi, rerum fines prius inspicunt, quàm dent operam rebus gerendis.

## DE VULPE, ET LEONE.

6

**V**ulpes quæ nunquam uiderat leonem, quum illi fortè obuiasset, adeo pertimuit, ut mortem penè obiret. Rursum illum quum aspexisset, pertimuit, sed nō nimè ut primum. Eum tertio quum intueretur propè accedens, fuit ausa coram differrere. Fabula significat, quod rerum terribilia, usus & consuetudo domestica facit.

## DE CATO ET GALLO.

7

**C**atus cum gallum cepisset, atq; causam quæreret quū eum comedere posset, illū criminari cœpit, quod esset animal turbulentū, qui noctu clamitando haud permitteret quiescere mortales. Gallus se excusabat, quod id ageret ad eorū utilitatem, cum ad opera faciendā illos excitaret. Rursum catus ait, Impius es ac supra modū scelestus, qui agis cōtinuè contra naturā, cū nec à matre, nec à sororibus te abstineas, sed per incōtinentiā cū illis te cōmisceas. Gallus itē defend

defendebat, quòd domini sui quæstus gratia, id quoq; ageret: enimvero ex huiusmodi coitu, gallinæ pariūt oua. Tūc inquit catus, Excusationibus licet abundes, ego tamen ieiunare haud intēdo. Fabula significat, quòd qui prauus existit natura, cum semel delinquere animo proposuit, quamuis causæ desit prætextus, à prauitate tamen non desistit.

## DE VULPE SINE CAUDA. 8

**V**ulpes ut è laqueo euaderet, abscissa cauda, cum è pudore uitam sibi mortem putaret, excogitauit alias dolo inducere uulpes, ut sub communis commodi specie, sibi singulæ caudam abscinderent, & sic suum dedecus leuaret. Itaq; ad unum uulpibus congregatis suadet ut caudam sibi abscindant, differens caudam non modò dedecori uulpibus esse, sed oneri graui atq; inepto. È uulpibus una ei facete respondit, Hæc soror, si res ista tibi soli conducit, tum uidem alijs consulere haud est æquum.

Hæc fabula ad eos spectat, qui sub charitatis specie, suum commodum consulendo prospiciunt.

## DE PISCATORE ET

Smaride pisciculo. 9

**P**iscator quod mari rete tetendit, eo smarida cepit pisciculum, qui parua adhuc ætate piscatorem orabat, ut dum grandis esset, atque maiorem quæstum ex eo assequi posset, eum uita donaret. Huic piscator, lepidè respondit, Ego quidem mente carerem, si quod minimum mihi est lucrum, id dimitterem amplioris spe quæstus. Fabula significat, quòd certa pro incertis, quamuis in eis magna insit spes, stultum est dimittere.

## DE VULPE ET RVBO. 10

**V**ulpes cum septem quandam ascenderet, ut periculum uitaret, quod sibi imminere uidebat, rubum manibus comp

comprehendit, atq; uolam sentibus perforauit: & cum gra-  
uiter saucia foret, gemens inquit ad rui um, Vt me iuuares,  
cum ad te confugerim, tu deterius me perdidisti. Cui ru-  
bus, Errasti uulpes, ait, quæ pari dolo me capere putasti,  
quo cætera capere cõsueuisti. Fabula significat, quòd stul-  
tum est implorare auxiliũ ab illis, quibus à natura datum  
est obesse potius, quàm alijs prodesse.

## DE VULPE ET CROCODILO. II

**V**ulpes & crocodilus de nobilitate contendebant: cum  
crocodilus multa pro se adduceret, ac supra modum  
se iactaret de splendore progenitorum suorum, uulpes ei  
subridens ait, Heus amice, etsi hoc tu quidem non dixeris,  
ex tuo corio clarè apparet, quod multis iam annis, tuorum  
splendore fuisti denudatus. Fabula significat, quòd homi-  
nes mendaces res ipsa potissimũ refellit.

## DE VULPE ET VENATORIBVS. 12

**V**ulpes uenatores effugiens, ac per auia currẽdo iam  
defessa, hominem casu reperit lignarium, quẽ rogat  
ut se quoquo loco abscondat. Ille tectoriũ sibi ostendit. Vul-  
pes illud ingrediens, in angulo quodam se abscondit. Ad sunt  
uenatores: lignarium, si uulpem uiderit, rogant. Lignarius  
uerbis quidem se uidisse negat: manu uerò, ubi uulpes late-  
bat, locum ostendit. Verumenim uenatores re haud per-  
cepta statim abeunt: uulpes ut illos abisse prospicit, tectorio  
egrediẽs, tacitè recedit: lignarius uulpem criminatur, quòd  
cum saluam fecerit, nihil sibi gratiarum agat. Tunc uulpes  
se conuertens, illi facitẽ ait, Heus amice, si manum, opera,  
ac mores uerbo similes habuisses, meritis tibi persoluerem  
gratias. Fabula significat, quòd homo nequam etsi bona  
pollicetur, mala tamen & improba præstat.

## DE GALLIS, ET PERDICE. 13

**G**allos complures cum quis domi haberet, quam emērat perdicem illis compascere permisit. Sed cum galli illam infestarent, rostrisq; percuterent, perdix ea iniuria uehementer perdoluit, putans, quia aduena, nec eo genere esset, eas sibi inferri iniurias. Gallos deinde cum adinuicem certantes conspiceret, perdix amota animi perturbatione ait, De cætero equidem haud tristabor, posteaquam inter eos odiosa certamina cerno. Fabula significat, quod homines sapiētia præditi moderato animo ferūt iniurias ab illis uel maxime sibi illatas, qui nec sibi nec suis parcere sciunt.

DE VULPE ET LARVA.

14

**V**ulpes citharædi domū ingressa, dum quæ domi parata sunt, sagaciter explorat, laruæ caput reperit arte industriosa composuū: quod manibus capiēs, ait, O quale sine cerebro caput. Fabula significat, quod non omnes corpore decori, eandem animo habent pulchritudinem.

DE HOMINE ET LIGNEO DEO.

15

**H**omo quidam Deum ligneum domi habēs, eum orauit, ut boni quippiam sibi tribueret: sed quantò magis orabat, eò res domi angustior erat: demum ille cōcitus ira, Deum cruribus capit, caput parieti percutit. Illi exciso igitur capite, multum auri exiliit, quod homo colligens, ait, Peruersus nimium es, atq; perfidus, qui dum in honore te habui, nihil quidem profuisti, percussus uerò ac uerberatus, boni plurimum contulisti. Fabula significat, quod homo nequam, si quando prodest, id efficit ui coactus.

DE CANE AD COENAMUOCATO.

namuocato.

16

**V**ir quidam quum coenam opiparā parasset, amicum quendam domū uocauit: eius quoq; canis, canem alterius ad coenā inuitauit. Is domum ingressus, cum tantum dapium

adapium uidet apparatus, letus secum ipse ait, Hodie porro ita me explebo, quod die crastino comedere non indigebo. Hisq; dictis motu caudæ applaudit. Coquus uero eum conspiciens, tacitus per caudam capit, atq; illum sæpius rotans per fenestram projicit. Ille attonitus humo assurgens, dum clamando aufugit, cæteri canes sibi occurrunt, atq; rogitant quàm opiparè coenauerit. At ille languens ait, Ita potu ac dapibus me expleui, quod cum exiuerim, uiam non uidi. Fabula significat, quod quibus rebus quis doliturus est, rebus illis letari non debet.

## DE AQUILA ET HOMINE. 17

**A**quilam homo quidam cum cepisset, pennas alarum sibi euulsis, inter gallinas morari dimisit; eam deinde quidam mercatus, pennis alas denuo munit: tum aquila uolans, lepore capit, fertq; illum benefactori suo. Quam rem conspiciens uulpes, homini ait, Noli hanc aquilam, sicuti prius, hospitio habere, ne cum leporem te æque uenetur. Tum homo aquilæ item pennas euulsit. Fabula significat, quod bene facientes sunt quidem remunerandi, improbi uero omni studio uitandi.

## DE VIRO AGRICOLA. 18

**H**omo quidam agricolator existens, cum finem uitæ sibi adesse cognosceret, cuperetq; filios in agrorum cultu fieri peritos, eos uocauit, atq; inquit: Filij, ego è uita discedo: bona mea in uinea confita sunt omnia. Illi post patris obitum putantes in uinea thesaurum rerum reperire assumptis ligonibus, maris, ac bidentibus, uineam funditus effodiunt: nullumq; thesaurum inueniunt. Verum enim uinea cum probe effossa foret, longè plus solito fructus producit, atq; illos diuites fecit. Fabula significat, quod labor assiduus thesaurum parit.

## DE CARBONARIO ET LOTORE. 19

**C**arbonarius lotorem quendam rogauit, ut quam pretio conduxerat domum, secum pariter cohabitaret. At lotor rei aliàs expertus ait, id conducibile haud mihi esset. Nam quæ albificarem, ea omnia carbonum fauillis ipse maculares. Fabula significat, quod res naturis dissimiles stare simul commodè non possunt.

## DE VULPE ESVRIENTE. 20

**V**ulpes ingenti fame concita, cum quodam in tectorio carnis frustum ac panem reposita prospiceret, tectorium ipsum intrauit, atq; tantum comedit, quod ad ingentem tumorem uentrem distendit: & cum ex nimia uentris tumefactione inde egredi nequiret, tumens gemebat. Eius gemitum uulpes alia trāsiciens illuc cum audiret, illuc accedit, rogatq; quidnam emeretur: deinde causam gemitus edocta, lepide ait, Istic manendum est, usq; eò dum tenuis efficiaris, quanta eras cum intraisti: nam eo pacto facile egredieris. Fabula significat, quod nihil est tam durum, quod tempus non dissoluat.

## DE PISCATORE QVODAM. 21

**P**iscator quidam piscandi inexpertus, tibijs ac reti assumptis, iuxta maris litus accedit, atq; saxo quodam superexsistens, in primis tuba canere cœpit, putans cantu se pisces facile esse capturum. Verum cantu cum nullum consequeretur effectum, depositis tibijs, rete in mare dimittit, ac pisces cepit per plures. Sed cum ex reti pisces extraheret, atq; eos saltantes perspiceret, non insulse ait, O improba animalia, dum ad tibia cecini, saltare noluiſtis: nunc quia canere cesso, saltus datis assiduos. Fabula significat quod omnia probe fiunt, quæ fiunt tempore suo.

## DE PISCATORIBVS QVIBVS DAM. 22

Piscat

**P**iscatores piscatum profecti, diuq; piscando defessi, fame præterea ac mœrore, quod nihil cepissent confecti, cum abire decernunt, ecce piscis quidam alium fugiens se insequentem, in nauiculam saltat: illum piscatores supra modum leti comprehendunt, ac in urbem reuersi, grâdi pretio uendunt. Fabula significat, quod frequentius fortuna id exhibet, quod ars efficere non potest.

## DE VIRO INOPE ET INFIRMO. 23

**H**omo quidã pauper cum ægrotaret, dijs uouit quod si eo morbo liberaretur, boues centum immolaret: quod ij experiri uolentes, sanitatem illi facillè reddunt. Liber igitur à morbo, cum boues, quia pauper, non haberet, ossa bouum centum collegit, eaq; super altari deponens, lepidè inquit, Ecce quod uoui, uotum uobis nunc persoluo. At dii illum ulcisci uolentes, in somnis sibi assistunt, atque inquirunt, Ad maris litus pergito, ibi enim in loco semoto auri talenta centum reperies. Ille expergesfactus: somnij memorem dum pergit ad litus, incidit in latrones: captus itaq; eos rogabat, ut se missum facerent: quoniam mille talenta auri persolueret eis. Fabula significat, quod homo mendax Deos & homines pariter contemnit.

## DE VULPE ET PARDO. 24

**V**ulpes cum pardo de pulchritudine cõtendebat, cum uarias corporis notas pardus sibi daceret decori, uulpes ei comiter ait, Ego quidem lōge formosior sum iudicanda, quæ non corpus sed animum uarijs notis habeo notatum. Fabula significat quod decor mentis est potior omni corporis ornatu.

## DE PISCATORIBVS QVIBVSDAM. 25

**P**iscatores quidam è mari rete trahabant. Quod cū graue esse sentirent, letitia gesiunt, putantes multos pisces



scēs habere irretitos : sed ut rete in terram traxerunt, pisces quidem paucos, saxum uerò ingēs reti inesse cum perspicunt, longē tristantur. Quidam ex illis natu iam grandis non inurbane socijs inquit, Animis estote quietis, quippe letitiæ soror est mœstitia : oportet enim casus prospicere futuros, illosq; ut lenius quis ferat, persuadere sibi esse euenturos. Fabula significat, quod qui reminiscitur fortis humane, in aduersis minime, frangitur.

## DE RANIS REGEM PETENTIBVS. 26

**R**ane mœrentes quod sine rege forent, Ioui supplicatum oratores mittūt, ut regem sibi dedit. Iupiter earum simplicitatem cognoscens, lignum in stagni mediū demisit. Quod cū in stagnum cecidit, eius sonus supra modū terruit ranas. Quæ cum lignū esse nouerunt, rursum Ioui supplicatū mittunt, ut regē uiuum, haud mortuū sibi dedit. Iupiter stultis earum precibus motus, Hydriū illis dedū in regem. Is in diem cum ranas deuoraret, tertio Iouem rane precantur, ut regem seuum atq; immanē ab eis amoueret. Tunc inquit Iupiter, Quem tot precibus regem exorastis, cum uobis perpetuum habetote. Fabula significat, quod sæpe ea precamur, quæ impetrasse nos postea poenitet.

## DE CATA IN FOEMINAM MUTATA. 27

**C**ata quædam speciosi cuiusdam adolescētis amore capta, Venerem orauit, ut eam in hominem mutaret. Venus illius miserta, in formā hominis mutauit eam. Quæ cum longē speciosa esset, amator domum subito adduxit. Sed cum in cubiculo simul sederent, Venus experiri cupiens, si mutata facie, mutasset & mores, in medium cōstituit murem: quem cum illa prospexit, oblita formæ & amoris sui, murem ut caperet, persecuta est. Quæ super re Venus indignata, denuo eam in priorem catæ formam mutauit.

Fabula

*Fabula significat, quòd homo nequam, licet personam mutet, mores tamen retinet eosdem.*

DE SENE MORTEM VOCANTE. 28

**S**enex quidam lignorum fascem super humeros ex ne-  
more portans, cum longa uia defessus esset, fasce humi  
deposito mortem uocauit. Ecce mors aduenit, causamq;  
quamobrem se uocauerit, interrogauit. Tunc senex, ut hunc  
lignorum fascem super humeros mihi imponeres, ait.

*Fabula significat, quòd quisquis uitæ cupidior est, licet  
res nulle subiiciatur periculis, mortem tamē semper deuitat.*

DE MULIERE ET MEDICO. 29

**M**ulier anus cum ophthalmiam pateretur, medicum  
ad se curandum accersit, certum pretium sibi dare  
promittens, si eo morbo curaretur: si uerò non liberare-  
tur, nihil ei debere pacta est. Medicus uerò quoties illam  
ibat curatum, toties quippiam e domo clam exportabat.  
Mulier igitur ophthalmia curata, cum nihil suarum rerum  
domi esse prospiceret, medico mercedem pactam petenti  
soluere denegat. Quamobrem uocata in iudicium pactum  
quidem non denegat, sed se curatam ophthalmia esse, id ue-  
rò pernegat, inquiens, Cum caeca eram, domum multa su-  
pellectile refertam uidebam: nunc cum uideo, ut medicus  
ait, nihil rerum domi esse prospicio. *Fabula significat,  
quòd homines auaritiæ dediti, sibi met sepius contradicunt.*

DE AGRICOLA ET CANIBVS. 30

**A**gricola quidam magnitudine hyemis in suburbanis  
se locauit. Sed cum alimonia sibi deficeret, capris et  
ouibus primum uesci coepit: cum uerò in diem magis seui-  
ret hyems, bobus quoq; nec pepercit. Quod facinus cum  
animaduertunt canes, inuicem uerba faciunt, Quid hic sta-  
mus, inquiunt, cur mortem nobis incumbentem non su-  
gimus?

gimus? putamus ne eum nostræ parcere uita, qui alimonie gratia boues ingulauit? Fabula significat, quod eos fugere debemus qui in charissimos crudeliter se gerunt.

DE AGRICOLA ET FILIIS. 31

**A**gricola quidam complureis habuit filios, continua seditione discordes, ac eius admonitionis perpetuo negligentes. Cum forte una domi omnes sederent, iussit pater uirgarum fascem coram deportari, atque natos coepit hortari, ut integrum fascem disrumperent. Cum igitur fascem eum totis uiribus frangere non possent, genitor præcepit, ut soluto fasce singulatim frangerent uirgas. Cum quisque facile hoc perficeret, tunc facto silentio, pater ait eis, Si quando animis idem sentietis, nati mihi charissimi, nec ab inimicis superari poteritis, Sed si inter uos seditiones seruabitis, qui uolet, is facile uos perdet.

Fabula significat, quod fortior est unio, quam seditio, quæ est imbecillis.

DE MULIERE ET GALLINA. 32

**V**idua quedam mulier gallinam habuit, quæ die quolibet pariebat ouum. Putauit mulier, more ingenij humani, quod sitis habendi semper sollicitat, gallinam illam die bis parituram, si plus speltis traderet ei solito. At gallina pluri alimonie pinguior facta, id unum desijt parere ouum. Sic mulier ex quo maius lucrum queritabat, id ceca augendi cupiditate amisit. Fabula significat, quod plurima cupiditate rerum præsens quandoq; deperditur quæ situs.

DE HOMINE A CANE MORSO. 33

**H**omo quidam quum eum canis momordisset, summo cum studio sciscitabatur, à quo sanari posset. Quidam sibi obuiam factus, atq; de medico rogatus ait: Si uis amice fieri sanus, nõ est tibi opus medico. Nam si canis qui te momordit,

mordit, à vulnere lingua sanguinem terget, ista cura nihil potius reperiri potest: alter arridens uenustissime inquit, Si huiusmodi utor remedio, in diem magis ac magis à canibus mordebor. Fabula significat, quòd ab hominibus nequam incommoda pro commodis, & mala pro beneficijs retribui solent.

## DE DVOBVS AMICIS ET VRSA. 34

**A** Mici duo dum rus uiarent, ursa eis obuiam occurrit: qua prospecta, alter eorum territus, ut se saluaret, continuo arborem ascendit. Alter quum ursæ uiribus posse obistere dubitaret, uti mortuus humi iacuit resupinus, retinens flatum atq; anhelitum. Quum nec ore aut naso respiraret, ursa eum exanimatum existimans, abiit. (Dicunt enim à cadauere ursas omnino abstinere). Alter deinde ex arbore descendens, quid in aurem sibi dixerit ursa socium rogauit. Ille urbano sermone respondit, Admonitus sum ab ursa, ut cum huiusmodi amicis non proficiscar amplius.

Fabula significat, quòd eorum amicitia colenda non est, qui quum est opus, amicis subsidia denegant.

## DE ADOLESCENTIBVS

duobus, & coquo.

35

**A** Dolescentuli duo æquis sumptibus carnes coemerunt, & curatum coquo tradiderunt. Obiter coquus dum alijs uacat negotijs, alter iuuenum carnes eas clanculum accepit, ac socio tradidit. Coquo deinde carnes queritanti, qui acceperat, se haud habere iurat, qui uerò habebat, se nò accepisse iurabat. Coquus percepto iuuenum dolo, ait, Et si fallor equidem à uobis: per quem uerò iuratis, res ista non latebit Deum. Fabula significat, nullum scelus posse latere Deum.

## DE DVOBVS INIMICIS.

36

Duo

**D**Vo quidam gladiatorio animo inter se inimicitias habentes, unâ in naui nauigabant. Et quum alter eodem in loco stare cum altero non pateretur, unus in puppi, alter in prora confedit. Orta autem tempestate quum nauis periclitaretur, qui in prora sedebat, rogat nauis gubernatorem, quæ pars nauis submergi prius deberet. Et quum gubernator puppim dixisset, ait ille, Mors mihi modò molestæ minime est, si inimicum meum prius mori perspicio.

Fabula significat, quòd inimicus ut inimicum perdat, se ipsum perdere sæpius eligit.

DE CALAMO ET OLIVA. 37

**Q**Uenam esset fortior, durior & magis resistens, canna & oliua inuicem contendebant. Oliua calamo humilitatem obijciebat, eò quòd uentis faciliè cederet. Huic dicto unum arundo haud reddidit uerbum. Paulò post turbine uehementi aspirans uentus, radicitus euulsit oliuam, totis uiribus sibi obsistentem. At canna flatibus se inclinans, salutem faciliè est assequuta. Fabula significat, quòd potentioribus sine controuersia mos est in tempore gerendus.

DE VITULA ET BOVE. 38

**V**itula quum bouem arantem perspiceret, illum prae se, quæ nihil agebat, cõtempnit. Sed quum immolationis affuit dies, bos quidem missus, uitula uerò ut immolaretur, retenta est. Quum rem bos quum cõspicatur, subridens ait, Heus uitula, ideo non laborabas, ut immolareris?

Fabula significat, quòd otiosis & nihil agentibus pericula quoque imminent.

DE PVERO ET FORTVNA. 39

**Q**Uum puer quidam iuxta puteum dormiret, Fortuna illuc accedens illum excitauit, inquiens: Surge, & hinc ocyus abi: Quippe in puteum si caderes, non tuam inscitiam

inscitiam, sed me fortunam omnes accusarent. Fabula significat, quod frequens pericula culpa nostra incurrimus, deinde abs re fortunam accusamus.

DE MVRIBVS ET CATO. 40

**D**Omo quapiam quod per plures forent mures, catus praesentiens illuc accessit, atq; nunc unum, nunc alium capiens, complures interimendo comedit. Verum mures cum se in diem consumi perciperent, ad unum coacti, inquirunt secum: De cætero inferius non esse descendendum, si nolumus perditum iri omnes, sed hic superius manendum, quò catus ascendere non potest. At catus cõsilio murium perceptio, simulans se mortuum esse, posterioribus pedibus se ad palum sustendit, qui fixus parieti erat. E muribus quispiam deorsum acutè prospiciens, ut catum esse cognouit, haud in facitè ait, Heus amice, etsi te follem esse certò scirem, deorsum minimè descenderem.

Fabula significat, quod uir prudens semel si fallitur, falsis & simulatis hominibus non amplius fidit.

DE SIMIA ET VVLPE. 41

**A**pad brutorum animalium concilium, simia ita appositè saltauit, quod omnium fere consensu rex statim fuit creatus. At vulpes inuidens ei, ubi uiderat carnes laqueo in fovea sitas, illuc simiam ut duxit, inquit ad eam, Hic thesaurus absconditus est, qui ex lege spectat ad reges: quare cum tuus ex lege sit, tute ipse capias illum. Simia uulpis suasu, illuc temerè accedens, ut se captam laqueo sensit, uulpem acriter accusat, quæ dolosè deceperat. Et vulpes haud illepidè ait: Heu stulta, quæ cum fortuna te extulisset, dominari cæteris iam te putabas dignam.

Fabula significat, quod qui temerè quippiam aggreditur, temere in aduersa incidit, ac uulgò ridiculus fit.

DE CE

**C**ervus uehemēti siti cū uexaretur, ad fontem proficiscitur: dumq; potat, suam in aqua prospiciens umbram, ualde letatus est magnitudine cornuum ac ramositate: deinde pedes & crura prospiciens, nimium tristatus est. Hæc dum animo uertit, ecce leo apparet, ac ceruum persequitur. At ceruus fugā arripiciens, leonem per campos longè anteibat. (Dicunt enim ceruorum uires consistere in pedibus, at leonis in animo stare robur.) Quousq; igitur leo per campos secutus ceruum, eum assequi non potuit. Casu uerò contigit ceruum nemus intrare, ubi cornibus ad ramos implicitis cū fugere non posset, à leone captus, cū se moriturum uideret, Heu me miserum, inquit, qui cornibus gauisus, ipsis cornibus pereō. Fabula significat, quòd quæ putamus nobis profutura, ea nobis sæpius obsunt.

**A**gricola laqueos in agro tetendit, ut grues & anseres uenaretur, qui sata sua continuè depascebant: At simul cum illis uenatus est pelargum, qui pede tentus rogat agricolam, ut eum soluat, missumq; faciat, cū non sit grus, nec specie anser, sed pelargus auium piissimus, qui parentibus semper deseruit, nec illos in senectâ deserit unquam. Ei agricola subridens ait: Quæ dicis, haud me fugiunt, nam qui sis, probe teneo: sed his simul captus cū sis, his quoque simul est moriendum. Fabula significat, quòd qui cum improbis quopiam deprehenditur crimine pari pœna plectitur cum illis.

**A**gnus in domo bene clausa existens, cū lupum ad se uenientem perspicit, illū conuitijs & maledictis persequitur. At lupo inquit ei, Non tu, sed locus inaccessibleis mihi

*mihî conuitia dicit. Fabula significat, quòd locus & tempus faciunt timidos persæpe audaces.*

## DE IOVE ET CORVO.

45

**I**upiter uolatilibus regem creare uolens, diem concilij auibus indixit, ut qui speciosior esset, rex sibi constitueretur. Quam rem præsentiens coruus, ac suæ deformitatis conscius, pennis aliorum hinc inde collectis, se decorauit, ac speciosissimum omnium se reddidit. Adest dies præfinitus, ueniunt ad concilium aues. Iupiter coruum ob pulchritudinem cum regem auibus creare uellet, id aues indignè ferètes, quæq; suas à coruo extrahunt pēnas. At coruus alienis pennis cum esset exutus, coruus ut erat demum remansit.

*Fabula significat, quòd qui rebus pendet alienis, illis amissis quisnam ipse sit, cuiq; liquido patet.*

## DE TVBICINE QVODAM.

46

**T**vbicem quidam tube sonitu pugnatum ciebat exercitum. Ab hostibus deinde per insidias captus miseranda uoce clamabat, Ne abs re ac frustra occidere me uelitis: ego quidem non pugno, nec præter tubam quippiam aliud possideo. Qui cum uinctum ducebant, huiusmodi uerbo contrà reddiderunt: Hanc ob rem morte dignior es iudicandus, quòd cum hostibus manū conferre deuitans, alios sonitu ad pugnam hortaris. *Fabula significat, quòd grauiori pœna sunt iudicandi, qui cum ipsi iniuriam nō agant, alios ad iniuriam agendum impellunt.*

## DE FABRO ET CANE.

47

**F**aber quidam catulum habebat, qui dum ipse ferrum cuderet, continuè dormiebat. Cum uerò manducabat, canis statim surgebat, & quæ sub mensa erant deiecta, ceu ossa & alia huiusmodi, sine mora corrodebat. Quam rem animaduertēs fiber, ait ad canem, Heus miser, quid faciam

k nescio



nescio, qui dum ferrum cudo, continuè dormis, & segnitia teneris: Rursus cum dentes moueo, statim surgis, & cauda mihi applaudis. Fabula significat, quòd secordes & somnolenti, qui ex aliorum uiuunt laboribus, graui censura sunt coërcendi.

## DE MVLA QVADAM.

48

**M**VLA quædam nimio hordeo pinguis effecta, nimia pinguedine lasciuiebat, secum inquit, Pater mihi equus fuit, qui cursu celerrimus erat, & ego ei per omnia sum similis: parum post contigit, quòd oportuit mulam quantum potuit currere: sed cum cursu cessauit, Heu me miseram, inquit, quæ equi filiam me esse putabam: at nunc memini asinum mihi patrem fuisse. Fabula significat, quòd stulti in prosperis seipsos dediscunt, sed in aduersis suos persepe recognoscunt errores.

## DE THYNNO ET DELPHINO.

49

**T**Hynnus, cum eum Delphinnus persequeretur, magno elatus impetu ac stridore, à uehementi fluctu in insulam defertur: eundemq; in scopulum à fluctu codem, Delphinus dum se putat capere Thynnium, ipse quoque defertur. Thynnus conuersus cum Delphinum expirantem animam perspicit, secum ipse ait, Mors mihi molesta admodum non est, ex quo mortis auctorem mori simul mecum perspicio.

Fabula significat, quòd quiuis aduersa leuius fert, cum aduersitatum auctores eadē aduersitate opprimi perspicit.

## DE MEDICO QVODAM.

50

**M**edicus quidam cum quem curaret ægrotum, cum mori contigerat, esserentibus funus aiebat, Vir iste si se uino abstinuisset, & chysterijs usus fuisset, eum mori non contigisset. Ex his qui aderant, quispiam medico haud infacetè ait, Heus medice, ista consilia cum prodesse quibant, dicenda

dicenda fuerunt, non nunc, cum nihil ualeant prodesse.

*Fabula significat, quod ubi haud prodest consilium, id eo tempore dare, est sanè amicum deludere.*

## DE AUCUPE.

31

**A**uceps aucupatum calamis uiscoq; tetendit, & cum turdum canere arboris desuper ramum aspexit, ut eum caperet, calamos erexit. At inter ambulandum pede altero uiperam calcauit, morsusq; ab ea, cum iamiam ob uenenum se deficere persensit, Heu me miserū, ingenuit, qui dum alium capere festino, alter ad mortem me est aucupatus. *Fabula significat, quod quæ contra alios facere nitimur, ea persepe ab alio ipsi patimur.*

## DE CASTORE.

32

**C**astor est animal quadrupes, qui in paludibus se nutrit: eius testes uarijs modis utiles esse dicuntur. Itaq; cum quispiam eum sequitur, suæ persecutionis causam non ignorans, ac pedum uelocitati fidens, quantum potest, fugit, usquequo ad locum ne uideatur, saluus deueniat, atque ibi testes excidens, in uenatores, cum sibi appropinquant, projicit. Et isto pacto à uenatoribus se eripit.

*Fabula significat, quod sapiens ut à periculis se eripiat, nihil intentatum deserit.*

## DE PUERO OUES PASCENTE.

33

**P**uer quidam cum oues eminentiori in loco depasceret, sepius clamabat, Heus ô à lupis mihi succurrite. Qui circum aderant cultores agrorum, cultum omittentes, ac illi occurrentes, atq; nihil esse comperientes, ad opera sua redeunt. Cum pluries puer id ioci causa fecisset, ecce cū lupus pro certo adesset, puer ut sibi succurratur seriò clamat. Agricole id uerum non esse putantes, cum minimè occurrerent, lupus oues facile perdidit. *Fabula significat, quod*

k 2 qui

qui cognoscitur mentiri, ei ueritas postea non creditur.

DE CORVO ET VULPE. 54

**C**ORUUS cum carnum frustū rapuisset, arborē quandam supersedit: uulpes eum suspiciens, atq; carnes sibi cupiens, illū arte aggreditur. Stans igitur sub arbore, coruum ludare occipit, aiens, O quā magna auis est hęc, quā speciosa, quā uenatrix, quā formosa, hanc decuit esse auiū regē! Nam omniaregia super alias sibi sunt aueſ, si modō uocē haberet. His ludibus coruus inflatus, et dici mutus haud ualens pati ulterius, dū magna uoce crocizat, carnes humi decidunt. Illas cum uulpes rapuisset, conuersa inquit ad coruū, Heus corue omnia decora tenes, modō mē te haud careres. Fabula significat, quōd qui adulatorib. nimium credūt, hi, quæ nō putant, in aduersa sæpius incidunt.

DE CANE ET LUPO. 55

**C**ANIS cum ante aulam dormiret, lupus superueniens, eum statim cepit: et cum ipsum occidere uellet, canis ne eum occideret, rogauit, inquiēs, Here mi lūpe, nunc me occidere noli, nam ut uides, tenuis sum, gracilis et macilentus. Sed herus meus nuptias in proximo facturū est, ubi si parum me expectas, ego opiparē manducans, atque pinguior factus, ero tibi utilior. Lupus his uerbis fidē habens, canem dimisit. Paucos post dies lupus accedens, cum canem dormientem domi reperit: stans ante aulam canem rogat, ut sibi promissa præstet. Ei canis haud rusticē inquit: Heus lūpe, si ante aulam de cætero me reperis, haud amplius nuptias expectes. Fabula significat, quōd sapiens cum periculum uitat, ab illo postea continuē cauet.

DE CORVO AEGROTANTE. 56

**C**ORUUS cum ægrotaret, matrem rogauit, ut suā proſa mitate Deos precaretur, inquiens, Mater noli plora-

re

re, sed deos potius precare, ut sanitatem mihi restituant. Et mater scite respondit, Quem deorum tibi fore propitium putas? cum nullus sit è cuius aris sacra non rapueris?

Fabula significat, quòd qui in prosperitate quemuis offendit, in aduersis amicum sibi reperit neminem.

## DE CANE CARNES PORTANTE. 37

**C**Anis ore ferens carnes, ac flumen transiens, cum sub aqua umbram prospexit, putauit alium esse canem, qui plus carniū deferret. Itaq; quas ipse ferebat, eas carnes sub aquas ire dimisit, & ut umbram caperet, se mouit: sed carnes & umbrā, quæ sanè nihil erant, simul perdidit.

Fabula significat quòd cupiditate plus semper habendi, quæ tenemus, ea se penumero perdimus.

## DE LEONE ET RANA. 38

**L**Eo cum ranam magniloquacè audiret, putans aliquod magnum animal esse, se retrouertit: paruinq; stās, ranam è stagno exeuntem uidet. Quam indignabundus statim pedibus calcauit aiens: Nullū amplius ut te perspiciat animal clamore mouebis. Fabula significat, quòd apud uerbosos, præter linguam nihil reperitur.

## DE LEONE SENE. 39

**L**EO cum senuisset, nec uictum sibi querere posset, uiam machinatus est, quī alimenta haud sibi desint. Ingressus igitur speluncam grauitè egrotare iacens simulabat. Animalia illum uerè egrotare putantia, uisitadi gratia ad eum accedebant: quæ leo capiens singulatim, manducabat. Cum multa animalia iam occidisset, uulpes leonis cognita arte, aditum speluncæ accedens, leonem quo ualeat pacto, exterius stans rogat: ei leo blandè respondens ait, Vulpes filia, cur non introgrederis ad me? Et uulpes non illepidè ait, Quoniam here mi animalium ingredientium perplura

k 3 equid

equidem uestigia cerno, sed egredientium uestigia nulla.

*Fabula significat, quòd homo prudēs, quia pericula imminētia prouidet, illa facile deuitat.*

DE LEONE ET TAVRO. 60

**L**eo ingentem taurum per insidias sequens, cum propè accessit, eum uocauit ad cœnam, inquiēs, Amice ouem occidi: hodie mecum, si placet, cœnabis. Taurus leoni morem gerens, ut discubuerunt, quum multos lebetes, nec non magnos & plureis obeliscos paratos conspiceret, & ouem ibi nullam adesse, ē uestigio abiit. Quem leo abentem perspiciebat, quum abiret rogauit: ei taurus haud inurbanè respondit, Non de nihilo equidem abeo, quum instrumenta non ad ouem, sed ad taurum coquendū uideam esse parata.

*Fabula significat, quòd homines prudentes minime latent improborum artes.*

DE LEONE, ASINO, ET VULPE. 61

**L**eo, asinus, & uulpes conflatæ inter se societate uenatū Lexeunt. Quumq; multam prædā cepissent, leo asino, mandat ut prædā diuidat. Asinus quum eam in treis partibus æqualeis esset partitus, optionem capiendi socijs dedit. Quam partitionē leo indignè ferens, ac dentibus frendēs, à diuisione deposuit cū, mandauitq; uulpi, ut prædam ipsa partiretur. At uulpes illas treis partes in unū colligens, ac prædæ nihil sibi seorsum relinquens, leoni omnia tradidit. Tunc leo uulpi ait, Quis te partiri edocuit? Inquit ex tempore uulpes, Asini periculū id me facere instruxit. *Fabula significat, quòd aliorū pericula homines faciunt cautiores.*

DE LEONE CUIUSDAM

rustici filiam amante.

62

**L**eo cuiusdam rustici filiam amabat. Illam quum habere cuperet, patrem uirginis rogauit, ut sibi nubere ipsam

ipsam assentiret. Et rusticus ait, Nullo pacto se assensurū, quod filia bestiae nubat. Quum illum leo toruē afficeret, ac dentibus frenderet, rusticus mutato consilio ait, se cupere ei filiam nubere, modò dentes & ungulas prius cædat euellatq;: quoniam uirgo illis rebus lōge terretur. Leo id postquam prae nimio amore fecit, rusticum adiēs, filiam sibi dari postulat. At rusticus leonē quum ungulis & dentibus perspicit inermem, arrepto suste illum frequens pulsando persequitur. Fabula significat, quod qui inimicis se committit, de facili perit.

DE LEAENA, ET VULPE. 63

**L**eaena quū à vulpe sepius exprobraretur, quod quolibet partu unum dūtaxat pareret catulum, ait, Vnum sanē, at pol leonem. Fabula significat, quod pulchritudo haud in copia rerum, sed in uirtute consistit.

DE LVPO, ET GRUE. 64

**L**vpus in gutture osse retento quum longē cruciaretur, grui pretium obtulit, si illud ē gutture extraheret. Grus rostro quum os ē gutture extraxit, pretium sibi promissum exposulat. Ei lupus subridens, simulq; dentes acuens, ait, Satis pretij tibi esse debet, quod ex lupi ore caput sine lesione eduxeris. Fabula significat, quod apud improbos gratitudo non parua habetur, si pro obsequio quis detrimentum non recipit.

DE LVPO ET AGNO. 65

**L**vpus quum agnum inuenisset errantem, eum non cepit fortissima manu, sed causam quæsiuit, quo iure uel iniuria eum comederet. Igitur agno uerba huiusmodi fecit, Tu mihi abundē iam diu intulisti iniurias. Agnus gemendo ait, Quomodo id fieri potuit, quū nuperrimē uenerim ad luccin? Lupus denuo ait, Agrum mihi pascendo deuastasti.

k 4 Agnus

Agnus inquit ei: Quum dentibus etiam carcam, id facere nequii. Lupus rursus ait, Ex meo quoque fonte bibisti. Et inquit agnus, Quo pacto id fieri potuit, quum aquam ex etate nondum biberim, sed lac matris cibus et potus adhuc mihi sit? Lupus demum ira concilius ait, Licet tua soluere nequeam argumenta, coenare tamen opipare intendo: agnumque cepit, ac illum manducauit. Fabula significat, quod apud improbos ratio et ueritas locum haud habent.

## DE DVOBV5 GALLIS

inter se certantibus.

66.

**D**Vo galli inter se ruri certabant: qui gallinarum prior dux erat, quum ab altero superatus esset, praecurcundia se abscondit. Alter uero uictoria elatus, domus testum statim superuolans, uehementi alarum plausu cantumque significat se riualem suum pugnando superasse, et de aduersario ferre trophaeum. Dum haec et huiusmodi iactabundus uoce erocizat, ecce aquila cibi indiga ex alto deuolans, gallum unguibus rapit, ac pullis suis in alimoniam contulit. Quam rem, qui uictus fuerat gallus, prospiciens, ceu ex hoste triumphans, in publicum uenit, ac solus gallinis liberè potitur. Fabula significat, quod qui prosperis nimium fidit, in aduersa sepius praecipit incidit.

## DE VATE QVODAM.

67

**F**Oro urbis medio, quidam uates cuius sortem aperiebat futuram. Quamobrem magna hominum frequentia stipatus, dum uni et alteri suam aperit sortem, ei nuntiatur, res suas furtim domo esse ablatas. Quo audito, domum curriculo dum abit, quidam ei obuiam factus, ridicule ait, Quare alios quid esset futurum monebas, qui tuae sortis nescius fuisti? Fabula significat, quod homines nequam corrigunt alios, et sua crimina scire se negligunt.

DE

## DE FORMICA, ET COLUMBA. 68

**F**ormica sitiens in fontem descendit: ubi dum bibere uult, in aquam cecidit. Columba quædam arborem fonti imminentem super sedens, quum formicam aquis obrui cõspiceret, ramulum ex arbore rostro continuo frangit, ac sine mora deijcit in fontem. Ad quem formica se applicans, ex aquis in tutum se recipit. Obiter auceps quidam aduenit, & ut columbam uenetur, calamos erigit. Formica id percipiens, pedem alterum momordit aucupi. Eo dolore auceps concitus, calamos demittit. Quorum strepitu columba territa, ex arbore aufugiens, uitæ periculum euasit.

Fabula significat, quòd quum bruta in beneficos grata sint, eò magis esse debent, qui participes sunt rationis.

## DE VITULO, ET CERUA. 69

**V**itulus ceruæ aliquando ait: Quum magnitudine sis maior canibus, & pedum celeritate cursu uelocior, & ad pugnam longe cornibus munitior, cuius rei gratia mater tantopere canes reformidas? Ei cerua inquit subridens, Quoniam fili licet quæ dicis, omnia possideã, canum latratum ferre non possum, sed præ timore fugam statim arripio. Fabula significat, quòd qui natura timidi sunt, apud eos ut audeant, nulla ualet hortatio.

## DE APE, ET IOVE. 70

**A**pes, quæ ceruæ mater existit, quondam accedens ut Dijs sacra faceret, Ioui donum obtulit mellis. Quæ oblatione Iupiter letus, iussit sibi concedi, quicquid ipsa precaretur. Apes igitur rogans, ait, Illustrissime deus deorum, ancillæ tuæ concedere uelis, ut quicumque ad aluere pro rapiendo melle accesserit, is simul ac pupugero eum, continuo moriatur. Quæ rogatione Iupiter diu ambiguus, quoniam genus mortalium longè amabat, demum api ait,

k 3

Satis



Satis sit tibi, quod quicumque alucare pro rapiendo melle accesserit, si cum pupugeris, et in punctura stimulum dimiseris, continuo ipsa moriaris, tibi que uita sit ipse stimulus.

Fabula significat, quod inimicis quandoque mala precamur, quæ in nos sæpius uertuntur.

## DE MVSCA.

71

MVSCA quæ in ollam carniū deciderat, quum se in brodio suffocari sensit, secum ipsa ait, Ecce tantum bibi, tantum comedi, tantum me laui, quod iure satura mori possum. Fabula significat, quod prudentis est id potenti animo ferre, quod utari minime potest.

## DE ADOLESCENTE

quodam &amp; hirundine.

72

ADOLESCENS luxuriosus quum bona patris consumpsisset, solaque uestis ei remansisset, uisa ante tempus hirundine, et statem iam adesse existimans, ipsam quoque uendidit uestem. Sed hyeme denuo orta, quum immenso cruciaretur frigore, uisa rursus hirundine, quæ et ipsa frigore obibat, ait, O pessima auis, quæ me et te pariter perdidisti.

Fabula significat, quod quæ suo tempore non fiunt, ea diu stare nequeunt.

## DE AEGROTO; ET MEDICO.

73

AEGROTO à medico rogatus, quo pacto se habuisset, Plus quam esset opus, seque sudasse respondit. Id bonum fuisse medicus ait. Secundo rogatus ab eodem quomodo se haberet, inquit egrotus, Vchementi frigore fuisse comprehensum. Id ad salutem fore medicus quoque ait. Tercio ab eodem rogatus, quo pacto se habuisset, inquit egrotus, Cum difficultate digerere potuisse. Rursus medicus ait, Id ad salutem optimum fuisse. Deinde ex domesticis quum quidam egrotum interrogaret, quomodo ualeret, illi ager ait, Signa

ad

ad salutē, ut medicus ait, perplura & optima sunt, illis tamen dispero signis. Fabula significat, quod qui ad uoluptatem loquuntur, illis aures præstare quis non debet.

## DE LIGNATORE QVODAM. 74

**L**ignator quidam dum iuxta flumen deo Mercurio dedicatum ligna cederet, securis casu decidit in flumen. Multo igitur mœrore comprehensus iuxta fluminis ripam gemens cōsidebat. Mercurius misericordis motus lignario apparuit, suiq; fletus causam rogauit: quam simulac didicit, securim auream deferens, utrum quam perdiderat illa esset, rogauit. At eā pauper suā esse negauit. Secundo Mercurius alteram detulit argenteam. Quam quum pauper ille suam quoq; esse denegaret, postremò Mercurius ligneam sustulit. Illam suā esse quum pauper assentiret, Mercurius cognoscēs illum esse hominem uerum iustumq; omnes sibi dono dedit. Accedens igitur ad socios lignarius, quod sibi acciderat aperit. Vnus ex socijs id experiri uolens, quum ad flumen accessisset, securim in aquam deiecit: deinde flens in ripa consedit. Cuius Mercurius fletus causam edoctus, securim auream asserens, si quam perdiderat illa esset, rogauit. Quam quum suam esse assereret, Mercurius cogniti eius impudenti ac mendacis, nec auream nec suam quoq; tradidit. Fabula significat, quod quantò Deus propitior est probis, eò improbis existit infestior.

## DE ASINO, ET IOVE. 75

**A**sinus olitori cuidam seruiens, quum parum comederet & multum laboraret, Iouem exorauit, ut alium dominum sibi mutaret. Itaq; Iupiter mandat ut figulo ueneat. Apud quem asinus quum laboraret, in deportado lutum, lateres, tegulas, & huiusmodi, secundo Iouem precatur, ut alio deserviat domino. Iupiter iterum mandat, ut co-

rario

riario uenundetur. Cui asinus multo cum labore & paucō cibo seruiēs, Heu me miserum, cum gemitu ait, quid dominos omittens meliores, ad deteriore perueni, apud quem ut uideo, corium meum etiam post mortem cruciabitur?

Fabula significat, quod priores dominos tunc serui desiderant, cum deteriores experiuntur.

DE LEPORIBVS, ET RANIS. 76

**L**epores in unum simul conuenerunt: ubi cum de miseria ipsorum innata dolerent, gement' ue, quod uita eis, quam ceteris animalibus data esset miserior, quoniam homines, aquilæ, & canes, ad mortem eos usq; persequerentur, decernūt melius sibi fore semel mori, quam in uita tam misera diutius permanere. Hoc certo consilio, ut se in stagnum præcipitent, dum ocyus tendūt, ranæ quæ super stagni ripa astabant, ut strepitum audiunt, in stagnū desiliunt, seq; aquis submergunt: quam rem qui lepus præibat cum conspiciatur, reliquis ait, State, nam nobis sententia mutanda est. Quippe ut liquido uidetis animalia, quam nos, magis timida reperiuntur. Fabula significat, quod cum miser miseriorem aspicit, suam æquius miseriam fert.

DE ASINO, ET EQVO. 77

**A**sinus cum equū alimonia & otio diligenti cura abum dare perspiceret, eum longè beatum esse commendabat, seq; nimium infelicem dicebat, qui cum multum laboraret, ad saturitatem de paleis haud haberet. Cum tempus belli aduenit, miles armatus equum ascēdit, ac cum medios decurrit in hostes, equus mucrone percussus cadit humi prostratus. Quem asinus prospiciens, ingemuit, cuiusq; misertus, sui animi sententiam mutauit. Fabula significat, quod cum paupertate, quæ mater est quietis, quis conuenire debet potius, quam locupletioribus inuidere.

D E

**A**sinus quidam pede altero sentem calcavit, claudusq; factus, cum lupum ad se venientem conspiceret, nec fugere posset, miserabili voce inquit, Heus lupe, demorior equidem e dolore: sed ex quo opus est ut tibi & corvis futurus sim cibus, obsecro quatenus tua benignitate sentem e pede velis extrahere: ut munere tuo extremum sine dolore obeam diē. Dum sentem dentibus lupus euellit, asinus eum calce percussit. Lupus deinde naso, fronte, ac dentibus perfractis, Heu me miserū, exclamat, iure hoc patior. deplorādo reiterat, Qui cū essem coquus, medicus esse volui. Fabula significat, quod quā quisq; nouit, ea se exerceat arte.

**M**ulier quædam gallinam habebat, quæ aurea contigua oua pariebat: putans igitur totam intus auream esse illam, occidit. Sed cum alijs gallinis esse similem reperit, ubi diuitem se fore putauit, quem primò quæstum habebat, eum plus habendi cupiditate amisit. Fabula significat, quod plus habendi cupiditate id sepe perdimus, quod habemus in manibus, lucrum.

**R**ana in palude existens, cæteris animalibus clamādo cum profiteretur se medicam esse, pharmacorumq; peritam, ei uulpes uenustissimè ait, Qui alios curaueris, cū claudicantem curare te nescias? Fabula significat, quod alios docere quis non potest id, quod haud didicerit.

**S**erpens ante agricolæ cuiusdam domum latebras habēs, Scum ab agricolæ filio esset percussus, tam acriter ipsum momordit, quod morsu ex illo puer repente obiit. Hac re cognita, magnus inter parētes gemitus oritur, Tum pater mærore

\* *mœrore concitus accepta securi, serpentē ut occideret, persequitur: uibransq; securim, ut serpentē percuteret, extremum caudæ eius cecidit: deinde uolens pacem cum serpente conficere, acceptis farina, aqua, sale & melle, ad reconciliandum inter se amicitiam uocat serpentem. Et serpens sub petra latens, sibilando ait, Frustra laboras bone uir: nā inter nos amicitia fore non potest: quippe dum me sine cauda aspexero, & tu tui filij sepulcrum, quieti animo esse nequibimus. Fabula significat, quod dum iniuriarum recens uel maxime extat memoria, odia tolli minime queunt.*

## DE GALLINA ET VULPE. 82

**V**ulpes gallinarum tugurium ingressa, cum gallinam nido ægrotantem aspexit, eam rogauit quomodo ualeret. Cui gallina promptē respondit. Meliusculē me habere, si hinc abires soror. Fabula significat, quod inimicorum præsentia nimium est molesta.

## DE VIATORE. 83

**V**iator quidam cum multam uia uiaisset, uotum Mercurio uouit, quod si quid reperiret, eius rei medium sibi offerret. Fortē igitur adinuenit peram amygdalis dactylisq; refertam, & cum putaret id esse argentum, peram capiens amygdalarum nucleos & carnes dactylorum ipse comedit. Deinde templum Mercurij ingressus, atq; aram manibus tenens, uerbis ridiculis inquit ad eum, Votū Mercuri nunc persoluo tibi. Nam quas equidem res adinueni, earum tibi offero medium, ossa scilicet dactylorum ac testas amygdalarum. Fabula significat, quod homines auiditia Deorum efficit contemptores.

## DE LEONE ET HOMINE. 84

**L**eo & homo cum semel simul uiam uiarent, ac inter luandum se quisq; uerbis commendaret, ecce lapidæ occur

occurrunt columnæ, in qua erat incisum, quòd homo suffocabat leonem: quam sculpturam homo leoni ostendens ait, Hic uidere licet, quāto homines leonibus, ac feris omnibus præstantiores sunt, ac robustiores. Et leo promptè respondens, inquit, Si apud leones essent ceu apud homines, qui sculperè scirent, plures à leonibus homines, quàm ab hominibus leones suffocari sculptos uideres.

Fabula significat, quòd homines iactabundi fingunt se fecisse, quæ facere nunquam tentarunt.

## DE VULPE QVADAM.

85

**V**ulpes cum racemos uuarum plenos iam, ac maturescentes prospiceret, cupida de illis manducare, omnè uiam machinata est, qua illos comprehendere posset. Sed cum omnem uiam frustra tētasset, nec desiderio suo satisfacere quiuisset, mœstitiā uertēs in gaudium ait, Racemū illi adhuc nimium sunt acerbi. Fabula significat, quòd prudentis est fingere se ea nolle, quæ consequi non posse cognoscit.

## DE PVERO, ET SCORPIONE.

86

**P**uer quidam ruri uenabatur locustas, & cum scorpionem capere uellet, scorpio simplicitate eius cognita, ait ei, Heus puer, dege in pace, ac manum abstine, si nō uis tutus perire. Fabula significat quòd qui ad utranq; partem cogitat, is quæ sequi & quæ uitare debeat, probe tenet.

## DE VENATORE, ET PERDICE.

87

**V**enator quidam cum quam ceperat perdicem occidere uellet, perdix gemēs huiusmodi uerba fecit ad eū, Heus perdicum auceps, si me missam feceris, ac uitam donaueris, alias per plures conducam tibi perdices. Ei auceps appositè respondit, Nunc eò magis occidi dignam iudico, quòd amicos per insidias perdere polliceris. Fabula significat, quòd qui sibi charos perdere dolo querit, is præceps  
in pe

in pericula incidit.

DE LEPORE ET TESTVDINE. 88

**T**estudo, cum eius pedes lepus derideret, subridens inquit ad eum, Si periculum in cursu feceris, quod quàm tu uelocior sim, liquido cognosces. Cui lepus ait, Te profectò fugit, quid mei ualeant pedes, sed iudicem eligamus, qui cursum & terminum nobis definiat. Igitur eligunt uulpem brutorum omnium sagacissimam, quæ ut locum & cursus terminum constituit, testudo omni segnitio ac negligentia semota, iter arripiens haud quieuit, donec ad terminum peruenit. Lepus uerò pedibus fidens, ubi paululum quieuit, somno excitatus, quantum pedes ualuerunt, ad terminum cucurrit, ibiq; cum testudinem quiescentem reperit, se cum rubore fatetur à testudine superatum.

Fabula significat quòd studio & diligentia, non corporis uiribus, res uel maxima conficiuntur.

DE SALICE, ET SECVRI. 89

**S**ecuris cum salicem cæderet, ex ea ipsa cuneos fecit, quibus salicem facilius scinderet. Quã rem presentiens salix, gemens eiulansq; ait, Non tantũ de securi queror, quæ hominũ manibus me scindit, quantũ de cuneis, qui fiunt ex corpore meo. Fabula significat, quòd in aduersis, nõ ueri amici infestiores amicis, quàm inimici sæpius redduntur.

DE PVERO QVODAM FVRE. 90

**P**uer quidam è ludo literario librum socio clam auferens, suæ matri tradit illum: quem mater cum libenter accepisset, nec filium castigasset, rursus puer alij uestem clam abstulit, atque matri quoq; detulit: quam cum mater etiam libenter accepisset, puer castigatione carens, cum plura in diem de maiora crescentibus annis furaretur, demum publicè captus, ceu furti reus, per quæstores publicè damnatus.

damnatuſ eſt mortis. Sed cū ad locum iuſtitie duceretur eumq; mater gemebunda ſequeretur, impetrata uenia ut matri ad aurem unum loqui uerbum liceret, ad eam conuerſuſ, atq; oſ auri matris adhærens, uti quippiam ſecretò dicturuſ, aurem dentibuſ ſibi abſcidit. Mater uerò præ dolore exclamans, mala ſibi imprecatur. Tunc qui eum ducebant cū ſupra modum criminaretur, non ſolūm furti, ſed quòd tam impiuſ fuerit in matrem, ille abſq; rubore inquit ad eoſ, Nemini ueſtrū ſit mirum, quòd aurem matris dentibuſ abſcidi: ipſa enim huiuſ meæ perditionis autor & cauſa eſt. Quippe ſi me caſtigaffet, cū ei librū detuli, quem ſocio è ſcholiſ primum clām abſtuli, omiſſiſ præ timore uerberum ſurtiſ, ad hoc in præſentia genus turpiſſimæ mortis non perueniſſem. Fabula ſignificat, quòd qui in delinquendo ab initio non caſtigatur, facinoroſior in diem efficitur.

## DE PASTORE ET MARI. 91

PAſtor quidam iuxta lituſ maris pecudeſ paſcens, cū mare ipſum ſemel placidum aſpiceret, nauigandi ſtudio captuſ, oueſ pro daſtyliſ commutauit: quibuſ naui poſitiſ, cū altum iam nauigare, & tempeſtate ſine ſpe ſalutiſ fluctuaret, quæ in naui ſunt, ea omnia proiecit, atque in portum ſe recipit. Denuò cū oueſ paſceret, ac ruruſ mare tamen tranquilluſ uideret, ſuo conſocio ipſam maris tranquillitatem commédanti ridiculè ait, Mare iterum daſtyloſ cupit. Fabula ſignificat, quòd uſuſ & peritiæ noſ reddunt in periculiſ cautioreſ.

## DE PVNICA, ET

malo arboribuſ.

92

PVnica & maluſ arbores, de pulchritudine contendebant, cū diu inter ſe uarijſ, & acerbis cōtentionibuſ certaffent, rubuſ ex proxima ſepe huiuſmodi contentioneſ  
l accip



accipiens, accessit ad eas, atque inquit, Satis iam, satis certatum inter uos est: quiescite admodum & contentionibus finem imponite. Fabula significat, quod minores maiorum lites se penumero componunt.

DE TALPA ET MATRE. 93

**T**Alpa cæcum natura animal est. Hæc aliquando matri ait, Ingentem sentio odorem. Parum post rursum ait, Excelsam aspicio fornacem. Tertio item ait, Malleorum sonitus audio fabriles. Ei mater comiter ait, heus filia, tu, uti percipio, non solum oculis, sed naso & auribus orba existis.

Fabula significat, quod homines iactabundi cum magna profitentur, tunc uel maxime in minimis redarguuntur.

DE VESPIS, PERDICE-  
bus, & Agricola. 94

**V**espæ semel, & perdices siti concitæ, cum simul conuenissent, ad rusticum quendam tendunt, potum ab eo petentes, atque pollicentes, quod sibi pro aqua largas referrent gratias. Quippe perdices uineam se ei fodere promittunt, quod plenos uites producant racemos. Vespæ uero, se uineam circumeundo custodire, ac fures inde amouere largè offerunt. Quibus agricola inquit, Duos habeo boves, qui cum nihil promittant, eandem hanc operam nihil minus præstant. Itaque satius est mihi illis, quam uobis aquam exhibere. Fabula significat, non esse illis subueniendum qui nauci & inutiles sunt.

DE IOVE. 95

**C**um Iupiter nuptias celebraret, cuncta animalia sibi munera obtulerunt, quæque pro uiribus suis. Verum enim serpens rosam legit, illamque ore tenens Ioui obtulit. At Iupiter ut eum aspexit, palam inquit, Ab omnibus dona libenter equidem accipio, uerum à serpente id haudquaquam facio.

facio. Fabula significat, quòd improborum munera non esse sine dolis, quivis prudens sibi persuadere iubet.

## D E S I M I A.

96

**S**imiam duos catulos parere fertur, quorum ad unum Sdantaxat afficitur, & ex affectu illum diligentissimè nutrit. Alterum uerò odit negligitq;. Contigit autem quòd qui in delitijs habebatur, à simia in somnis fuit suffocatus. Quamobrè qui neglectus erat, ad perfectam usq; ætatem ceu matris delitijs fuit educatus. Fabula significat, quòd hominum prudentiam fortuna proculdubio superat.

## D E P V L I C E.

97

**P**vlex cum quendam morsu aliquando stimulasset, captusq; rogaretur, quisnam esset qui membra sibi depasceret, ait se ex eo animalium genere esse, quibus à natura datum esset, ut eo pacto vitam vivat, nec eum occidere velit, cum multum mali facere ipse sibi nequeat. At homo ille subridens, inquit ad eum: Eo magis meis necaberis manibus, quoniam nec multum, nec parum abs re quempiam ledere licet. Fabula significat, quòd malorum, licet parum, uel multum delinquant, misereri haud oportet.

## D E P V L I C E E T H O M I N E.

98

**P**vlex suo solito more saltans, super hominis pede resedit, illumq; morsu acriter pupugit. Qua punctione homo ille graviter concitatus, pulicem cepit, ac unguibus obtundere voluit. Sed pulex manibus exiliens mortem vitavit. Tum homo exclamans ait, O Hercules malorū extinator, ecquid mihi in hunc opprimendam præsens non fuisti?

Fabula significat, quòd non in minimis, sed in magnis arduisq; rebus, à Dijs auxilium quis implorare debet.

## D E F O R M I C I S E T C I C A D A.

99

**H**yemis erat medium, cum formicæ sparsim triticum

l 2

apri

apricabant, Quod cicada aspiciens, cum inedia conficere-  
tur, accessit ad eas, ac triticum pro alimonia, ut sibi conce-  
derent, orauit. Et cum formicæ eam rogarent quidnam  
æstate fecerit, num segnis, & otiosa eo tempore steterit,  
illis cicada ait, Neque segnis, aut otiosa steti, sed cantu ceci-  
ni, quo laborem uic uiantibus leuabam. Quare audita,  
formicæ subridentes, inquiunt, Si æstate cecinisti, ut uiantes  
delectares, nunc salta, ne frigore conficiaris.

Fabula significat, quod qui, quæ facienda sunt, suo tem-  
pore non fecit, is in angustias quando non putat, incidit.

DE VIRO ET VXORIBVS. 100

Tempus erat ueris, quo quidam in delicijs educatus cum  
nec iuuenis, nec senex esset (semicanus enim erat ca-  
pillis) duas simul duxit uxores, unam quidem natu gran-  
dem, alteram uerò iuniorem. Cum omnes eandem habita-  
rent domum, uxor anus ut uirum in amorem suum totum  
pelliceret, quotidie uiro caput pertractās, nigros sibi euell-  
lebat capillos, iunior uerò canos. Postremò ita illum depi-  
larunt, quòd caluum, atq; ridiculum, non sine summo op-  
probrio, uirum reddiderunt. Fabula significat, quòd nul-  
la melior salus senibus existit, quàm foeminis carere, &  
maximè iunioribus, nisi penitus obrui se uelint.

## APOLOGI EX CHI- LIADIBVS ADAGIORVM

Erasmi desumpti ad communem pue-  
rorum fructum.

DE VULPECULA ET PARDALE.

Cum aliquando pardalis uulpem præ se cõtemneret,  
quòd ipsa pellem haberet omnigenis colorum macu-  
lis uariegatam, respondit uulpes sibi id decoris in animo  
esse

esse, quod illi esset in cute. Morale.

Neq; uerò paulò satius est ingenio prædium esse uafro, quàm cute uersicolore.

## DE VULPE ET FELE.

**C**Um aliquando uulpes in colloquio, quod illi erat cum fele, iactaret sibi uarias esse technas, adeo ut uel peram haberet dolis refertam: Felis autem responderet sibi unicam dūtaxat artem esse, cui fideret, si quid esset discriminis. Inter confabulandum repente canum accurrentium tumultus auditur. Ibi feles in arborent altissimam subsiliit, cum uulpes interim à canum agmine cincta, capitur.

Morale. Innuat fabula præstabilius esse nonnunquam unicum consilium, modò id sit uerum & efficax, quàm plurius dolos, consiliaq; friuola.

## DS REGE ET SIMIIS.

**R**Ex quidam Aegyptius aliquot simias instituit, ut saltandi rationem perdiscerent: ut enim nullum animal ad figuram hominis propius accedit, ita nec aliud actus humanos aut melius, aut libentius imitatur. Artem itaq; saltandi protinus edoctæ saltare coeperunt, insignibus indutæ purpuris, ac personatæ. Multoq; iam tempore maiorem in modum placebat spectaculum, donec è spectatoriis factus quispiam nuces, quas clanculum in sinu gestabat, in medium abiecit: ibi statim simiæ, simul atque nuces uidissent, oblitæ choreæ, id esse coeperunt, quod antea fuerant, ac repente è saltatricibus in simias redierunt. Contritisq; personis, dilaceratis uestibus, pro nucibus inter se depugnabant, non sine maximo spectatorum risu.

Morale. Admonet hæc fabula, fortunæ ornamenta non mutare hominis ingenium.

## DE ASINO ET VIATORIBVS.

I 3

Duo

**D**vo quidam, cum in desertis locis asinum quempiam forte fortuna nacti essent, contendere inter se coeperunt, uter eorum, uti suum, domum abduceret. Nam utriq; pariter à fortuna uidebatur obiectus. Hac interim de re illis inuicem altercantibus, asinus sese subduxit, ac neuter eo potitus est. *Morale.* Quidam à presentibus commodis, quibus ob inscitiam uti nesciunt, excidunt.

## DE PISCATORIBVS.

**P**iscatores aliquot, in floreti, testudines eduxerunt: eas cum essent inter sese partiti, neq; sufficerent omnibus comedendis, Mercurium forte accedentem inuitarunt ad conuiuium. At is intelligēs se neutiquam humanitatis gratia uocari, sed ut eos fastidito cibo subleuaret, recusauit: iussuq; ut ipsi suas testudines ederent, quas cepissent.

*Morale.* Nonnulli posteaquam inconsulte quippiam adorti sunt, aliorum implorant auxilium, quos suo negotio admisceant.

## DE ASINO.

**A**puđ Cumanos asinus quisspiam pertæsus seruitutem, abrupto loro in syluam auşugerat: illic forte reperi-  
tum leonis exuiuium corpori applicabat suo, atque ita pro leone sese gerebat, homines pariter, ac feras uoce, caudaq; territans. Nam Cumani leonem ignorant. Ad huic igitur modum regnabat aliquādiu personatus hic asinus, pro leone inmani habitus ac formidatus, donec hospes quisspiam Cumas profectus, qui se penumcro uiderat & leonem & asinum, atque ob id non erat difficile dignoscere, aurium prominentium indicio, neq; non alijs quibusdam coniecturis asinum esse deprehendit, ac probe sustigatum reduxit, dominoq; agnoscenti reddidit. Interim autem risum non mediocrem concitabat omnibus Cumanis asinus iam agnitus,

tus, quos dudum creditus leo, metu propemodum exanimauerat. *Morale.* Haud facile tegimus uitia, quæ à puero nobiscum adoleuerunt.

## DE SCARABEO ET AQVILA.

**S**carabeus aliquando spretus ab aquila, coepit de uindicta quoquo pacto sumenda cogitare. Peruestigauit ubi nam aquila nidum collocasset, adrepsit scarabeus, & oua simili dolo deiecit. Aquila cum sepius domicilium commutasset, neq; quicquã proficeret, Iouem patronum adiit, exponit calamitatem suam. Is iubet ut suo in gremio ponat oua, uel istic in tuto futura. Et huc per uestis lacinias, sinusq; prorepfit pertinax scarabeus, haudquaquam sentiente Ioue. Deinde ubi uidet oua commoueri Iupiter, neq; satis animaduertit, territus rei nouitate, excusso gremio in terram deiecit. *Morale.* Monet hæc fabula, neminem quantumuis pusillum contemnendum esse.

## DE SIMIIS ET PARDALE.

**I**N Maurisia simiarum est ingens copia. Pardalis autem animal est natura simijs infestissimum, quas tamen uiribus assequi non potest, nimirum illis in summas arbores subuolantibus. His itaq; dolis in eas utitur. Sternit se supinam sub ramis, ac porrectis cruribus emori fingit sese. Gaudent eo spectaculo simiæ confidentes in arbore, deinde ubi iam mortuam arbitrantur, unam aliquam emittunt exploraturam, num uerè mortuus sit hostis. Illa cautim ac pedetentim accedens, ubi nullum uitæ uidet argumentum, Pardale nimirum modis omnibus cadauer imitatur, demum audet etiam conscendere. Quod simul ac reliquæ simiæ cōspexerunt, iam deposito omni metu descendunt, & Pardalim omnia ferentē circumsultant. Postremò conculcāt insultantes ludibrij causa, donec senties illas iam saltando defatigatas

gatas derepente reuiuiscens, aliam dentibus, aliam unguibus corripit, dilaniat ac deuorat. *Morale.* Hostem simulantem uires deficere, summopere fugiendum esse.

DE SATYRO ET RVSTICO, ANI-  
ani fabula, Erasmo quoque interprete.

**S**atyrus quidam cum uehementer algeret, hyberno gelu supra modum seuiente, à rustico quodam inductus est in hospitium. Admiratus autem cur homo inflaret in manus ori admotas, rogauit cur ita faceret: is respondit, ut frigidas manus halitus tepore calefaceret. Deinde ubi extructo foco, apposita mensa in pultem feruidam rursum inflaret, magis etiam admiratus sciscitatus est quid hoc sibi uellet. Vti pultem, inquit ille, nimium feruentem halitu refrigerem. Tum Satyrus surgens à mensa, Quid ego audio, inquit? T'un' eodem ex ore pariter, & calidum & frigidum efflas? Valebis, neq; enim mihi ratio est cum eiusmodi homine commune habere hospitium.

*Morale.* Notantur bilingues, qui eundem modò laudant, modò uituperant.

FABVLA EX LAMIA POLITIANI DESVMPTA.

**A**Ves olim propè uniuersæ, noctuam adierunt: rogaueruntq; eam, ne posthac in ædium cauis nidificaret, sed in arborum potius ramis, atq; inter frondes: ibi enim uernari suauius. Quin eidem quercum modo enatam pusillam, tenellamq; adhuc ostendebant, in qua scilicet molli-ter (ut aiebant) & sidere ipsa aliquando noctua, & suum sibi construere nidum posset. At illa facturam se negauit. Quin inuicem consilium dedit his, ne arbusculæ illi se crederent: laturam enim quandoq; esse uiscum, pestem uidelicet auium. Contempsit illa (ut sunt leue genus, & uolaticum

ticum) sapientis, unius noctuæ consilium. Iam quercus adoleuerat, iam patula, iam frondosa erat. Ecce ibi aues illæ omnes gregatim ramis inuolitant, lasciuunt, subsultant, colludunt, cantillant. Interea quercus ea uiscum protulerat. atque id homines animaduenterant. implicitæ ergo repente ibi omnes pariter misellæ, ac frustra eas sera poenitentia subiit, quod salubre illud consilium spreuissent. Atque hoc esse aiunt, cur nunc aues omnes, ubi noctuam uiderint, frequentes eam quasi salutant, deducunt, sectantur, circumsidunt, circumuolitant. Etenim consilij illius memores, admirantur eam nunc ut sapientem, stupentq; densa cæterus, ut uidelicet ab ea sapere aliquando discant. Sed opinor frustra, imò uerò etiam interdum cum magno ipsarum malo. Nā ueteres illæ noctuæ reuera sapientes erant: nunc multæ noctuæ sunt, quæ noctuarum quidem plumas habent, & oculos, & rostrum, sapientiam uerò non habent. Morale. Bene monentis consilia ne spernas, hæc fabula docet.

### APOLOGVS EX SECVNDO

libro Petri Criniti de honesta disciplina desumptus.

**S**Ata est olim cucurbita iuxta arborem pinum, quæ grâdis admodum & ramis patulis extabat: cucurbita uerò cum multis pluuijs, atque cœli temperamento creuisset, lasciuire incipit, & ramulos audacius porrigere. Iam serpebat in pinum, iam surgere, iam ramos, & frondes inuoluere audebat, ampliora folia, candenteis flores, prægrandia poma, & uirescentia ostentans. Itaq; tanto fastu, atque insolentia intumuit, ut pinum arborem ausa sit aggredi. Et uidet, inquit, ut te supero, ut amplis folijs, ut uirore præsto, & iam iam ad cacumen profurgo? Tum pi-



nus, quæ senili prudentia, & robore pollebat, nihil mirata est cucurbitæ insolentis audaciam, sed ita ad eam respondit, Ego hic multas hyemes, calores, æstus, uariasq; calamitates peruici, & adhuc integra confisto. Tu ad primos rigores minus audaciæ habebis, cum & folia concident, & uiror omnis aberit. **Morale.**

Secundis rebus non esse superbiendum.

### FABELLA DE CORVO ET

Lupis, ex Ioan. Antonio Campano desumpta.

**C**orvus lupos per ardua montium iuga comitatur, partem sibi prædæ fieri postulat, qui eos secutus nullo tempore destituisset, sociusq; fuisset. Repulsus deinde à lupis, tanquam non eos, sed prædam, cibumq; secutus, nec minus luporum si occiderentur, quam cæterorum animalium exta fuisset uoraturus. **Morale.**

Non quid agamus semper inspicendum est, sed quo sumus animo, cum agimus.

### ALTERA DE PARTU

terræ. Ex eodem.

**T**urgida olim facta tellus, & mirum in modum tumida, magnum aliquod paritura uidebatur. Accurrunt finitimi, stupent agricola, terræ partum inter spem, metumq; expectant, alij Typhoea illum centimanum, alij montes erupturos putabant. Aperitur terra, prodijt mus: & quod miraculo fore omnibus arbitrabantur, in risum atque iocum conuerterunt. **Morale.**

Non semper credendum promissis magnificis.

### APOLOGVS DE MEM-

bris & uentre, ex Plinio.

**H**umani artus cum uentrem ociosum uiderent, ab eo discordarunt, & suum illi ministerium negauerunt. **Cum**

Cum eo pacto, & ipsi quoque deficerent, intellexerunt ventrem cibos acceptos per omnia membra diuidere, & cum eo in gratiam redierunt. *Morale.*

*Magnæ res discordia pereunt; concordia ualent.*

## EX SECVNDO NOCTIVM

*Atticarum Gellij, Apologus Aesopi Phrygis  
memoratu non inutilis.*

**A**Esopus ille è Phrygia fabulator, haud immerito sapiens existimatus est, cum quæ utilia monitu, suaseruntque erant, non seuerè, non imperiosè præcepit, & censuit, ut philosophis mos: sed festiuos, delectabilesque apologos commentus, res salubriter, ac prospicienter animaduersas, in mentes, animosque hominum, cum audiendi quadam illecebra induxit. uelut hæc eius fabula de auiculæ nidulo, lepidè atque iucundè præmonet. spem, fiduciamque rerum, quas efficere quis possit, haud unquam in alio, sed in semetipso habendam. Auicula, inquit, est parua: nomen est cassita, habitat, nidulaturque in segetibus, id ferme temporis, ut appetat messis, pullis iamiam plumantibus. Ea cassita, in sementes forte concesserat tempestiuiores: propterea frumentis flauescantibus, pulli etiam tunc inuolucres erant. Cum igitur ipsa iret cibum pullis quesitum, monet eos, ut si quid ibi nouæ rei fieret, diceretur uel animaduernerent, idque uti sibi, ut redisset, nuntiarent. Dominus postea segetum illarum, filium adolescentem uocat, & Vides ne, inquit, hæc ematuruisse, & manus iam postulare? Idcirco die crastino, ubi primum diluculabit, fac amicos ad eas, & roges ueniant, operamque mutuam dent, & messem hanc nobis adiuent. Hæc ille ubi dixit, discessit. atque ubi redit cassita, pulli trepiduli circumstrepere, orareque matrem, ut statim iam properet, atque alium in locum sese

se se affortet : nam dominus, inquit, misit qui amicos rogaret, uti luce oriente ueniant, & metant. Mater iubet eos à metu ociosos esse. Si enim dominus, inquit, messem ad amicos reiecit, crastino seges non metetur, neq; necesse est hodie uti uos auferam. Die igitur postero mater in pabulum uolat, dominus quos rogauerat opperitur. Sol feruit, & fit nihil, & amici nulli erant. Tum ille rursum ad filiū, Amici isti, inquit, magnam in partem cessatores sunt : quin potius inuis, & cognatos, affines, uicinosq; nostros oramus, ut adsint cras tempori ad metendum? Iidem hoc pulli pauefacti matri nantiāt. Mater hortatur, ut tum quoq; sine metu, ac sine cura sint : cognatos, affinesq; nullos sermē tam esse obsequibiles ait, ut ad Laborem capeffendum nihil cunctentur, & statim dicto obediant. Vos modò, inquit, aduertite, si modò quid denuo dicetur. Alia luce orta auis in pastum profecta est, cognati, & affines operam, quam dare rogati sunt, supersecant. Ad postremum igitur dominus filio : Valeant, inquit, amici cum propinquis. Afferes prima luce falces duas unam egomet mihi, & tu tibi capies alteram, & frumentum nosmetipsi nostris manibus cras metemus. Id ubi ex pullis dixisse dominū mater audiuit : Tempus, inquit, est cedendi, & abeundi : fiet nunc dubio procul, quod futurum dixit. In ipso enim uertitur cuius est res, non in alio unde petitur. Atq; ita cassita nidum migravit, & seges à domino demessa est. Hæc quidem est Aesopi fabula, de amicorum, & propinquorum leui & inani fiducia. Sed quid aliud sanctiores libri philosophorum monēt, quàm ut in nobis tantum ipsis nitamur? Alia autem omnia, quæ extra nos, extraq; nostrum animū sunt, neq; pro nostris neq; pro nobis ducamus. Hunc Aesopi Apologum Qu. Ennius in satyris scitè admodum & uenustè uersibus quadratis composuit,

posuit, quorum duo postremi isti sunt, quos haberi cordi,  
& memoriae operæpretium esse hercle puto.

Hoc erit tibi argumentum semper in promptu situm,  
Ne quid expectes amicos, quod tu agere possis.

## DE ARIONE, ET DEL-

phino, ex libr. x v i.

Gellij.

Vetus & nobilis Arion cantator fidibus fuit. Is loco  
& oppido Methymnæus, terra atque insula omni  
Lesbius fuit. Eum Arionem rex Corinthi Periander ami-  
cum, amatumq; habuit, artis gratia. Is inde à rege profici-  
scitur terras inclytas, Siciliam, atq; Italiam uisere. Vbi eò  
uenit, auresq; omnium, mentesq; in utriusque terræ urbi-  
bus demulsit: in quæstibus istis, & uoluptatibus, amori-  
busq; hominum fuit. Is tum postea grandi pecunia & re  
bona multa copiosus, Corinthum instituit redire. Nauem  
igitur & nautas, ut notiores, amicioresq; sibi Corinthios  
delegit. Sed eo Corinthios homine accepto, nauiq; in altum  
prouecta prædæ, pecuniæq; cupidos cepisse consilium de  
necando Arione. Tum illum ibi perniciæ intellecta, pecu-  
niam ceteraq; sua ut haberent dedisse, uitam modò sibi ut  
parceret, orauisse. Nautas precum eius harum commiser-  
tum esse illatenus, ut ei necem adferre per uim suis mani-  
bus temperarent. Sed imperauisse, ut iam statim coràm de-  
siliaret præceps in mare. Homo, inquit, ibi territus, spe o-  
mni uitæ perdita, id unum postea orauit, ut priusquàm mor-  
tem oppeteret, inducere permitterent sua sibi indumenta,  
& fides capere, & canere carmen casus illius sui consola-  
bile. Feros & immanes nautas prolubium tamen audiendi  
subit. Quod orauerat impetrat. Atq; ibi mox de more cin-  
ctus, amictus, ornatus, stansq; in summæ puppis foro, car-  
men,

men, quod Orithium dicitur, uoce sublatissima cantauit. Ad postrema cantus, cum fidibus ornatusq; omni, sicut stabat, canebatq;, eiecit sese procul in profundum. Nautæ haudquaquam dubitantes quin perisset, cursum, quem facere coeperant, tenuerunt. Sed nouum & mirum, & pium facinus contigit. Delphinum repente inter undas adnauisse, & dorso super fluctus edito uestauisse, incolumiq; eum corpore & ornatu, Tænarum in terram Laconicam deuexisse. Tum Arionem prorsus ex eo loco Corinthum petiuisse, talemq; Periandro regi, qualis Delphino uestus fuerat, sese obtulisse, eiq; rem, sicut acciderat, narrauisse. Regem isthæc parum credidisse, Arionem quasi falleret, custodiri iussisse. Nautas requisitos ablegato Arione dissimulante interrogasse, ecquid audissent in ijs locis unde uenissent, super Arionem: eos dixisse, hominem cum inde irent, in terra Italia fuisse, eumq; illic bene agitare, & studijs delectationibusq; urbium florere, atq; in gratia pecuniaq; magnæ fortunatum esse. Tum inter hæc eorum uerba, Arionem cum fidibus & indumentis, cum quibus se in salum eiaculauerat extitisse. Nautas stupefactos, cōuictosq; ire inficias non quisse. *Morale.* Documento est hæc fabula, plus aliquādo inueniri in brutis animalibus clementiæ, quàm in his hominibus, qui præter opes nihil habent pensi, præter figuram nihil humanitatis.

## NICOLAI GERBELEI

Phorcensis Apologus

Iepidissimus.

## DE ARANEA ET PODAGRA.

**A**ranes paululum à texendo opere quietior, animi relaxandi gratia commodum deambulabat. Huic se obuiam præbuit Podagra, tametsi passibus ambiguïs admodum

modum ægre illam assequeretur. Eius diei itinere utcumq;  
 emenso, non longè aberant ab oppidulo, cui regionis eius  
 incolæ Tyche nomen indiderant. Vtriq; cōsiliū fuit, con-  
 ditionis suæ hospitem præcūligare. Aranea non maximo-  
 pere data opera in opulenti cuiusdam ciuis ædes diuertit,  
 inibi quaquaversum telas suas præpandebat prætende-  
 batq; retia. aderant illico nescio qui trygedamones, qui  
 textrinam illius demoliebantur. Momentaneum itaq; erat  
 ipsius quò citiūcūq; se uerteret ædificium. Nus-  
 quam etenim scopariorum oculatas scopas poterat effu-  
 gere. Misera planè quæ in tanta rerum omnium affluen-  
 tia, sola egebat proturbabaturq;. Podagra uerò mendica-  
 buli instar uix tandem egestosi cuiuspiam tuguriolum im-  
 petrarat. In id loci cū decubisset, nihil non experieba-  
 tur miseriarum. Apponebatur cœnatūrienti panis ciba-  
 rius, aridis uix faucibus hianti hydropoterium. Iamq;  
 diurno itinere lassescenti, torus ligneus, nullis frondibus,  
 nullo gramine, sed prætennibus paleis insternebatur. At-  
 qui dicere non est huius instituti, quàm conuenerint malè  
 membrīs mollibus, cuticulæ (ut ita dixerim) holosericæ,  
 stragula tam dura, tam barbari uilli. Oriente igitur uix  
 tandem illo augusto sydere, quod exaudit, quod intuetur  
 omnia, conuenerunt rursū Aranea simul & Podagra.  
 Prior Aranea præteritæ noctis molestias, tot locorum  
 commutationes denarrat, nunc hero exprobrans mundi-  
 tiem, nunc nimiam scopariorum obseruantiam. Podagra  
 contrā de hospitīs sui egestate compluria comminiscitur.  
 Necotium habet administrare Araneæ liuidas uibices,  
 quas adamantina sulcratencillæ cuticulæ impresserāt. Con-  
 silium ineunt, Araneam deinceps pauperum tuguria, Po-  
 dagram uerò diuitū aulās debere subingredi: in hanc Ara-  
 nea

sentaneum uenenum lateret in uasculo. Maritus mori cupiens ficus comedit uniuersas, ratus eam optimam moriendi, & uxoris iram euadendi uiam esse. Rediens mulier, quum pullos omnes à miluo ereptos esse cognosceret, sumpto ingenti baculo, maritum malum pullorum custodē uerberare decreuerat. Cui insipiens maritus, Noli inquit, uxor, me iamiam moriturum uerberare. Omne enim uasculi uenenum comedi, ut errati poenas luam. Tunc mulier ira in risum uersa marito ignouit, qui pro pullis male seruatis alio pacto ei satisfecit.

Fabula indicat, aduersus insipientes nullum idoneum esse remedium.

F I N I S.

# INDEX FABV- LARVM AESOPI ET ABSTEMII.

<b>A</b> Bies & dumus	121	Agricola & filij eius	45.104
Accipitres inter se inimici quos pacat colūba	214	Agricola militiam & mercaturam affectans	198
Accipiter columbam insequens	182	Agricola ictus ab ape	241
Adolescentes duo	141	Agricola & poeta	205
Adolescens & catus	103	Agricola & pelargus	144
Adolescens in funere matris canens	200	Agricola & fortuna	66
Adolescens & hirundo	164	Alcedo	67
Adolescens ex nimio coitu infirmus	211	Ales & pulli eius	122
Aegrotus & medicus	48.112.154	Amnis fontem suum conuittis laceffens	199
Aethiops	64	Anser	125
Agnus & lupus	103.144	Anseres & grues	60.114
Agricolæ & canes	52.106.139	Anguilla conqueritur quod magis quam serpens infestetur.	186
		Anus	

# I N D E X.

Anus & ancillæ	113	inueniens	202
Anus dæmonē accusans	190	Asinus ægrotans, quem lupi	
Aper & rusticus	124	uisitant	202
Aper & asinus	84.217	Asinus tubicen & lepus ta-	
Apes & Iupiter	79	bellarius	213
Apiarius	129	Asin <sup>9</sup> leonīs pelle indutus	76
Aquila	79	Asinus & coruus	76
Aquila & coruus	109.129	Asini cum uulpe societas	76
Aquila & scabro	129	Asinus & uitulus	183
Aquila præferens se cæteris		Asinus & ranæ	76
auibus	220	Asini & Iupiter	76
Aquila & uulpes	128	Auarus poma marcescentia	
Aquila & pica	189	comedens	246
Aquila & homo	135	Auarus nimis custodiens a-	
Aquila & cornicula	85	gros	246
Aquila filios cuniculi capi-		Auarus	59
ens	208	Auarus & inuidus	122
Aranea & podagra	174	Auceps	53.105.147
Aranea & hirundo	182	Auceps & merula	54
Arbores pulchræ & defor-		Auceps & frigilla	192
mes	184	Aues & noctua	168
Aries cū tauro pugnans	207	Aues plures reges eligere	
Arion & delphin	173	uolentes	200
Arundo & auicula	238	Aues & quadrupedes	96
Asinus moriendo uinum ef-		Aues scarabeum timētes	192
fundens	238	Auriga & rota currus stri-	
Asinus porco inuidens	225	dens	209
Asinus & lupus	48.157	B	
Asinus & equus	51.104.156	Bos & iuuenus	126
Asinus & Iupiter	155	Bos cornua à deo petēs	244
Asinus	112.117.166	Boues & bubulcus	253
Asinus & viatores	166	Bubo & aquila	223
Asinus & leo	61	Butalis & uespertilio	65
Asinus syluestris	75	Bubulcus	79
Asinus, simia, & talpa	186	Buccinator uel tubicen	105
Asinus ingrato hero seruiens		C	
203		Calamus & oliua	142
Asinus & scurra	199	Caluus quidam	119
Asinus finem laborum non		Camelus	77.118
		Cancer	



# INDEX

Cancer & uulpes	70	Cervus & boues	99
de Cancris matre & filio	117	Cervus & ouis	92
Canis & lanio	47.102	Cervua	60
Canis ad cornam uocatus	134	Cervua & uitis	61
Canis & lupus	148	Cervua & leo	60
Canis & umbra	83.149	Cicada & formica	115.126
Canis & herus	191	Citharædus	71
Canis & asinus	87	Cochlea	65
Canis uenaticus	91	Claudus primum accubitus	
Canis & gallus	57	occupans	242
Canis & ouis	102	Cochlea petit ab Ioue ut su-	
Canis inuidus & bos	109	am domum ferre possit	
Canis & leo	117	204	
Canis mordax	118	Columba & miluus	90
Canis pluuiam timens, aqua		Columba & pica	182
feruenti exocclus	214	Columba	78
Canis filium domini occidens		Columba & cornix	78
240		Coriarius emens pellem urfi à	
Canis & asinus aduersus lu-		uenatore, nondum capti	196
pum	212.136	Cornix & coruus	71
Canes urbani uillaticum infe-		Cornix & canis	72
quentes	190	Cornix & ouis	109
Canis oues domini sui occidens,		Cornix & urna	123
ab ipso suspenditur	206	Coruus & agrotans	148
Canes duo	69	Coruus & uulpecula	86.148
Capones pingues, et quidam		Coruus & lupi	170
macer capo	184	Coruus & serpens	72
Capra & canis	241	Cucurbita & pinus	169
Carbonarius & fullo	50	Cuculus & accipiter	183
104.136		Culex & leo	80
Carduelis & puer	194	Culex sibi cibum & hospitium	
Cassita & pulli	171	ab ape petens	213
Cassita	59	Cycnus	64
Castor	53.147	Cycnus in morte canens com-	
Carus & gallus	131	prehensus à ciconia	185
Cata & Venus	45.138	Cynicus philosophus	243
Cera duritiem appetens	198	D	
Cervus & leo	144	Dæmon uxorem recusans	252
Cervus & lupus	92	Dæmon morte diuitum lætus,	
Cervus	97	r paup	

# INDEX

pauperum uerò mortuus		Fures & gallus	71
250		G	
Delector militum	236	Gallus pellem uulpinam fugi-	
Diues à fortuna petens, ne plus		ens	227
diuitiarum sibi det	217	Gallinæ pullus matri non ob-	
Diues quidam & seruus	189	sequens	232
Diuitis filia & mater	78	Galli inter se pugnantes	240
Duo adolescentes	46	Galli & perdix	49
Duo amici et ursus	46.118.141	Gallus & catus	108
Duo galli inter se certantes		Gallina & uulpes	158
152		Gallus gallinaceus	82
Duo inimici	142	Gallina & hirundo	77
E		Gallina auripara	80
Episcopus sacerdoti ignoscens		Glires quercum eruere uolentes	191
nummos armatos afferenti		Graculus	94
219		Grammaticus docens asinum	
Eques caluus	119	230	
Eques & leo	95	H	
Equi duo	193	Hydrus & rana	241
Equus incultus, sed uelox, quem		Hinnulus	59
ceteri irrident	210	Hirundo & alix auiculae	89
Equus & asinus	96	Hirundo & cornix	64
Equus & seruus	101	Hoedus & lupus	70.92.113
Eremita & miles	196	Homo gloriosus	50
Erinacius uiperam hospitem		Homo à cane morsus	140
eijciens	205	Homo & Apollo	50
F		Homo & Satyrus	52
Faber & canis	145	Homo & ligneus Deus	134
Felis & murem & caseum comedens	223	I	
Ficedula & turdus	229	Impossibilia promittens	56
Filius hortulani urtica punctus		Insanus sapientiam uendens	
226		248	
Filius & pater	55	Iupiter & pudor	73
Filius & mater	55	Iupiter & coruus	145
Formica columba	153	Iupiter & testudo	73
Formica & cicada	115. 126.	Iupiter & simia	114.120
163		Iupiter conuiuium celebrat	162
Formica	74.111	Iuuenis senis curuitatem irridens	188
Fur & canis	90	Legat	

# INDEX

## L

Legatus avarus tubicines decipiens	187	Lupus ouis pelle indutus, qui gregem deuorabat	206
Lezna & uulpes	151	Lupus piscis fluminis, maris regnum affectat	208
Leo & capella	123	Lupus & agnus	151
Leo & ceruus	235	Lupus & grus	84.151
Leonis lautum conuiuium	224	Lupus & iucula	91
Leo & lupus	249	Lupus & uulpes	97
Leo & uulpes	243	Lupus & canis	106.148
Leo & rana	111.149	Lupus & caput pictum	93
Leo, asinus, & uulpes	150	Lupus & uulpes	233
Leo & taurus	150	Lupus oues inuadere uolens, sed impeditus	233
Leo & capra	113	Lupus qui se religioni addicit	230
Leo & uenator	123	Lupus esuriens	250
Leo cuiusdam rustici filiam amans	150	Lupus gregem aggreditur, dum canes inter se rixantur	237
Leo & homo	158	Lupus & ouis	74.98
Leo & quidam alii	83.112	Lupus & uetula	80
Leo & mus	88	Luscinia cantum accipitri pro uita pollicens	212
Leo & mus	197		
Leo senectute confectus	86.149		
Leo & uulpecula	100		
Leo porcum sibi socium eligens	223		
Leo & ursus	157		
Leo & lupus	63		
Lepores & ranæ	156		
Lepores	74.92		
Lepus & testudo	160		
Lepus se uulpi præferens ob pedum uelocitatem	205		
Lepus calliditatem, & uulpes celeritatem à loue petunt	210		
Lignator quidam	155		
Lupus & agnus	82		
Lupus suadens histrici ut tela deponat	204		

## M

Malus transplantata	110
Malus arbor poma ingentia procreans	247
Maritus & uxor	70
Medicus quidam	146
Membra & uenter	170
Mercurius & Tiresias	69
Mercurius & statuarius	68
Mercurius & sutor	73
Merula & miluus	239
Miles timens includi in oppido, ob auxilia à longeuo turra	213
Miluus, accipiter, & aquila	248

# INDEX

248	Milvus ægrotus	88	Musca quæ quadrigis infidens,	
	Monedula & columbæ	72	pulverem se excitasse dice-	
	Monedula	72	bat	186
	Montium partus	91.170	Mustela & mures	110
	Mortuo crucifixum pro turibu-		N	
	lo ferens	231	Nautæ Sanctorum auxilium	
	Morsus à cane	52	implorantes	186
	Mula quædam	146	Noctua & aues	168
	Mulier & gallina	46.140.157	Nutrix & lupus	116
	Mulier	63	Nuci, asino, & mulieri profunt	
	Mulier & medicus	139	uerbera	202
	Mulier uenefica	65	O	
	Mulier & ancillæ	65	Ollæ duæ	119
	Mulier uirum morientē flens,		Olea & cucurbita	222
	quam pater consolatur	1185	Olitor & talpa	234
	Mulier ignē in mariti domum		Olitor & canis	61
	ferens	214	Opilio & agricolæ	108
	Mulier amatoris discessum		Opilio qui lupum inter canes	
	flens	185	aluerat	226
	Mulier quæ pro uiro se mori		Ovis pastori conuiciatur	209
	uelle dicebat	200	Ovis à canecapta uociferatur,	
	Mulier ob turdos uerberata		à lupo uerò capta minime	
		225		245
	Mulier uerberata se mortuam		Oues immoderatè segetem pa-	
	simulat	247	scentes	248
	Mulus & equus	195	P	
	Mures felis collo tintinabulū		Pardus & uulpecula	127
	suspendere uolentes	252	Pastor & mare	48.161
	Mures & carus	143	Pastor & lupus	62
	Mures & ranæ	82	Pastor & oues	79
	Mus qui cum felle amicitiam		Pastor gregem aduersus lupum	
	contrahere uolebat	203	hortans	227
	Mus liberans milium	204	Pater filium ad uirtutem fru-	
	Mus urbanus & mus rusticus		strā hortatur	206
		85	Pater familias & canis	236
	Mus in cista natus	181	Pauo pennis à milite spoliatus	
	Musca	154		245
	Musca & formica	94	Pano & monedula	58.109
	Muscæ	68	Pauo	

# INDEX

Pauo & pica	III	Quadrupedes societatem ad-
Pauo & grus	120	uersus aues cum piscibus
Pauper deficiens domus ruinam,		ineuntes 187

in qua thesaurum inuenit

221

Pecunia potius ad malos quam  
ad bonos accedens

222

Pica & cuculus

238

Philomena & accipiter

130

Piscator & cynaris

54

Piscator & pisciculus

115

Piscatores quidam

137.166

Piscator quidam

136

Piscator quidam alius

67

Pisces à sartagine in prunas de  
silientes

187

Porcus post mortem domino  
gratias referens

239

Porcus latus inimici morte

251

Porcellus & patris testamen-  
tum

248

Porcus & equus

195

Prætor repetundarum damna-  
tus

214

Psittacus admiratur cur maior  
honor sibi exhibeatur alibi,  
quàm in patria

220

Psittacus honoratus

243

Puer discere uolens

245

Puer oues pascens

147

Puer & scorpio

159

Puer & fur

124

Puer & fortuna

142

Puer quidam fur

160

Pulex

163

Pulex & homo

163

Punica & malus arbores

161

Quercus & arundo

114.120

Quadrupedes societatem ad-  
uersus aues cum piscibus  
ineuntes 187

## R

Rana & uulpes

117.157

Ranæ, & carum rex

89.138

Rana & bos

95

Ranæ duæ

57

Ranæ aliz duæ

66

Rex & simiæ

165

Rusticus & mus

189

Rusticus & Hercules

125

Rusticus per uocem hœdi ad  
iuriscôsuitum admissus

211

Rusticus & fortuna

119

Rusticus & coluber

84

Rusticus & anguis

93

Rusticus & iuuenius

124

Rusticus impetrat ut triticum  
absque aristis nascatur

181

Rusticus annē transiturus

182

## S

Sacerdos qui quinq; moniales  
prægnantes fecit

219

Sacerdos qui puero turdos de-  
derat allandos

228

Sacerdos & pyra

195

Salix & securis

160

Satyrus & uiator

124.168

Scarabeus & aquila

167

Scurra & episcopus

194

Senex mortem uocans

139

Senex mortem differre uolens

215

Senex puellam in uxorem acci-  
piens

188

Senex iuuenem poma sibi sur-  
ripiantem saxis deiciens

212

# INDEX

Senex à filio domo eiectus duo	dine iniens	189	
lintea petens	244	V	
Serpens saxo oppressus	231	Vaticinator	54.152
Serpens & agricola	157	Venator & perdix	159
Serpens & cancer	62	Vermis & uulpes	80
Serpens	78	Vespæ, perdices, & agricola	161
Seruus afinâ heri è rupe dei-	239	Vespertilio, rubus, & mergus	58
ciens	143	Vespertilio & mustela	74
Simia & uulpes	114.120	Viator & Mercurius	54.158
Simia, & eius proles, siue Iup-	99	Viatores duo	66
ter	163	Viatores & sarmecta	75
Simia & vulpecula	167	Vidua & asinus uiridis	207
Simia & duo eius nati	68	Vidua operarium suum coniu-	218
Simia & pardalus	58	gio sibi copulans	98
Simius & Delphis	117	Vipera & lima	215
Singularis & uulpes	62	Vir avarus sacculum nummo-	240
Sol & aquilo	62.193	rum alloquens	242
Sus & canis	98	Vir qui ad Cardinalem nuper	231
Sus & canis	162	creatum gratulandi gratia	229
Sylua & rusticus	121	accessit	242
T	119	Vir septem destruens ut inuti-	242
Talpa & mater	125	lem	242
Taurus & leo	60.116	Vir se felicitatis suæ causam,	242
Taurus & caper	220	infelicitatis uerò fortunam	242
Taurus & mus	190	dicens	242
Testudo & aquila	53	Vir beneficus in latrones inci-	242
Testudo ab aquila sublata in	149	dens	242
altum	246	Vir thesaurum compatre con-	242
Testudo & ranæ	121	cio abdens	242
Thymnus & delphinus	225	Vir lapidatus resurrexit	231
149	229	Vir avarus moriens	229
Turdus uisco captus	242	Vir decrepitus arbores inserens	242
Tigris & uulpes	242	Vir mitis, & uicinus maledicus	242
Trabs & boues eam trahentes	242	Vir pisciculos sciscitans de mor-	242
184	242	te patris	224
Trabs bouum pigritiam incre-	242	Vir & uxor bigami	197
pans	242	Vir mali	
Tubicem, siue buccinator	242		
155	242		
Turdus amicitiam cum hirun-	242		